

Liabona



**Sa Unsang Paagi
ang Manluluwas
Mopanalangin sa
mga Babaye nga
may Pagtuo, p. 32**

**Ngano ug Unsaon Pagdepensa sa
Kagawasan sa Relihiyon, p. 16**

**Ang Hustong Paagi sa Pagsulbad
sa mga Pangutana, p. 38**



“Kanila [miingon si Jesus] nga nag-ingon, Tungod sa kadiyutay sa inyong pagtuo: kay sa pagkatinuod magaingon ako kaninyo, nga kon may pagtuo nga ingon og liso sa mustasa, makaingon kamo niining bukid, Bumalhin ka gikan dinhi ngadto didto; ug kini mobalhin; ug walay magamakuli alang kaninyo.”

Mateo 17:20

Kining mga liso sa mustasa, nga nagtubo sa lisoohan, mao ang matang nga makit-an sa Israel. Ang straight pin, nga sobra og gamay sa usa ka pulgada (3 cm) ang gitaa-on, giapil aron makita ang gitaa-on.



MGA MENSAHE

- 4 Mensahe sa Unang Kapangulo-
han: Giliyokan sa Iyang
Malumo nga mga Bukton**
Ni Presidente Dieter F. Uchtdorf
- 7 Mensahe sa Visiting Teaching:
Mga Kinaiya ni Jesukristo—
Mainantuson ug Mapailubon**

**LABING IMPORTANTING
MGA ARTIKULO**

- 16 Mobarug isip mga Saksi sa Dios**
Ni Elder Dallin H. Oaks
*Sa kalibutan nga naghagit sa
atong sukaranang mga pagtuo,
kinahanglang maghiusa kita nga
barugan ang atong katungod sa
pagpahigayon sa atong relihiyon
sa gawasnong paagi.*

ANAA SA HAPIN
Atubangan: *Rabboni*, ni Michael Malm. Sulod sa atubangan nga hapin: Gilitratohan ni David Stoker. Sulod sa luyo nga hapin: Paghulagway sa litrato pinaagi ni Cody Bell.

- 24 Ang Pagrebelde ni Satanas**
Ni Mark A. Mathews
*Ang pagsabot sa rebelyon ni
Satanas didto sa kinabuhi nga
wala pa dinhi sa yuta makata-
bang nato nga makakita og klaro
sa tahas sa mga lagda, mga sum-
banan, ug mga balaod sa plano
sa Langitnong Amahan.*

- 28 Gunit sa Gunitanan
nga Puthaw**
Ni Elder Ulisses Soares
*Unsaon nato sa paggunit sa
gunitanan nga puthaw ug dili
mamuhi, bisan moagi pa sa
gabon sa kangitngit?*

- 32 Ang Pagtahud sa Manluluwas
para sa mga Babaye**
Nila ni Robert ug Marie Lund

- 38 Kon ang mga Pagduha-duha
ug mga Pangutana Motumaw**
Ni Adam Kotter
*Ang pagpangutana mahitungod
sa ebanghelyo dili problema—
ang atong gibuhay niini maoy
importante.*

MGA DEPARTAMENTO

- 8 Notebook sa Komperensya
sa Oktubre 2014**
- 10 Atong mga Panimalay, Atong
mga Pamilya: Naghisgot
mahitungod sa Lisud nga
mga Hilisgutan**
Ni Sheree Lyn Clarke
- 13 Mga Pagpamalandong:
Lolo, Amahan**
Ni Aaron L. West
- 14 Kami Namulong kang
Kristo: Ang Matag Pagsulay
Makalig-on sa Pagtuo**
Ni Giorgia Murgia
- 42 Mga Tingog sa mga Santos
sa Ulahing mga Adlaw**
- 80 Hangtud sa Sunod Natong
Panagkita: Natukod Diha
sa Bato**
Ni Elder Orson F. Whitney



46

46 Unsay Among Nakat-unan gikan sa Among mga Ginikanan

Unsaon sa pagtrabaho, pag-ampo, ug pagsalig sa Langitnong Amahan—pipila lang sa mga leksyon nga nakat-unan sa mga young adult gikan sa ilang mga ginikanan.

50 Usa ka Bag-ong Destinasyon

*Ni Amancay Kotecka-Miño
Tungod sa akong pagpamatuod, ako na karong nasabtan nga ako wala mag-inusara, bisan unsay sunod nga destinasyon nga thatag sa kinabuhi.*



Tan-awa kon inyo bang makit-an ang Liahona nga gitago dinhi niini nga isyu.
Timailhan:
Tarung ba inyong pagpahulay para sa mga buntag sa Dominggo?

52 Kalig-on nga lapas sa Atong Kaugalingon

*Ni Elder David A. Bednar
Ang makaabag nga gahum sa Pag-ula ni Jesukristo makatabang niadtong gusto nga mahimong mas maayo ug moserbisyo nga mas matinud-anon.*

56 Ayaw Husgahi Kon Si Kinsay Andam Na

*Ni Randall L. Ridd
Dili gyud kamo masayud kinsa ang andam na nga modawat sa ebanghelyo.*

58 Pagbaton og Kaisug sa Pagpakigbahin sa Ebanghelyo


Tulo ka paagi nga atong mabuntog ang atong kahadlok sa pagpakigbahin sa ebanghelyo.

60 Hinumdumi nga Ila Kanang Paggpili

Ang kalampusan sa pagpakigbahin sa ebanghelyo magdepende unsay inyong buhaton—dili unsay gibuhat sa uban.

62 Pag-imbatar ug Pag-follow Up

Onse ka paagi nga kamo “makahatag” sa inyong mga higala og oportunidad sa pagduol ngadto kang Kristo.



52



77

66 Pagtug-an sa mga Sekreto

*Ni David Dickson
Pipila ka mga sekreto importante ra kaayo aron tipigan.*

68 Kanus-a Ako Mosulti?

*Ni Jan Pinborough
Unsaon nako sa pagkahibalo kon tipigan ba o isulti ang usa ka sekreto?*

69 Linain nga Saksi: Nganong kinahanglan nga maminaw kita sa kinatibuk-ang komperensya?

Ni Elder Robert D. Hales

70 Pag-andam alang sa Pasko sa Pagkabanhaw

Gamita kining kalihokan sa semana sa dili pa ang Pasko sa Pagkabanhaw aron maandam sa pagsaulog sa Pagkabanhaw ni Kristo.

72 Diha-diha nga Pagsabut

*Ni Richard M. Romney
Basaha giunsa ni Magnolia pagtabang ang iyang bag-ong higala nga si Mia nga mobati nga giabi-abi sa Primary.*

74 Panahon sa Kasulatan: Ang Istorya sa Tawo nga Buotan ug sa Tawo nga Boang-boang

Ni Jean Bingham

76 Koloranan nga Pahina

77 Mga Kasulatan ubos sa mga Bitoon

Ni Bonnie L. Oscarson

78 Para sa Gagmayng mga Bata: Pagkatulog sa Sabado ug mga Pahiyom sa Dominggo

Ni Miche Barbosa

Internasyonal nga magasin sa Ang Simbahan ni Jesukristo sa mga Santos sa Ulahing mga Adlaw nga giimprinta sa Cebuano

Ang Unang Kapanguloan: Thomas S. Monson, Henry B. Eyring, Dieter F. Uchtdorf

Korum sa Napulog Duha ka mga Apostoles:

Boyd K. Packard, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Editor: Craig A. Cardon

Mga Adviser: Mervyn B. Arnold, Christoffel Golden, Larry R. Lawrence, James B. Martino, Joseph W. Sitati

Tigdumalang Direktor: David T. Warner

Direktor sa Operasyon: Vincent A. Vaughn

Direktor sa mga Magasin sa Simbahan:

Allan R. Loyborg

Business Manager: Garff Cannon

Tigdumalang Editor: R. Val Johnson

Luyo-luyo sa Tigdumalang Editor: Ryan Carr

Team sa Pagsulat ug Pag-edit: Brittany Beattie, David Dickson, David A. Edwards, Matthew D. Flitton, Lori Fuller, Garrett H. Garff, LaRene Porter Gaunt, Mindy Anne Leavitt, Michael R. Morris, Sally Johnson Odekerk, Joshua J. Perkey, Jan Pinborough, Richard M. Romney, Paul VanDenBerghe, Marissa Widdison

Tigdumalang Direktor sa Art: J. Scott Knudsen

Direktor sa Art: Tadd R. Peterson

Team sa Pagdesinyo: Jeanette Andrews, Fay P. Andrus, Mandie M. Bentley, C. Kimball Bott, Tom Child, Nate Gines, Colleen Hinckley, Eric P. Johnsen, Susan Lofgren, Scott M. Mooy, Mark W. Robison, Brad Teare, K. Nicole Walkenhorst

Coordinator sa Intellectual Property:

Collette Nebeker Aune

Tigdumalang sa Produksyon: Jane Ann Peters

Team sa Produksyon: Kevin C. Banks, Connie Bowthorpe Bridge, Julie Burdett, Bryan W. Gygi, Denise Kirby, Ginny J. Nilson, Gayle Tate Rafferty

Prepress: Jeff L. Martin

Direktor sa Pag-imprinta: Craig K. Sedgwick

Direktor sa Pagpang-apud-apod: Stephen R. Christiansen

Paghubad: Francisco M. dela Cruz

Ipadala ang subskripsyon, mga pangutana, ug mga taho ngadto sa *Dateline Philippines* sa *Liahona*, The Church of Jesus Christ of Latter-day Saints, Temple Drive, Greenmeadows Subdivision, Quetzon City 1110, Metro Manila, Philippines o sa P. O. Box 1505, Ortigas Center, Emerald Avenue, Pasig 1600, Metro Manila, Philippines. Numero sa telepono 635-9183. Presyo sa subskripsyon sa Pilipinas, P48 matag tuig, P4.00 matag gula, gawas sa mga espesyal nga isyu.

Sa pag-subscribe ug pag-renew sa magasin, bisitahin ang <http://store.lds.org>. Paliug ayaw kalimiti sa pagbutang sa imong ward/branch isip address asa ipadala ang imong subskripsyon.

Kon dunay mga pangutana mahitungod sa subskripsyon paliug tawag sa Church's Global Service Center (GSC) sa 1800-8-680-3950 alang sa mga subscriber sa PLDT ug Smart o 1800-1-441-0687 alang sa mga subscriber sa Globe.

Isumiter ang mga manuskrito ug mga pangutana online sa liahona.lds.org; kon ipadala ngadto sa *Liahona*, Room 2420, 50 East North Temple Street, Salt Lake City, UT 84150-0024, USA; o i-e-mail sa: liahona@dschurch.org

Liahona (usa ka termino sa Basahon ni Mormon nga nagpasabut nga "kompas o direktor") gimantala sa Albanian, Armenian, Bislama, Bulgarian, Cambodian, Cebuano, Chinese, Chinese (simplified), Croatian, Czech, Danish, Dutch, English, Estonian, Fijian, Finnish, French, German, Greek, Hungarian, Icelandic, Indonesian, Italian, Japanese, Kiribati, Korean, Latvian, Lithuanian, Malagasy, Marshallese, Mongolian, Norwegian, Polish, Portuguese, Romanian, Russian, Samoan, Slovenian, Spanish, Swahili, Swedish, Tagalog, Tahitian, Thai, Tongan, Ukrainian, Urdu, ug Vietnamese. (Ang kasagad magkalahi sa pinulongan.)

© 2015 sa Intellectual Reserve, Inc. Tanang mga katungod gigahin. Gigamit sa Ang Simbahan ni Jesukristo sa mga Santos sa Ulahing mga Adlaw nga may pagtugot. Gi-imprinta sa Tinipong Bansa sa Amerika. Gi-imprinta sa Pilipinas.

Ang teksto ug biswal nga materyal diha sa *Liahona* mahimong kopyahan alang sa sulagma, dili pangkomersyo nga paggamit sa simbahan o panimalay. Ang biswal nga materyal dili mahimong kopyahan kon kini adunay mga pagdili diha sa linya sa kredito sa maong artwork. Ang mga pangutana kinahanglan ipadala ngadto sa Intellectual Property Office, 50 East North Temple Street, Salt Lake City, UT 84150, USA; e-mail: cor-intellectualproperty@ldschurch.org.

For Readers in the United States and Canada:

March 2015 Vol. 18 No. 3. LIAHONA (USPS 311-480) Cebuano (ISSN 1096-5114) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send all UAA to CFS (see DMIM 707.4.12.5). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.

Mga Ideya sa Family Home Evening

Kini nga isyu naglangkob og mga artikulo ug mga kalihokan nga mahimong magamit alang sa family home evening. Ang mosunod mao ang duha ka mga ideya.



“Kon ang mga Pagduha-duha ug mga Pangutana Motumaw,” pahina 38: Human og basa niining artikulo, ikonsiderar sa paghigut isip pamilya ang kalainan sa mga pangutana ug pagduha-duha. Basaha ang kasaysayan sa mga tawo diha sa kasulatan kinsa adunay mga pangutana ug unsay ilang gibuhat kabahin niini (sama pananglit, 1 Nephi 11; Ether 2:19–3:16; Joseph Smith—Kasaysayan 1:10–19; o ang mga pakisayran nga anaa sa endnote 1 sa artikulo).

Mahimo mo nga mohangyo sa pipila ka sakop sa pamilya sa pagpangutana. Dayon gamita ang kasulatan, lds.org/topics, o personal nga mga kasinatian sa pagtubag. Ang pagpalambo og palibut sa pagkadayag ug pagkamatinuoron sa panimalay makatabang sa mga sakop sa pamilya nga mobati nga komportable sa pagpangutana.

“Pag-andam alang sa Pasko sa Pagkabanhaw,” pahina 70: Sa dili pa mag-family home evening, mahimo mo nga mosulat sa pipila ka mga hagit matag adlaw diha sa ginunting nga mga papel. Sama pananglit, “Mibati mo og kasuko sa dihang ang inyong igsoong lalaki dili mopakigbahin sa iyang mga dulaan ninyo,” o “Nakamatikod ka nga usa ka gabii si papa nagguol sa iyang pag-uli gikan sa trabaho.” Hangyog ang mga bata sa pagpuli-puli og pili sa ginunting nga papel, basahon ang sitwasyon, ug mosugyot kon unsang paagi sila mahisama sa Manluluwas niana nga sitwasyon. Ipailaila ang kalihokan sa Pasko sa Pagkabanhaw niining artikulo ug dapita ang tanan ninyong mga anak sa pagdawat sa pito ka adlaw nga hagit sa pagkat-on kabahin ni Jesukristo ug sa pagsunod sa iyang ehemplo.

SA INYONG PINULONGAN

Ang *Liahona* ug ubang mga materyal sa Simbahan anaa sa daghang pinulongan sa languages.lds.org.

MGA HILISGUTAN NIINI NGA ISYU

Ang mga numero nagrepresentar sa unang pahina sa artikulo.

Adlawng Igpapahulay, 78

Babaye, mga, 32

Basahon ni Mormon, 16, 77

Grasya, 52

Gugma, 44

Hugot nga Pagtuo, 14, 32, 38

Jesukristo, 4, 7, 32, 52, 70, 74

Kabubut-on, 24, 60

Kagawasan, 16

Kahupayan, 4, 14

Kinatibuk-ang komperensya, 45, 69

Misyonaryo nga buhat, 50, 52, 56, 58, 60, 62

Pag-ampo, 16, 42

Paghinulsol, 28, 50

Pagkaginikanan, 10, 46

Pagkakabig, 50

Pagkamasulundon, 16, 24, 28, 38, 45

Pagpadayag, 38, 69, 80

Pagpahiuli, 80

Pagpamatuod, 38, 50, 74, 77

Pagsulay, mga, 14, 42

Pagtuon sa kasulatan, 43, 77, 74

Pag-ula, 4, 52, 70

Pailub, 7

Pamilya, 10, 14, 46

Panaghigala, 66, 72

Panulundon, 13

Pasko sa Pagkabanhaw, 32, 70

Propeta, mga, 45, 80

Sekreto, mga, 66, 68

Serbisyo, 44, 72



**Ni Presidente
Dieter F. Uchtdorf**

Ikaduhang
Magtatambag sa
Unang Kapangulohan

GILIYOKAN SA Iyang Malumo nga mga Bukton

Sama sa uban, kanunay ko nga madasig sa maanindot nga mga buhat sa art ug musika. Kausa sa dihang nagbarug ko sa atubangan sa nindot kaayong painting nga hinimo sa usa ka Danish artist nga si Frans Schwarz nga giulohan og *The Agony in the Garden* [*Ang Paghingutas diha sa Tanaman*].¹

Kining makapatandog nga painting naghulagway sa Manluluwas nga nagluhod diha sa Tanaman sa Getsemani. Samtang Siya nag-ampo, usa ka anghel nagbarug tapad Kaniya, nagliyok Kaniya sa malumong mga bukton, naghupay, balaanong nagtabang, ug nagsuporta.

Kon mas dugay kong mamalandong niining painting, ang akong kasingkasing ug hunahuna mas matandog sa dili mahulagway nga mga pagbati sa kalumo ug pasalamat. Akong mabati, sa daklit lang, kon unsa kahay bation nga maanaa sa dihang ang Manluluwas misugod sa Iyang talagsaong panapos nga buhat sa pagkamortal pinaagi sa Iyang pagdala sa mga sala sa kalibutan. Nahingangha ko sa walay katapusang gugma ug kalooy sa Amahan para sa Iyang mga anak. Nasanapan ko uban sa dakong pagpasalamat sa unsay gibuhad sa walay sala nga Anak para sa tanang katawhan ug kanako.

Ang Sakripisyo sa Anak sa Dios

Matag tuig niining higayona atong hinumduman ug pamalandungan ang gihimong sakripisyo ni Jesukristo sa tanang katawhan.

Ang gibuhad sa Manluluwas gikan sa Getsemani ngadto sa Golgota para kanato dili gayud nako hingpit nga masabtan. Iya Mismong gidala ang gibug-aton sa atong mga sala ug mibayad sa mahangturon ug gikinahanglang paglukat dili lang sa orihinal nga kalapasan ni Adan apan sa mga sala ug kalapasan usab sa binilyon nga mga kalag kinsa nabuhi. Kining mahangturon, sagradong sakripisyo nakapahimo “gani sa Dios, ang labing halangdon sa tanan, sa pagkurog tungod sa kasakit, ug sa pag-agas sa dugo sa matag lungag sa panit, ug sa pag-antus sa lawas ug sa espiritu” (D&P 19:18).

Nag-antus Siya alang kanako.

Nag-antus Siya alang kaninyo.

Naghingapin sa pagpasalamat ang akong kalag sa dihang namalandong ko sa bililhong kahulugan niining sakripisyo. Nakapahimo nakong mapainubsanon ang masayud nga ang tanan nga modawat niining gasa ug motanyag sa ilang kasingkasing ngadto Kaniya mapasaylo ug malimpyohan sa ilang mga sala, bisan unsa pa sila ka makasasala o kagrabe sa ilang palas-anon.

Kita mahimong walay sala ug maputli pag-usab. Kita matubos sa mahangturon sakripisyo sa atong pinalanggang Manluluwas.

Kinsa ang Mohupay Kanato?

Bisan tuod walay usa kanato ang makasinati sa kalawmon sa giantus sa atong Ginoo, kitang tanan adunay



Siya mas labaw pa kaysa anghel ngari kanato.

Siya mohatag kanato og kahupayan, pag-ayo, paglaum, ug kapasayloan.

Kay Siya ang atong Manunubos.

Atong Tigluwas.

Atong maloloy-on nga Manluluwas ug atong bulahan nga Dios. ■

MUBO NGA SULAT

1. Ang pari nga namulong sa haya ni Frans Schwarz miingon “ang iyang art balaanong gituga ug mas angay kaysa daghang mga pagwali” (Emmilie Buchanan-Whitlock, “History of Artists’ Lives Gives Greater Context for Exhibit,” *Deseret News*, Sept. 29, 2013, deseretnews.com).

kaugalingong kalisud ug pait nga mga higayon—mga panahon diin ang atong kaguol ug kasubo maingon og mas sobra pa kaysa atong maagwanta. Adunay mga panahon diin ang gibug-aton ug pagmahay sa atong mga sala walay kaluoy nga mohasol gyud kanato.

Bisan pa, kon atong ihalad ang atong kasingkasing ngadto sa Ginoo nianang mga panahona, sigurado nga Siya masayud ug makasabut. Siya sa walay paghunahuna sa kaugalingon nag-antus para kanato diha sa tamanan ug sa krus dili gyud mobiya

kanato karon. Siya molig-on, modasig, ug mopanalangin kanato. Siya moliyok kanato sa Iyang malumo nga mga bukton.

PAGTUDLO NIINI NGA MENSAHE

Sa dili pa mo motudlo, tinguhaa ang paggiya sa Espiritu sa pagtabang kaninyo sa pagsabut sa pihong mga panginahanglan niadtong inyong gitudloan. Samtang kamo mopakigbahin og mga kinutlo gikan sa mensahe ni Presidente Uchtdorf, pagpamatuod kabahin sa Manluluwas ug sa iyang matubsanong pagsakripisyo. Ikonsiderar sa pagpangutana niadtong inyong gitudloan kon unsay kahulugan sa iyang Pag-ula ngadto kanila ug giunsa nila pagbati ang paghupay sa Ginoo panahon sa ilang “kalisud ug pait nga mga higayon.”

Kadaugan pinaagi ni Jesukristo

Pangalan gipugngan

Ako may problema nga sobra ra nga mokaon. Ang akong pagsige of kaon nga hinakog miresulta sa grabeng kahasol sa konsensya, kasagmuyo, ug kahigawad. Mibati ko nga huyang kon mosulay ko sa pagbuntog sa akong problema.

Sa dugay nga panahon akong gibaliwala ang kamatuoran nga ang Pag-ula sa Manluluwas dili lang moluwas kanato



apan motubos ug mohingpit usab kanato, ug kini magamit sa klaro nakong batasan nga sobrang mokaon.


Mihukom ko nga akong itugyan ang akong kaugalingon sa Manluluwas. Nag-ampo ko. Matinud-anon nakong giangkong ang akong mga kahuyang ug panginahanglan sa grasya, ug dayon mihangyo ko sa Langitnong Amahan sa pagpanalangin kanako uban sa Iyang balaanong tabang sa umaabut nga adlaw. Nianang gabhiuna nabati nako ang kasiguradoan sa mahigugmaong Amahan nga Siya adunay dili masukod nga tinguha sa pagtabang sa Iyang anak ug dili maduha-duhaan nga gahum sa pagtuman sa Iyang kabubut-on.

Sukad nianang gabhiona, ang pagkaon wala nay sama ka dako nga impluwensya ngari kanako. Nasayud ko nga si Jesukristo mao ang rason sa akong kalampusan. Sama ni Pablo, nakakat-on ko nga “mahimo ko ang tanang butang pinaagi kang Kristo nga nagapalig-on kanako” (Mga Taga-Filipos 4:13). Ug naningkamot ko nga dili gyud makalimtan ang laing leksyon gikan ni Pablo: “Salamat sa Dios nga mao ang nagahatag kanato sa kadaugan pinaagi sa atong Ginoong Jesukristo” (1 Mga Taga-Corinto 15:57).

MGA BATA

Ang Ginoo Mohupay Kaninyo

Pangutan-a ang usa ka sakop sa pamilya o higala sa higayon diin iyang nabati nga gihupay siya sa Manluluwas. Paghunahuna og panahon diin ang Manluluwas mihupay kaninyo. Mahimo ninyong i-drawing kini nga kasinatian ug ibitay kini sa tungod sa inyong higdaanan aron sa pagpahinumdom kaninyo nga si Jesukristo kanunay anaa aron sa pahupay kaninyo.



Tun-i sa mainampuong paagi kini nga materyal ug tinguhaa nga masayud unsa ang angay nga ipakigbahin. Sa unsang paagi ang pagsabut sa kinabuhi ug tahas sa Manluluwas makapalampo sa inyong hugot nga pagtuo diha Kaniya ug mopanalangin niadtong inyong giamuma pinaagi sa visiting teaching? Alang sa dugang nga impormasyon, adto sa reliefsociety.lds.org.

Mga Kinaiya ni Jesukristo: Mainantuson ug Mapailubon

Kini kabahin sa sunod-sunod nga mga Mensahe sa Visiting Teaching nga naghulagway sa mga kinaiya sa Manluluwas.

Ang pailub kanunay nga gihunahuna nga hilom, pagkawalay pagtagad nga kinaiya, apan sama sa giingon ni Presidente Dieter F. Uchtdorf, Ikaduhang Magtatambag sa Unang Kapanguloan, “Ang pailub dili ang pagkawalay pagtagad, ni kini kapakyas sa pagbuhat tungod sa atong mga kahadlok. Ang pailub nagkahulugan nga aktibong maghulat ug maglahutay. Nagkahulugan kini nga magpabilin uban sa usa ka butang . . . bisan kon ang mga tinguha sa atong mga kasingkasing malangan. Ang pailub dili lamang ang paglahutay; kondili paglahutay ug maayo!”

Sa atong kinabuhi sa wala pa dinhi sa yuta, ang atong Langitnong Amahan nag-andam og plano para kanatong tanan—Iyang espiritu nga mga anak—ug kita misinggit sa kalipay sa oportunidad nga makaanhi sa yuta (tan-awa sa Job 38:7). Samtang atong ipahiangay ang atong kabubut-on ngadto sa Iyang kabubut-on sa atong kinabuhi dinhi sa yuta, Siya “mohimo og usa ka himan [kanato] sa [Iyang]

Ikonsiderar Kini

Gikan sa asoy sa Lucas 8, sa unsang paagi ang pagpailub niining babaye sa daghang katuigan ug dayon ang iyang hugot nga pagtuo diha kang Jesukristo nagantihan?



mga kamot ngadto sa kaluwasan sa daghan nga mga kalag” (Alma 17:11).

Si Presidente Uchtdorf mipadayon, “Ang pailub nagpasabut sa pagdawat niana nga dili mausab ug pag-atubang niini uban sa kaisug, kalumo, ug hugot nga pagtuo. Kini nagpasabut sa pagka ‘mauyunon sa pagdawat sa tanan nga mga butang diin ang Ginoo makakita nga angay ipahamtang ngari [kanato], bisan ingon sa usa ka bata nga motugyan sa iyang kaugalingon ngadto sa iyang amahan’ [Mosiah 3:19]. Sa kaulahian, ang pailub nagpasabut nga pagka ‘hugot ug makanunayon, ug dili matarug sa paghupot sa mga sugo sa Ginoo’ [1 Nephi 2:10] matag oras sa matag adlaw, bisan kon lisud kini nga buhaton.”¹

Dugang nga mga Kasulatan

Salmo 40:1; Mga Taga-Galacia 5:22–23; 2 Pedro 1:6; Alma 17:11

MUBO NGA SULAT

1. Dieter F. Uchtdorf, “Ipadayon ang Pailub,” *Liahona*, Mayo 2010, 57, 59.



Hugot nga Pagtuo, Pamilya, Kahupayan

Gikan sa mga Kasulatan

Ang mga kasulatan naghisgot kanato nga sa atong kinabuhi sa yuta, kita kinahanglang “[m]ag-pailub sa mga kasakit, kay [kita] makabaton og daghan.” Dayon ang Dios mihatag niining makapahupay nga saad, “Lahutay kanila, kay, tan-awa, Ako anaa uban kanimo, gani ngadto sa katapusan sa imong mga adlaw” (D&P 24:8).

Ang mosunod nga istorya sa Biblia usa ka ehemplo sa pailub ug hugot nga pagtuo.

“Ug ang usa ka babaye nga gitalinug-an sulod na sa napulog duha ka tuig . . . mihikap sa borlas sa sapot [ni Kristo]: ug diha-diha mitang-on [mihunong] ang iyang talinugon.

“Ug si Jesus miingon, . . . May mihikap kanako: kay gibati ko nga may gahum nga migula kanako.

“Ug sa pagtan-aw sa babaye nga wala man diay siya malilong, siya miduol nga nagkurog, ug sa naghapa siya sa iyang atubangan, gisugilon niya sa atubangan sa tanang tawo ang hinungdan sa iyang paghikap kaniya, ug ang iyang pagkaayo diha-diha.

“Ug si Jesus miingon kaniya, Anak, ang imong pagsalig nakapaayo kanimo; lumakaw ka nga malinawon” (Lucas 8:43–48).

Sama kaniya, kita makakaplag og mga panalangin ug kahupayan, ug gani pag-ayo, samtang kita moduol kang Jesukristo—kansang Pag-ula makaayo kanato.

NOTEBOOK SA KOMPERENSYA SA OKTUBRE 2014

“Unsa nga Ako ang Ginoo namulong Ako namulong; . . . bisan pinaagi sa akong kaugalingon nga tingog o pinaagi sa tingog sa akong mga sulugoon kini managsama ra” (D&P 1:38).

Samtang kamo magribyu sa kinatibuk-ang komperensya sa Oktubre 2014 inyong magamit kining mga pahina (ug mga Notebook sa Komperensya sa umaabut nga mga isyu) aron sa pagtabang kaninyo sa pagtuon ug paggamit sa bag-o nga mga pagtulun-an sa buhi nga mga propeta ug mga apostoles ug ubang mga lider sa Simbahan.

MGA HIGHLIGHT SA DOKTRINA



Pag-atiman sa mga Kabus ug Timawa

“Usa ka tigmantala mikwestyon ni Mother Teresa of Calcutta bahin sa walay paglaum niyang tahas sa pagluwas sa mga timawa niana nga siyudad. Miingon siya nga, sa estatistikal nga pagkasulti, siya wala gyuy nahimong kalampusan. Kining talagsaong gamayng babaye walay pagpanukong mitubag nga bahin sa gugma ang iyang trabaho, dili sa estatistika. . . . Miingon siya nga matuman niya ang mga sugo sa paghigugma sa Dios ug sa iyang silingan pinaagi sa pagserbisyo *kutob* sa iyang mahimo nga siya aduna . . . Ang tigmantala nakasabut nga ang Kristyanismo dayag nga *dili* usa ka estatistikal nga paningkamot. . . .

Busa unsaon man nato aron “atong mahimo ang kutob sa atong mahimo?” . . .

“ . . . Niana nga bahin, akong personal nga pasidunggan si Presidente Thomas Spencer Monson. . . . Ang iyang imahe nga akong mahalon hangtud sa akong kamatayon mao siya nga mipauli nga nagtsinelas gikan sa nagun-ob nga East Germany kay iyang gihatag dili lang ang sobra niya nga coat ug sinina apan iyang gihubo ang iyang sapatos.”

Elder Jeffrey R. Holland sa Korum sa Napulog Duha Ka mga Apostoles, “Dili ba Kitang Tanan mga Makililimos?” *Liahona*, Nob. 2014, 40, 41, 42.

PROPETIKANHONGSAAAD



Langitnong mga Panalangin

“Tingali panahon sa [kalisud], tingali makapangutana kita, ‘Kinahanglan ba natong sundon ang *tanang* mga sugo sa Dios?’

“Yano ang akong tubag niini nga pangutana:

“Nagtuo ko nga ang Dios nasayud sa usa ka butang nga wala nato masayri—mga butang nga labaw pa sa atong kapasidad sa pagsabut! Ang Atong Amahan sa Langit usa ka mahangturong binuhat kansang kasinatian, kaalam ug salabutan labaw pa kay sa atoa. Tan-awa sa Isaias 55:9 . . .

“Kabahin sa atong hagit mao, sa akong hunahuna, nga atong hunahunaon nga gisirad-an sa Dios ang iyang tanang panalangin sa kalangitan, dili kini ihatag nato gawas kon kita mosunod sa higpit, inamahan nga mga gikinahanglan nga iyang ipatuman. Apan ang mga sugo dili gayud ingon niana. Ang tinuod, ang Langitnong Amahan kanunayng nagbu-bu nato og mga panalangin. Ang atong kahadlok, pagduha-duha, ug sala, sama sa payong, ang nakaali niining mga panalangin.

“Ang iyang mga sugo mao ang mahigugmaong mga instruksyon ug balaanong tabang sa pagtak-op sa payong, aron kita makadawat sa kanunayng gi-bu-bu nga langitnong mga panalangin.”

Presidente Dieter F. Uchtdorf, Ikaduhang Magtatambag sa Unang Kapangulohan “Pagsunod sa Ebanghelyo nga Malipayon,” *Liahona*, Nob. 2014, 121–22

Sulati ang Blangko

1. "Kon _____ ta sa sayop nga mga pagpili, dako o gamay, nga dili uyon sa gipahiuli nga ebanghelyo, mawala ang panalangin ug proteksyon nga atong gikinahanglan." (Quentin L. Cook, "Maalamong Mopili," 48.)
2. "Sumala sa mga sumbanan sa kalibutan, ang pagsunod sa propeta mahimong dili popular, sayop ug dili madawat sa politikanhon ug sosyal nga paagi. Apan ang pagsunod sa propeta kanunay _____." (Carol F. McConkie, "Pagpuyo sumala sa mga Pulong sa mga Propeta," 78.)
3. "Ang pagpaubos sa mga sumbanan sa Ginoo ngadto sa lebel sa dili angay nga kinaiya sa katilingban usa ka _____." (Lynn G. Robbins, "Hain ka Nag-atubang?" 10.)
4. "Ang hingpit nga _____ anaa sa kalibutan nga padayong nagpugong ug nagbaliwala niini. Moabut ang adlaw, 'matag tuhod [kinahanglang] magapiko' ug 'matag dila [kinahanglang] magasugid nga ang Ginoo si Jesukristo (Taga-Filipos 2:10–11)." (David A. Bednar, "Dali ug Tan-awa," 110.)

Usa ka Himan alang sa Inyong Panimalay

Pagtimbang-timbang sa "inyong personal nga paggamit sa matag himan; dayon tinguhaa ang giya sa Ginoo aron matino kon unsaon nga mas

magamit ninyo ang matag usa niini." —Elder Richard G. Scott, "Himoa nga ang Paggamit sa Hugot nga Pagtuo Inyong Unang Prayoridad," 93.

1. Pag-ampo
2. Pagtuo sa Kasulatan
3. Family Home Evening
4. Pagtambong sa Templo



Mga tubag: 1. mangatarungan; 2. husto; 3. apostasiya; 4. kamatuoran

Sa pagbasa, pagtan-aw o pagpaminaw sa mga pakigpulong sa kinatibuk-ang komperensya bisitaha ang conference.lds.org

NAGHISGOT MAHITUNGOD SA LISUD NGA MGA HILISGUTAN

Ni Sheree Lyn Clarke

Clinical psychologist, LDS Family Services

Kon ang inyong mga anak nag-atubang og mga hagit, importante nga makig-istorya kanila sa paagi nga makapalig-on sa inyong relasyon uban kanila.

Isip usa ka ginikanan, kamo nasayud sa bili sa mga hagit ug pagsulay sa pagtubo sa inyong mga anak, apan lisud gihapon nga magtan-aw sa mga pakigbisog sa inyong mga anak. Kining mga pakigbisog, hinoon, mahimong usa ka kahigayunan alang kaninyo sa pagtukod og lig-on nga relasyon uban sa inyong mga anak samtang kamo magpasiugda og gugma diha sa panimalay. Si Presidente Gordon B. Hinckley (1910–2008) miawhag sa mga ginikanan sa paghatag og ingon nga kahimtang: “Ang akong hangyo—ug ako manghinaut nga mas maayo ang pagkasulti niini—mao ang pagpangamuyo sa pagluwas sa mga bata. Daghan kaayo kanila naglakaw sa kasakit ug kahadlok, sa kamingaw ug kasagmuyo. Ang mga bata nagkinahanglan og kahayag. Nagkinahanglan sila og kalipay. Nagkinahanglan sila og gugma ug pag-amuma.”¹

Adunay daghang lisud nga mga isyu nga atubangon sa inyong mga anak, sama sa pagpangdaug-daug, ngil-ad nga pinulongan, pagpanikas sa eskwelahan, pagkadani sa sama og sekso, dili tarung nga pagkaon, depresyon, ug paghunahuna nga maghikog, pananglit. Isip usa ka ginikanan nga Santos sa Ulahing mga Adlaw, kamo nasayud nga kamo “adunay sagrado nga katungdanan sa pag-amuma sa

inyong mga anak sa paghigugma ug pagkamatarung,”² apan unsaon ninyo sa pagbuhat niana kon ang inyong mga anak nakigbisog sa lisud nga mga problema, bisan sa ilang kaugalingon nga kinabuhi o sa kinabuhi sa ilang mga higala? Ania ang pipila ka mga sumbanan:

Pangutana og mga pangutana nga makadapit og panag-istoryahanay. Makapangutana kamo sama niini: “Ingon og dunay butang nga nakasamok nimo. Gusto ba nimo nga maghisgot mahitungod niini?” Kini nga pangutana wala lang miila nga kamo nakabantay nga dunay butang nga nakasamok sa inyong anak, apan kini usab nag-abli sa pultahan alang sa inyong anak sa pagpakigbahin sa tanan (o gamay) kon gusto niya.

Human mipakigbahin ang inyong anak sa pipila ka mga hunahuna mahitungod sa isyu, ang inyong tubag mahimong: “Salamat sa pagpakigbahin niana uban kanako, ug salamat sa pagsalig kanako niini nga impormasyon. Makahunahuna ko kon unsa kana kalisud. Sa unsang paagi ako makatabang?”

Kini nga matang sa mahigugmaong mga tubag ingon og moabli sa pultahan sa padayon nga panag-istorya. Importante nga ang mga anak maka-hibalo sa inyong pagkasinero. Ang

paggakos o mahigugmaong tinan-awan makatabang usab sa pagpahayag og tinu-oray, kinasingkasing nga mga kabalaka.

Paminaw aron makasabut. Si Elder Russell M. Nelson sa Korum sa Napulog Duha ka mga Apostoles miingon: “Ang panahon sa pagpaminaw mao ang panahon kon dunay nagkinahanglan nga paminawon. Ang mga bata natural nga ganahan nga mopakigbahin sa ilang

mga kasinatian. . . . Kon sila maningkamot sa pagpahayag sa ilang kasakit, posible ba nga kita bukas nga maminaw sa makapakugang nga kasinatian nga kita dili magpakita nga nakugang? Mahimo bang maminaw kita nga dili mobalda ug dili mohimo og kalit nga mga paghukom nga nagsira sa pultahan sa panag-istorya? Magpabilin kini nga bukas uban sa makahupay nga kasiguroan nga kita mituo kanila ug nakasabut sa ilang mga pagbati. Ang mga hamtong kinahanglan dili magpakaaron ingnon nga ang kasinatian





wala mahitabo tungod kay gusto nila nga unta wala kini mahitabo.”³

Pagpakita og pagtahud. Ang mga kasulatan naghatag og maayo kaayo nga giya kon unsaon sa paghimo og usa ka palibut sa gugma ug pagtahud. Timan-i ang pipila sa importanting mga pulong sa Doktrina ug mga Pakigsaad 121:41–42: *pagdani* (dili pamugos), *pagkamainantuson* (dili diha-diha dayon, napugos sa pagtuman o kawalay pailub), *kalumo* (dili kusog, agresibo, grabe nga komunikasyon), *kaaghup* (dili garbo o tubag sa pagdominar),

pagkamabination (dili mapintas nga pagmanipular), ug sa *tiunay nga paghigugma* (tinuod, kinasingkasing nga mga pagpahayag sa gugma). Samtang atong palamboon ang atong pagkaka-big, “ang paagi sa atong pagtratar sa uban mahimong mag-anam kapuno sa pailub, kamabination, usa ka malumo nga pagdawat, ug usa ka tinguha nga mahimong usa ka positibo nga tahas sa ilang kinabuhi.”⁴

Likayi ang pagpanaway. Ang mga ginikanan nga Santos sa Ulahing mga Adlaw maningkamot sa

pagpahaum sa ilang kinabuhi sunod sa Manluluwas. Ang Iyang mga interaksyon puno sa gugma, pagsabut, ug tinud-anay nga pagpakabana. Bisan kon ang mga tawo nakahimo og seryoso nga mga sala, Siya mitawag sa paghinulsol apan wala manghimaraut (tan-awa sa Juan 8:3–11). Likayi ang pagpanaway sa inyong mga anak, nga maoy hinungdan sa ilang ubos nga pagtan-aw sa kaugalingon ug kulang sa pagsalig; hinoon, pangita ug hatagi og gibug-aton ang kaayo sa matag usa sa inyong mga anak.

Kontrolaha ang inyong kasuko.

“Kadtong mahinay sa kasuko labi pang maayo kay sa tawong gamhanan” (Proverbio 16:32), ug “[ang] espiritu sa panagbingkil . . . gikan sa yawa, kinsa mao ang amahan sa panagbingkil, ug siya nagkutaw sa mga kasingkasing sa mga tawo sa panagbangi uban ang kasuko” (3 Nephi 11:29). Ang kasuko makapawagtang sa Espiritu ug adunay potensyal nga makaguba sa delikado nga mga relasyon sa ginikanan ug anak. Sa kinatibuk-ang komperensya, si Presidente Hinckley miingon, “Ako mohangyo kaninyo sa pagkontrol sa inyong mga kasuko, pahiyom kamo, nga makapawala sa kasuko, isulti ang mga pulong sa gugma ug kalinaw, pagpasalamat ug pagtahud. Kon kamo mohimo niini, dili kamo magmahay sa inyong mga kinabuhi. Ang inyong relasyon sa kaminyoon ug sa pamilya mapreserbar. Mas magmalipayon kamo.”⁵

Lig-una ang relasyon. Kining tanang mga sugyot makatabang, apan kon dili kamo mahinumdom niini kon kamo anaa sa tunga-tunga sa usa ka malisud nga mga panag-istoryahanay uban sa inyong mga anak, yanong pangutan-a ang inyong kaugalingon, “Unsaon nako sa paggamit niini nga

sitwasyon uban sa akong anak isip oportunidad sa paglig-on sa among relasyon?” Dayon paminaw ug sunda ang inspirasyon nga inyong madawat.

Padayon sa pagpaningkamot.

Ang pagkaginikanan malisud kaayo, apan kamo magmalampuson kon magpadayon kamo sa pagpaningkamot. Si Presidente Howard W. Hunter (1907–95) mitanyag niini nga mga pulong sa pagdasig: “Ang usa ka malampuson nga ginikanan mao ang tawo nga naghigugma, usa ka tawo kinsa nagsakripisyo, ug usa ka tawo nga nag-atiman, nagtudlo, ug nanga-lagad ngadto sa mga panginahanglan sa usa ka anak. Kon kamo nakabuhat sa tanan niini ug ang inyong anak matinumnon gihapon o samokan o kalibutanon, mahimo usab nga kamo, bisan pa niana, magmalampuson nga mga ginikanan.”⁶ ■

Ang tagsulat nagbuyo sa South Africa.

MUBO NGA MGA SULAT

1. Gordon B. Hinckley, “Women of the Church,” *Ensign*, Nob. 1994, 54.
2. “Ang Pamilya: Usa ka Pamahayag ngadto sa Kalibutan,” *Liahona*, Nob. 2010, 129.
3. Russell M. Nelson, “Listen to Learn,” *Ensign*, Mayo 1991, 22.
4. Marvin J. Ashton, “The Tongue Can Be a Sharp Sword,” *Ensign*, Mayo 1992, 20.
5. Gordon B. Hinckley, “Mahinay sa Kasuko,” *Liahona*, Nob. 2007, 66.
6. Howard W. Hunter, “Parents’ Concern for Children,” *Ensign*, Nob. 1983, 65.

PAKIG-ISTORYA SA MGA TIN-EDYER

Ang pag-istorya mahitugod sa mga hagit malisud kaayo apan mas lisud pa uban sa mga tin-edyer, kinsa nanlimbasug sa paghimo sa ilang kaugalingong pagkatawo—dili magsalig sa ilang mga ginikanan. Ang mga batan-on nag-atubang og mga kalisud sa akademik, emosyonal, ug sosyal nga mga pagpamugos. Ang ilang pagtuo ug mga sistema sa hiyas usahay biaybiayon sa mga higala ug mga kaedad. Ang ilang relasyon uban sa ilang mga ginikanan mahimong delikado niining bahin sa ilang kalamboan, ug komon sa mga tin-edyer nga mobati nga naglibug, nag-inusara, nahingawa, walay kasiguroan, walay mahimo, nalahi, ug gani nagmasulub-on.

Ang mga ginikanan nga nakasabut ug sensitibo sa mga hagit sa kalamboan mas makatabang sa ilang mga tin-edyer sa matag higayon nga sila labing nagkinahanglan sa ilang mga ginikanan.



LOLO, AMAHAN

Ni Aaron L. West

Church Publishing Services

Hunahunaa ang 3,000 ka mga misyonaryo nga nagpundok sa dakong kwarto. Dos mil nuybe syintos nubentay nuybe kanila madasigong nag-istorya ug nagtan-aw sa samang dapit sa kwarto. Ang uban kanila nagkinto. Ang uban nangambak para daklit nga makakita ibabaw niadtong mga nagkinto. Ang uban nagpatong sa mga lingkuranang mapilo-pilo. Usa ka misyonaryo naglingkod sa lingkuranang mapilo-pilo, ang iyang mga siko gitukod sa mga tuhod, nagkaput ang mga kamot, nagdungo ang ulo.

Dili gyud tingali ingon niana ang nahitabo, apan mao kana ang akong nahinumduman. Mao kadto ang akong gibati. Ako kadto nga misyonaryo.

Kon inyong gihunahuna ang ek-sena, siguro naghunahuna mo nga ako nag-inusara o nagguol. Sa tinu-oray, nasinati nako ang usa sa pinakamalipayong panghitabo sa akong kinabuhi—usa ka higayon nga gibalik-balik nako og handum sukad niadto.

Anaa ko sa missionary training center sa Provo, Utah, nag-andam nga moserbisyo isip full-time nga misyonaryo sa Ecuador Quito Mission.



Si Presidente Gordon B. Hinckley (1910–2008), kinsa Unang Magtatambag sa Unang Kapangulohan niining higayona, miadto aron mamulong sa tanang misyonaryo sa MTC.

Pagkahuman na sa miting nga misugod ang kaguliyang. Nakamatikod ko nga ang mga tawo wala maglina padulong sa mga pultahan, busa nangutana ko sa laing elder kon unsay nahitabo.

“Ang apo ni Presidente Hinckley ania sa MTC,” miingon siya, “ug si Presidente Hinckley mibiya sa stand aron mogakos kaniya!”

Uban niana nga eksplasyon, ang elder mipatong sa iyang lingkuranan aron mas klarong makakita, misyagit,

“Wow! Dili ba nindot kaayo nga mahimo si Presidente Hinckley isip lolo?”

Gihigugma ug gitahud nako si Presidente Hinckley, ug ako nadasig sa iyang mensahe nianang adlaw. Apan nianang higayona nakahunahuna ko og usa ka butang nga nakapabilin nakong maglingkod kaysa mopatong. Taliwala niining mga nagmaya, naglingkod ko ug naghunahuna, “Siguradong nindot kaayo nga mahimong lolo si Presidente Hinckley. Apan dili nako ibaylo ang akong Lolo Felt o Lolo West para niya.” Mihangad ko ug mibati sa kainit sa dakong pagpasalamat samtang namalandong ko sa akong kabilin, sa akong pamilya.

Dayon nakahunahuna ko og lain, mas gamhanan kaysa una: “Gawas pa, anak ko sa Dios.” Nasayud ko nga ako, apo sa usa ka dentista ug factory supervisor, sama ra og bili sa usa ka apo sa propeta. Ngano? Kaming duha adunay sama nga Amahan sa Langit.

Ang ubang 2,999 ka misyonaryo sa wala madugay milakaw padulong sa mga pultahan niadtong dako nga kwarto. Miuban ko kanila, mas andam sa pagserbisyo sa Ginoo kaysa kaniadto. ■

ANG MATAG PAGSULAY MAKALIG-ON SA PAGTUO

Ni Giorgia Murgia

Isip siyete anyos nga bata, sa dihang akong nasayran nga ang akong amahan namatay tungod sa aksidente, nag-ampo ko og milagro.

Sa dihang bata pa ko, usa sa akong paborito nga bahin sa adlaw mao ang pagpaabut sa akong papa nga moabut gikan sa trabaho. Motan-aw ko sa bintana ug magtan-aw kaniya nga nagpadulong, ug akong iphon ang iyang mga lakang padulong sa balay, naghinam-hinam sa kalipay nga iyang dala. Wala ko magtuo nga magpakabuhi nga wala na kana nga pagbati.

Usa ka adlaw sa dihang siyete anyos pa ko, imbis nga ang akong amahan, may miabut nga tawo nga guol ang nawong nga nagbarug sa may pultahan ug miingon namo nga ang akong amahan namatay tungod sa aksidente.

Niadtong adlaw wala ko katingog. Akong gitan-aw ang akong kwatro anyos nga manghud nga lalaki ug akong inahan, nga bata pa kaayo

ug nag-inusara, ug wala ko mohilak. Wala ko maghunahuna nga kini tinuod, busa miadto ko sa may bintana ug mitan-aw sa dalan. Misugod ko sa pagbati og bug-at nga pwera nga midat-og sa akong mga abaga, bug-at nga pagbati nga dili ko normal nga makaginhawa, usa ka gibug-aton nga nakapaguol nako.

Wala madugay human sa kamatayon sa akong amahan, nag-inusara ko nga miadto sa kwarto sa nagkasalup nga adlaw ug, sama sa gitudlo kanako, nag-ampo sa akong Langitnong Amahan. Nangamuyo ko Niya nga makita nako pag-usab akong amahan, para lang makagakos kaniya. Sa akong kasingkasing sigurado ko nga ang Langitnong Amahan makahatag nako niining milagro.

Nianang adlaw wala ko makakita sa akong amahan o makagakos kaniya, apan mas sobra pa akong nadawat. Mora og akong nabati ang mga kamot sa Manluluwas nga anaa sa akong abaga. Ang iyang presensya ingon og hapit na makita samtang Iyang giwala ang bug-at nga pagbati diha sa akong dughan.

Karon, sobra na sa 20 ka tuig ang milabay, kana nga paghupay wala gayud mawala kanako. Usahay mibati



ANG MANLULUWAS MAKAAYO UG MAKALIG-ON

“Ug tungod sa Iyang walay katapusan ug mahang-turong sakripisyo (tan-awa sa Alma 34:14), [ang Manluluwas] adunay hingpit nga pagsabut ug makalugway ngari kanato sa Iyang bukton sa kalooy. Siya makakab-ot, makahikap, makaabag, makaayo, ug makalig-on kanato nga mahimong mas labaw kay

sa ato mismong mahimo ug makatabang kanato sa pagbuhat niana nga kita dili gayud makahimo nga nagsalig lamang diha sa atong kaugalingong gahum. . . .

“Ang talagsaon nga mga luwan sa atong matag kinabuhi nagtabang kanato sa pagsalig diha sa mga maayong buhat, kalooy, ug grasya sa Balaang Mesiyas (tan-awa sa 2 Nephi 2:8). Ako nagpamatuod ug nagsaad nga ang Manluluwas motabang kanato sa pagpas-an sa atong mga luwan uban sa kasayon (tan-awa sa Mosiah 24:15).”

Elder David A. Bednar sa Korum sa Napulog Duha ka mga Apostoles, “Makadaug sa Ilang mga Alantuson uban sa Kasayon,” *Liahona*, Mayo 2014, 90.



Karon, sobra na sa 20 ka tuig ang milabay, ang paghupay sa Manluluwas wala gayud mobiya kanako. Kadaghan ang Espiritu naghupay, nagtabang, ug nagpakita kanako sa pamaagi.

ko og kaguol apan dili kahaw-ang tungod sa pagkamatay sa akong amahan. Ako makahinumdom ug makakita kon kapila ang Espiritu naghupay, nagtabang, ug nagpakita kanako sa paagi aron masunod ang bililhong mga pamaagi sa Manluluwas. Akong mabati ang Iyang presensya sa akong kinabuhi, salamat niadtong una nga pagsulay, nga nagtabang nako nga makakita sa matag adlaw nga pagsulay uban sa mahang-turong panglantaw. Nasayud ko nga ang ebanghelyo sa atong kinabuhi ang nakapahimo nato nga mobati sa dili makita nga paghapuhap sa kamot sa Manluluwas.

Naminyo ko alang sa kahangturan, ug karon ang akong bana ug ako adunay tulo ka gagmayng anak nga mga babaye, kinsa nagpabati namo sa daklit nga kalangitan diha sa among

panimalay. Kon ako silang makita, magmaya ko sa kalinaw ug kahibalo nga ang matag kasub-anan, pagsulay, ug hagit sa ilang kinabuhi makamugna og mas dagkong pagtuo, bag-ong mga pagsaksi, ug talagsaong mga

milagro. Nagmaya ko sa kasiguradoan nga kon sila nanginahanglan og usa ka butang nga dili mahatag nako ug sa akong bana, sila mapanalipdan, mahupay, ug maluwas, sama nako. ■
Ang tagsulat nagpuyo sa Sardinia, Italy.

PAGKAT-ON GIKAN SA MGA PAGSULAY

Samtang importante nga mag-ampo para sa kalig-on ug tabang panahon sa mga pagsulay, importante usab nga mag-ampo aron makakat-on gikan sa mga pagsulay. Kamo makaampo alang sa “mata aron sa pagtan-aw, ug mga igdulungog sa pagpatalinghug” (Deuteronomio 29:4) sa malumo nga kalooy sa Ginoo ug grasya sa inyong kinabuhi (tan-awa sa Ether 6:12).

Ikonsiderar sa pagsulat sa inyong journal ang pipila sa mga leksyon nga inyong nakat-unan ug pipila sa mga ebidensya sa gugma sa Langitnong Amahan nga inyong nasinati panahon sa kalisud sa inyong kinabuhi.



MOBARUG ISIP MGA Saksi SA DIOS



**Ni Elder
Dallin H. Oaks**

Sa Korum sa
Napulog Duha ka
mga Apostoles

Isip mga “asin sa yuta,” kita nga mga Santos sa Ulahing mga Adlaw kinahanglan magpabilin sa atong lami pinaagi sa pagsunod sa atong tinuohan ug sa pagbarug nga mga saksi sa Dios.

Nagpuyo kita sa kalibutan diin daghan ang milimud sa Dios o sa kaimportante sa Iyang mga sugo. Manghinaut ko nga unsay akong isulti makatabang ninyo nga mas epektibo sa inyong katungdanan sa pagsaksi sa Dios ug sa paglihok alang sa kamatuoran ug pagkamatarung.

I.

Sugdan nako sa unang tulo sa atong Mga Artikulo sa Hugot nga Pagtuo:

“Kami nagtuo sa Dios, ang Amahan sa Kahangturan, ug sa Iyang Anak, si Jesukristo, ug sa Espiritu Santo.

“Kami nagtuo nga ang mga tawo pagasilotan sa ilang kaugalingon nga mga sala, ug dili tungod sa mga kalapasan ni Adan.

“Kami nagtuo nga pinaagi sa Pag-ula ni Kristo, ang tanan nga mga katawhan mahimo nga maluwas, pinaagi sa pagsunod sa mga balaod ug mga ordinansa sa Ebanghelyo” (Mga Artikulo sa Hugot nga Pagtuo 1:1–3).

Usa ka bantugang propeta sa Basahon ni Mormon mitudlo niining samang mga kamatuoran:

“Tuo sa Dios; tuo nga siya mao, ug nga siya ang milalang sa tanan nga mga butang, lakip sa langit ug sa yuta; tuo nga siya aduna sa tanan nga kaalam, ug tanan nga gahum, sa langit ug sa yuta; tuo nga ang tawo dili makasabut sa tanan nga mga butang diin ang Ginoo mahimo nga makasabut.

Ug usab, tuo nga kamo kinahanglan gayud maghinulsol sa inyong mga sala ug mobiya kanila, ug magpaubos sa inyong mga kaugalingon sa atubangan sa Dios; ug mangutana sa kinasingkasing nga siya mopasaylo kaninyo; ug karon, kon kamo motuo sa tanan niini nga mga butang tan-awa nga kamo mobuhat kanila” (Mosiah 4:9–10).

Agi og pagtandi, karon daghan ang molimud o magduha-duha nga adunay Dios ug miinsister nga ang tanang mga lagda sa kinaiya hinimo sa tawo ug mahimong dawaton o isalikway kon gusto.

Nganong ako namulong sa nag-unang mga kamatuoran sa pagkaanaay Dios ug sa katinuod sa hingpit nga balaod sa husto ug sayop nga nagdumala sa atong kinaiya? Usahay ang labing gikinahanglan nga mga butang nga atong matudlo mao ang mga butang nga gibaliwala lang nato. Kita mahimong mobaliwala sa yanong mga kamatuoran tungod kay kita nagdahum nga kini nasabtan sa tanan, apan wala. Kinahanglan gayud nga atong ipasabut og maayo ang sukaranang mga kamatuoran diin gibase ang atong mga gituohan. Sa katapusan, kini naglakip nga dunay Dios ug sa mahangturong reyalidad sa mga kamatuoran ug sa husto ug sayop nga gihulagway pinaagi sa Iyang mga pagtulun-an ug sa Iyang mga sugo.

II.

Ang paglimud sa Dios o sa pag-usab sa Iyang tahas sa tawhanong mga kalihokan nga gisugdan panahon sa Renaissance nahimong malukupon karon. Ang paghimaya sa tawhanong mga pangatarungan adunay maayo ug dautan nga mga epekto. Ang buhat sa siyensya dunay dili maihap nga mga kalamboan sa atong mga kinabuhi, apan ang pagsalikway sa balaan nga awtoridad isip katapusang basihan sa matarung ug sayop niadtong mipuli sa siyensya alang sa Dios nakapapangutana sa daghang relihiyoso nga mga tawo: “Nganong [ang] kabubut-on ni bisan kinsang bantugang mga pilosoper sa liberal nga tradisyon [o gani ang pagbuot sa bisan haing sanga sa Labawng Hukmanan sa Estados Unidos] . . . mas tukma sa moral nga mga desisyon kay sa kabubut-on sa Dios?”¹

Kadtong kinsa migamit sa tawhanong mga pangatarungan nga molabaw sa balaang mga impluwensya sa ilang kinabuhi nakapagamay sa ilang mga kaugalingon ug nakapaubos sa sibilisasyon sa pagbuhat sa ingon.

Ako mapasalamaton nga nasayud nga dunay duha ka mga pamaagi sa pag-angkon og kahibalo—ang siyentipekanhong paagi ug ang espirituhanong paagi, diin magsugod sa hugot nga pagtuo sa Dios ug pagsalig sa mga kasulatan, sa dinasig nga pagtudlo, ug sa personal nga pagpadayag. Walay panagsumpaki tali sa kahibalo nga naangkon pinaagi niining lain-laing mga pamaagi tungod kay ang Dios, ang atong labing gamhanan nga Amahan sa Kahangturang, nasayud sa tanang kamatuoran ug nagdasig kanato sa pagkat-on pinaagi niini.

Mga panagna sa ulahing mga adlaw nanagna sa dako nga oposisyon ngadto sa dinasig nga kamatuoran ug lihok. Ang pipila niini nga mga panagna kabahin sa mga anti-Kristo, ug ang uban naghisgot sa gamhanan ug salawayon nga simbahan.

Anti-Kristo

Si Apostol Juan migamit sa pulong nga anti-Kristo sa paghulagway sa usa ka tawo kinsa “dili moangkon sa Amahan ug Anak” (1 Juan 2:22). Karon kadtong molimud nga dunay Dios gitawag nga mga ateista. Pipila niini nagbiay-biay sa hugot nga pagtuo niadtong kinsa nagtuo sa unsay dili mahimong mapamatud-an, gani ingon nga sila agresibong molimud sa diosnon nga kinabuhi nga dili nila ikapanghimakak.

Kita nangandam sa ingon nga mga pagpanglimud ngadto sa Dios pinaagi sa istorya sa Basahon ni Mormon sa usa ka tawo nga ginganlan og Korihor. Sa mga pulong nga susama sa labing dili matuohon nga mga sinulat sa atong panahon, si Korihor, kaduha gitawag og “Anti-Kristo” (Alma 30:6, 12), mitudlo:

“Kamo dili masayud sa mga butang nga kamo dili makakita; busa kamo dili masayud nga dunay usa ka Kristo.

“Kamo naglantaw ug nag-ingon nga kamo nakakita og usa ka kapasayloan sa inyong mga sala. Apan tan-awa, kini mao ang sangputanan sa usa ka nagsalimoang nga hunahuna; ug kini nga pagkabuang sa inyong mga hunahuna moabut tungod sa mga tradisyon sa inyong mga amahan, nga midala kaninyo ngadto sa usa ka tinuohan sa mga butang nga dili mao” (Alma 30:15–16).

Si Korihor mipahayag usab “nga walay pag-ula nga gihimo alang sa mga sala sa mga tawo.” Ang iyang deskripsyon sa sangputanan sa iyang pagsalikway sa ideya sa sala ug sa usa ka Manluluwas susama kaayo sa pagtuo sa kadaghanan sa atong panahon: “Ang matag tawo makasinati niini nga kinabuhi sumala sa panglihok sa tawo; busa matag tawo mouswag sumala sa iyang kinaadman, ug nga ang matag tawo makadaug sumala sa iyang kusog; ug *bisan unsa ang buhaton sa tawo dili kalapasan*” (Alma 30:17; emphasis gidugang).

Moral Relativism

Karon atong gitawag ang pilosopiya ni Korihor nga moral relativism. Duha ka mga tigpaniid naghulagway niana nga pilosopiya sama sa mosunod: “Kon kalabut sa moral nga mga isyu walay husto o sayop nga mga tubag, walay dili angay o angay nga mga paghukom, ug walay resonable o rasyonal nga mga paagi diin makahimo og moral nga kalainan nga magamit sa matag panahon, sa matag dapit, ug sa matag tawo.”²

Mao kini ang pagtuo nga gigamit sa kadaghanan sa mga inila nga media ug sa pagtubag sa pagpamugos sa kaedad. “Biyai ang karaang mga lagda. Buhata unsay imong gibati nga maayo. Walay tulubagon lapas sa unsay gipahamtang sa balaod sa tawo o wala pag-uyon sa publiko niadtong madakpan.” Luyo sa mao nga mga ideya mao ang pagtuo nga walay Dios o, kon duna man, Siya wala mohatag og mga sugo nga magamit nato karon.



“Ang humanism makahimo sa tawo nga dios, ang gamhanan nga binuhat, ug ang edukado nga hunahuna sa tawo mahimong tighukom sa tanan nga tinuod, maayo ug matahum.”

Secular Humanism

Ang pagsalikway sa dili maprobahan nga Dios ug ang paglimud sa matarung ug sayop mao ang labing makadani sa kalibutan sa taas og edukasyon. Ang secular humanism, usa ka kategoriya sa humanism nga tingali ginganlan niini tungod kay duol ra kaayo sa secularism, gituyo o wala tuyoa nga nahulma diha sa mga pagtulun-an sa mga sakop sa faculty sa daghang mga kolehiyo ug mga unibersidad.

Alang sa relihiyosong mga tawo, ang wala maayuni nga elemento sa lain-laing mga pilosopiya sa humanism mao ang ilang pagsalikway nga dunay Dios ug ang ilang paglimud sa moral nga mga kamatuoran nga gibase sa Iyang mga sugo. Sa ingon, ang 1973 Humanist Manifesto misalikway sa “tradisyonal nga moral nga lagda” ug “tradisyonal nga kahigpit o kaestrikto sa mga relihiyon nga nagpahimutang sa Dios, ritwal, o doktrina labaw sa mga panginahanglan ug kasinatian sa tawo.” Dugang

kining namahayag, “Kita walay madiskobrehan nga balaang katuyoan . . . alang sa matang sa tawo. Ang mga tawo maoy responsable kon unsa kita o maunsa kita sa umaabut. Walay dios nga moluwas nato; kinahanglang luwason nato ang atong kaugalingon.”³

Siyempre, ang mga sumusunod sa humanism, nga gitawag nga mga humanist, nakahimo og daghang positibong kontribusyon. Sama pananglit, nagsuporta sila sa demokrasya, sa mga katungod sa tawo, ug materyal nga kauswagan. Basta kining mga kalamboan dili mosalikway sa mga tumutuo, ang atong isyu sa mga humanist mao ang ilang pagsalikway sa balaan nga awtoridad ug mga mithi.

Sama sa gisulat ni kanhi propesor sa pilosopiya sa BYU si propesor Chauncey Riddle, “Ang humanism makahimo sa tawo nga dios, ang gamhanan nga binuhat, ug ang edukado nga hunahuna sa tawo mahimong tighukom sa tanan nga tinuod, maayo ug



Si Nephi giingnan pinaagi sa pagpadayag nga dunay “duha ka mga simbahan”: “ang simbahan sa Kordero sa Dios” ug “ang simbahan sa yawa.”

matahum.” Siya usab nagpahinumdom nato nga ang humanism “gipaboran sa mga tigbalita sa kalibutan karon tungod kay kadaghanan sa mga tawo nga tigsulat, tigmantala, mga eskolar ug media mga humanist.”⁴

Daghan kinsa naglimud o nagduha-duha nga dunay Dios tingali mosalikway sa pilosopiya sa moral relativism. Ilang makita ang ilang kaugalingon nga dunay ilang kaugalingong mga sumbanan sa matarung ug sayop, bisan og ang hingpit nga mga sumbanan nga dili pinasikad sa pagtuo sa Dios lisud ipasabut. Ang mga secular humanist, kinsa pormal nga misalikway sa “tradisyonal nga relihiyusong moralidad” ug nagpahayag sa ilang pagsalig sa “mga pagsulay sa siyentipikanhong ebidensya”,⁵ ingon og pagtuman sa mga panagna sa Basahon ni Mormon niadtong “kinsa nagpuyo nga walay Dios dinhi sa kalibutan” (Mosiah 27:31).

Ang Dako ug Salawayon nga Simbahan ug ubang mga “Simbahan”

Ang mga panagna sa Basahon ni Mormon naghulagway sa “gamhanan ug salawayon nga simbahan sa tanan nga yuta, kansang magtutukod mao ang yawa” (1 Nephi 14:17). Kini nga “simbahan” gipanagna nga adunay

“kamandoan ibabaw sa tibuok yuta, taliwala sa tanan nga mga kanasuran, mga kaliwatan, mga pinulongan, ug mga katawhan” (1 Nephi 14:11). Gitawag nga “labing salawayon labaw sa tanan nga mga simbahan”, kini nga simbahan usab giingnan nga ganahan sa “pagdayeg sa kalibutan” sa pagdala “sa mga santos sa Dios . . . ngadto sa pagkabihag” (1 Nephi 13:5, 9).

Tungod kay walay relihiyon—Kristyano man o dili—nga dunay “kamandoan” sa tanang mga nasud sa yuta o kalagmitan sa pagdala sa tanang mga santos sa Dios ngadto sa “pagkabihag,” kining dako ug salawayon nga simbahan mas malukpanon ug mikatap kay sa usa lang ka “simbahan,” sama sa atong pagsabut niana nga pulong karon. Mao kini ang bisan unsa nga mga pilosopiya o organisasyon nga supak sa pagtuo sa Dios. Ug ang “pagkabihag” diin maoy gitinguha niini nga “simbahan” nga dad-on ang mga santos dili kaayo pisikal pagkapriso kon dili pagkabihag sa sayop nga mga ideya.

Si Nephi giingnan pinaagi sa pagpadayag nga duna lang “duha ka mga simbahan”: “ang simbahan sa Kordero sa Dios” ug “ang simbahan sa yawa” (1 Nephi 14:10; tan-awa usab sa 13:4–6). Kini nga deskripsyon nagsugyot sa kalainan tali niadtong kinsa

motuo sa Dios ug magtinguha sa pagserbisyo Kaniya sumala sa ilang labing maayo nga panabut ug niadtong kinsa mosalikway nga dunay Dios (tan-awa sa 1 Nephi 14:10).

Uban pang mga pagtulun-an sa Basahon ni Mormon naggamit usab sa pulong nga *simbahan* sa pagpakita og pagtuo o sa dili pagtuo sa Dios. Ang katapusang mga kapi-tulo sa 2 Nephi nanagna nga sa katapusang mga adlaw ang mga Hentil motukod og “daghan nga mga simbahan” nga “[mo]paubos sa gahum ug sa mga milagro sa Dios, ug nag-wali ngadto sa ilang mga kaugalingon sa ilang kaugalingon nga kaalam ug sa ilang kaugalingon nga kinaadman, nga sila unta makaangkon og mga bahandi ug manlupig diha sa mga kabus” (2 Nephi 26:20). Nagsulti sila sa “mga simba-han nga gitukod, ug dili ngadto sa Ginoo” (2 Nephi 28:3), nga “motudlo uban sa ilang kinaadman” ug “molimud sa gahum sa Dios” (2 Nephi 28:4, 5). Sila “moingon ngadto sa mga katawhan: Patalinghug ngari kanamo, ug paminaw kamo sa among lagda; kay tan-awa walay Dios karon” (2 Nephi 28:5).

Sa pagpangalagad sa Manluluwas sa mga Nephite, Siya mipasidaan batok sa usa ka simbahan nga wala “natukod sa akong ebanghelyo, [apan] natukod diha sa mga buhat sa mga tawo, o diha sa mga buhat sa yawa” (3 Nephi 27: 11; tan-awa usab sa pagtulun-an mahitungod sa “dako ug lapad nga gambalay” sa 1 Nephi 8:26–33; 11:35; ug 12:18). Kini nga pasidaan dili limitado sa relihiyoso nga mga organisasyon. Sa mga kahimtang sa atong panahon, sila naglakip sa daghang sekular nga mga pilosopiya ug mga kalihokan.

III.

Daghang mga tawo kinsa nagtuo sa Dios ug sa matarung ug sayop nga anaa tungod sa Iyang mga sugo makasinati og pagbiay-biay ug pagbugal-bugal gikan sa kalibutanon nga mga pagtulun-an ug sa paglimud sa Dios nga mahitabo sa daghang mga organisasyon, lakip ang mga institusyon sa edukasyon ug sa media. Ang maong gipanagna nga mga hagit giatubang sa nagkagamay nga gidaghanon sa ma-hadlukon sa Dios nga mga tawo nga nakigbahin sa atong pagtuo sa Dios ug sa matarung ug sayop nga anaa tungod sa Iyang mga sugo. Gibalik ra niini ang unsay diha na sa panahon sa Manluluwas.

Bisan kon kita “ginasakit sa tanang paagi”, kita “wala kawad-i sa paglaum” (2 Mga Taga-Corinto 4:8). Nasayud kita nga ang atong espirituhanong pagtubo nagkinahang-lan og “katugbang sa tanan nga mga butang” (2 Nephi 2:11). Nasayud usab kita nga ang Ginoo “nakakita nga angay ang pagpanton sa iyang mga katawhan; oo, siya mi-sulay sa ilang pailub ug sa ilang hugot nga pagtuo” (Mosiah 23:21). Apan ang mga kasulatan nagtudlo usab nga Siya moluwas niadtong kinsa mobutang sa ilang pagsalig diha

Kaniya (tan-awa sa 1 Samuel 17:37, 45–46; Salmo 34:22; Mga Proverbio 3:5–6; Alma 36:27; 38:5).

Mosugyot karon ako og tulo ka mga matang sa mga butang nga atong mabuhay agig tubag sa mga kahim-tang karon, nga magsugod sa unsay sayon. Kining tanan nagtubag sa pagtulun-an sa Basahon ni Mormon nga kita kinahanglan nga “mobarug ingon nga mga saksi sa Dios sa tanan nga mga panahon ug diha sa tanan nga mga butang, ug diha sa tanan nga mga dapit nga [kita] mahimo nga maanaa, bisan hangtud sa kamatayon” (Mosiah 18:9).

Pasidunggi ang Pangalan ug Impluwensya sa Dios

Gitudloan kita sa “pagtuo diha kang Kristo, ug dili mo-limud kaniya” (2 Nephi 25:29); sa “paghunahuna [ngadto ni Jesukristo] sa matag hunahuna; ayaw pagduha-duha, ayaw kahadlok” (D&P 6:36); ug “naghisgot kang Kristo,” “nalipay diha kang Kristo”, ug “nagsangyaw kang Kristo” (2 Nephi 25:26). Duha ka mga paagi nga kita makahimo niini mao ang diha sa atong pribado nga mga pag-ampo ug sa atong personal nga pagtimbaya.

Sa atong pribado ug pamilya nga pag-ampo, kita kina-hanglan nga mohangyo sa Dios sa pagtabang nato ug sa atong mga silingan ug mga lider nga makaila sa Dios ang atong Tiglalang ug sa matarung ug sayop nga giestablisar pinaagi sa Iyang mga sugo. Kinahanglan nga buhaton nato kini alang sa kaayohan sa Iyang mga anak bisan asa.

Kinahanglan usab nga kita mopahayag sa atong ka-ugalingon batok sa bag-ong kalihokan sa paglikay sa relihiyoso nga mga pakisayran bisan sa pribado nga komunikasyon. Sa bag-ong katuigan ang paglakip sa re-lihiyoso nga mga simbolo ug may balaang pagtahud nga mga pulong sa mga pagtimbaya sa Pasko ug sa mga kard sa simpatiya hapit na nawala. Kon kita mohimo og mga pagpili kabahin niini nga mga matang sa komunikasyon, kinahanglang dili kita moapil sa pagpapas sa sagradong mga pahinumdom gikan sa atong personal nga komu-nikasyon. Isip mga tumutuo, duna kitay katungdanan sa pagpreserbar sa pangalan ug impluwensya sa Dios ug ni Kristo sa atong pag-istoryahanay, atong mga kinabuhi, ug sa atong kultura.

Publikong Pag-ila sa mga Panalangin sa Dios

Suportahi ang publikong pag-ila sa mga panalangin sa Dios. Kini nagtinguha sa pagpakigbatok sa nagkagamay nga paghisgot sa relihiyusong pagtuo ug sa Dios ug sa Iyang mga panalangin sa atong mga pakigpulong sa pub-liko. Itandi, pananglit, ang mga dokumento sa publiko karon ug pinulongan sa mga lider sa gobyerno sa Esta-dos Unidos uban sa susama nga mga dokumento ug mga pulong sa mga lider atol sa unang duha ka mga siglo sa Amerika. Niana nga pagkatandi kamo adunay ebidensya

sa tinuyo nga paningkamot sa pagpapas sa mga paghisgot sa Dios ug sa impluwensya sa relihiyon sa pagkatukod ug pagkapreserbar sa Amerika.

Unsay atong mahimo mahitungod niini? Una, makapakita kita sa matarung nga ehemplo sa atong pamilya ug mga pagtulun-an sa Simbahan pinaagi sa pag-ila sa mga panalangin sa Ginoo sa atong mga kinabuhi ug sa atong mga nasud. Sa pagbuhat niini “diha sa kaalam ug kahusay” (Mosiah 4:27), kita kinahanglan dili molimud nga ang atong nasud naglakip ug napanalanginan pinaagi sa mga lumulupyo nga Judeo, Muslim, ug uban pang dili Kristyano nga tinuohan, ingon man sa mga ateista. Apan kita kinahanglan mamulong sa kamatuoran nga, sama pananglit, ang Estados Unidos natukod sa mga tawo ug mga lider kinsa kadaghanan mga Kristyano ug kinsa mihulma sa mga baruganan sa ilang hugot nga pagtuo diha sa Batakang Balaod, mga balaod, ug kultura sa nasud.⁶

Usa ka bag-ong artikulo ni Brother Clayton Christensen, propesor sa Harvard Business School ug usa ka kanhi Area Seventy, mi-insister nga relihiyon ang pundasyon sa demokrasya ug kauswagan. Nagpahinumdom siya nato nga ang demokrasya ug kapitalismo nagdepende sa tumang pagkamasulundon sa walay pugsanay ug nga kini kinahanglanon nagdepende sa relihiyon nga nagtudlo sa mga sukaranan sama sa “ang kaangayan sa mga katawhan, ang kaimportante sa pagtahud sa kabtangan sa uban, ug sa personal nga pagkamatinuoron ug kaligdong.” Ang secularism, nga nagtinguha sa pagpuli sa relihiyon nga gibase diha sa pagtuo sa Dios, walay gahum o programa aron makahatag sa unsay gitawag ni Brother Christensen nga “ang panginahanglan nga pundasyon sa tumang pagkamasulundon sa walay pagpugos.”⁷

Pakigbisog alang sa Gawasnong Pagsunod sa Relihiyon

Pakigbisog alang sa gawasnong pagsunod sa relihiyon. Mas lisud kini tungod kay nagkinahanglan kini og pagtinabangay sa mga tumutuo sa nagkalain-lain nga tinuohan. Diin ang gigarantiyahan sa gobyerno nga gawason nga pagsunod sa relihiyon anaa, kita kinahanglang moaghat sa mga opisyaes sa gobyerno sa pagtahud niadto nga mga garantiya. Dinhi akong ipasabut ang duha lamang ka mga ehemplo sa mga kabalaka karon.

Ang una naglakip sa pampublikong pag-ampo. Ang pag-ampo mahitabo kon ang mga tawo makigsulti sa Balaan nga Binuhat, bisan unsay ilang konsepto sa Dios ug bisan unsay ilang itawag Kaniya. Bisan unsa pay unod sa pag-ampo, nga magkalahi sumala sa pagtuo sa usa kinsa nag-ampo, kon ang usa ka pag-ampo gihalad diha sa pampublikong dapit, importante kini isip usa ka pagpamatuod o simbolo sa usa ka grupo sa komon nga panginahanglan ug balaang pagtahud alang sa Dios. Kini mao ang matang sa mga pag-ampo nga gihalad sa

sinugdanan sa mga lehislatibo nga kapundokan o mga miting sa konseho ug sa mga panumpa nga ipahigayon sa dili pa ang pagpamatuod sa korte o pag-instalar og opisyal. Bisan unsa pa ang konsepto sa Dios sa gitakda nga moampo ug bisan unsay iyang relihiyoso nga mga pagtuo o pinulongan sa pag-ampo, ako naglaum nga kita mosaksi sa atong pagtuo sa Dios pinaagi sa simbolo sa pag-ampo, nga maalamon ug mainantusong gipahigayon. Angay kana nga ipakigbisog.

Ikaduha, kita kinahanglan nga abtik nga mosupak sa mga opisyaes sa gobyerno ug mga manlalaban sa pampublikong polisiya nga mosugyot nga ang gawasnong pagsunod sa relihiyon limitado sa “kagawasan sa pag-simba.” Sa Estados Unidos, pananglitan, ang kasiguroan sa “gawasnong pagsunod” nanalipod sa katungod nga mogawas gikan sa atong pribadong mga kalihokan, lakip sa mga simbahan, mga sinagoga, ug mga mosque, sa pagbuhat sa atong mga pagtuo, ubos lamang sa lehitimong mga gahum sa gobyerno nga gikinahanglan aron sa pagpanalipod sa panglawas sa publiko, kahilwasan, ug kaayohan. Ang gawasnong pagsunod sigurado gayud nga manalipod sa relihiyoso nga mga lumulupyo sa pagbuhat sa ilang mga gituohan sa pampublikong pagdebate sa polisiya ug sa mga pagbotar nga gihimo isip mga lumulupyo o isip magbabalaod.

Sama sa gisulti ni Elder Jeffrey R. Holland sa Korum sa Napulog Duha ka mga Apostoles sa usa ka gamhanan nga pakigpulong sa Kristyanong mga lider sa tibuok nasud, kita nga mga Santos sa Ulahing mga Adlaw “matinguhaon nga moapil . . . sa paggarantiya sa kagawasan sa relihiyon nga motugot kanato nga mamulong [ug sa pagbuhat] kabahin sa mga butang sumala sa Kristyanong konsyensya kabahin sa problema sa katilingban sa atong panahon.”⁸

Kinahanglan kitang mosuporta sa panaghugpong sa mga lider sa relihiyon ug sa mga katawhan nga mahadlukon sa Dios kinsa nagkahiusa sa pagpanalipod sa tradisyonal nga kultura sa pagtuo sa Dios ug sa pag-ila sa Iyang mga panalangin.

IV.

Sa pagtapos, akong isugyot sa tanang mga tumutuo bisan asa nga kita adunay usa ka ligdong nga relihiyusong katungdanan nga mahimong mga saksi sa Dios. Kinahanglan gayud kita nga mopamatuod sa atong mga relihiyusong pagtuo, maghiusa sa pag-insister sa atong katungod sa gawason nga pagsunod sa atong mga relihiyon, ug pagtahud sa ilang mahinungdanon nga mga tahas sa pag-establisar ug pagpreserbar ug pagpauswag sa mga nasud.

Mopahinumdom ko sa akong isig ka Kristyano sa ligdong nga pagtulun-an ni Apostol Juan:

“Ug ang matag usa ka espiritu nga wala magaila kang Jesus, kini dili iya sa Dios. Kini mao ang espiritu



**Kinahanglan ki-
tang mosuporta
sa panaghugpong
sa mga lider sa
relihiyon ug sa
mga katawhan nga
mahadlukon sa Dios
kinsa nagkahiusa
sa pagpanalipod
sa tradisyonal nga
kultura sa pagtuo
sa Dios ug sa pag-
ila sa Iyang mga
panalangin.**

sa antikristo nga inyong nadungog nga moanhi, ug kini siya ania na sa kalibutan” (1 Juan 4:3).

Ang sangputanan sa atong pagkapakyas sa pagsulti isip mga saksi sa Dios klaro diha sa pagtulun-an sa atong Manluluwas mahitungod sa asin nga nawad-an sa iyang lami. Isagol sa ubang mga butang—sama nga kita mahimong malayaw pinaagi sa mga mithi sa kalibutan—kini mawad-an sa talagsaong impluwensya nga nasagulan sa kadaghanan. Sama sa gitudlo sa Manluluwas, “Kini dili na gayud magpulos sa bisan unsa, kondili angay na lang kining isalibay sa gawas aron tunobtunoban sa mga tawo” (Mateo 5:13).


Isip “asin sa yuta,” (Mateo 5:13), kita nga mga Santos sa Ulahing mga Adlaw kinahanglan ipabilin nato ang atong lami pinaagi sa pagsunod sa atong relihiyon ug pinaagi sa pagbarug sa atong mga kaugalingon isip mga saksi sa Dios. Kon ato kining buhaton, atong gihiusa ang atong kaugalingon uban niadtong kinsa makatagamtam sa

katapusang kadaugan sa kamatuoran ug pagkamatarung, kon ang “tanang tuhod magaluhod . . . ug ang tanang dila magadayeg sa Dios” (Mga Taga-Roma 14:11) ug sa Ginoong Jesukristo, kang kinsa kita nagsimba ug kansang mga sulugoon mao kita. ■

Gikan sa usa ka debosyonal nga pakigpulong, “Witnesses of God,” nga gihatag didto sa Brigham Young University–Idaho niadtong Pebrero 25, 2014. Alang sa kompleto nga teksto sa Iningles, adto sa www2.byui.edu/DevotionalsandSpeeches.

MUBO NGA MGA SULAT

1. Stephen L. Carter, *The Culture of Disbelief: How American Law and Politics Trivialize Religious Devotion* (1993), 226; tan-awa sa kapitulo 11 sa kinatibuk-an.
2. Francis J. Beckwith ug Gregory Koukl, *Relativism: Feet Firmly Planted in Mid-Air* (1998), 12–13.
3. Sa Paul Kurtz, ed., *Humanist Manifestos I and II* (1973), 14, 15–16.
4. Chauncey Riddle, *Think Independently: How to Think in This World but Not Think with It* (2009), 120, 121.
5. Sa Kurtz, *Humanist Manifestos I and II*, 16.
6. Tan-awa sa John A. Howard, *Christianity: Lifeblood of America’s Free Society, 1620–1945* (2008), 51.
7. Clayton Christensen, “Religion Is the Foundation of Democracy and Prosperity,” tan-awa sa mormonperspectives.com/2011/02/08/religion-is-the-foundation-of-democracy-and-prosperity.
8. Tan-awa sa Jeffrey R. Holland, “Panaghiusa alang sa Kawsa ni Kristo,” *Liahona*, Ago. 2012, 26.



Ang Pagrebelde ni Satanas

Unsa ang tinuod nga matang sa gisugyot ni Satanas sa konseho sa wala pa dinhi sa yuta?

Ni Mark A. Mathews

Mga Seminary ug Institute

Sa dihang batan-on pa ko, nakamatikod ko og makapangutana nga kalagmitan sa pipila ka mga miyembro sa Simbahan. Kon makakita sila og sitwasyon diin ang mga balaod nga gikasabutan ug ang mga sangputanan giimplementar tungod sa kamasinupakon (sama pananglit, sa pagdisiplina sa miyembro sa Simbahan, pagdisiplina sa ginikanan ngadto sa anak, o pagpatuman sa mga lagda sa misyon o mga sumbanan sa pamatasan diha sa mga eskwelahan sa Simbahan), sila kanunay moingon, “Dili ba kana mao ang pamaagi ni Satanas? Dili ba gipugos nila ang mga tawo nga magmatarung?”

Kini nga tubag nakapatingala nako sa sinugdanan—sa unsang paagi ang usa ka tawo maghunahuna nga ang mga buhat nga gitugutan sa Ginoo ug sa Iyang Simbahan mahimong kabahin sa “plano ni Satanas?” Nakaamgo ko nga ang sayop nga mga pagsabut sama niini kabahin sa pagrebelde ni Satanas ug sa Gubat sa Langit sa tinuoray komon na, ingon man maalaan sa mga tawo ang pipila ka sitwasyon nga daw plano ni Satanas. Sa kawalay palad, kining sayop nga mga pagsabut sa doktrina makamugna og makadaut nga mga resulta.

Sama pananglit, kining sayop nga pagsabut makapahimo sa pipila ka mga ginikanan sa paghunahuna nga dili nila awuhagon ang ilang mga anak sa pagsimba. Makapahimo kini sa mga miyembro sa Simbahan sa pagsuporta nga himoong legal ang dakong sala sa moral. Gani kining sayop nga pagsabut makapahimo sa pipila ka miyembro sa Simbahan sa paghunahuna nga ang paghimo ug pagtuman sa mga pakigsaad ug ang mga pasalig sa pagkamasulundon daw sukwahi sa plano sa Dios nga, sa tinuoray, ang pagkamasulundon sa pakigsaad mahinungdanon sa tinuod nga plano sa Dios sa kaluwasan.

Unsay Mabasa diha sa Kasulatan

Pipila sa mga ideya kabahin sa gisugyot ni Satanas didto sa kalibutan sa wala pa dinhi sa yuta makita nga mas gikan

sa tradisyon kaysa gikan sa tinuoray nga pagpadayag sa hilisgutan. Isip resulta, makatabang nga modangop mismo sa kasulatan aron masayran kon unsa gyud ang tinuoray nga gipadayag sa Ginoo niining importante nga hilisgutan. Sa kasulatan, ang nag-unang tinubdan sa unsay gisugyot ni Satanas anaa sa unang mga bersikulo sa ikaupat nga kapitulo sa basahon ni Moises:

“Ug ako, ang Ginoong Dios, namulong ngadto ni Moises, nag-ingon: Kana si Satanas, kinsa ikaw nagmando diha sa ngalan sa akong Bugtong Anak, mao gihapon sukad sa sinugdanan, ug siya miduol sa akong atubangan, nag-ingon—Tan-awa, ania ako, ipadala ako, ako mahimo nga imong anak, ug ako motubos sa tanan nga mga katawhan, nga walay usa ka kalag nga mawala, ug sa pagkatinuod ako mobuhat niini; busa ihatag kanako ang imong dungog.

“Apan, tan-awa, ang akong Hinigugmang Anak, nga mao ang akong Hinigugma ug Pinili sukad sa sinugdanan, miingon ngari kanako—Amahan, ang imong pagbuot mao ang matuman, ug ang himaya imo sa kahangturan.

“Busa, tungod kay si Satanas misukol batok kanako, ug nagtinguha sa paglaglag sa kabubut-on sa tawo, diin Ako, ang Ginoong Dios, mihatag ngadto kaniya, ug usab, nga Ako kinahanglan nga mohatag ngadto kaniya sa akong kaugalingon nga gahum; pinaagi sa gahum sa akong Bugtong Anak, Ako nagsugo nga siya isalikway;

“Ug siya nahimo nga Satanas, oo gani ang yawa, ang amahan sa tanan nga mga bakak, sa pag-ilad ug pagbuta sa mga tawo, ug pagdala kanila nga ulipon sa iyang pagbuot, gani kutob sa dili maminaw ngadto sa akong tingog” (Moises 4:1–4).

Ang Amahan sa Tanan nga mga Bakak

Gikan niining mga bersikulaha klaro nga ang atong Langitnong Amahan wala mohangyo og mga boluntaryo sa pag-imbento ug pagpresentar og managlahi ug nag-indigay nga mga plano sa kaluwasan, sama sa gituohan

sa pipila. Hinoon, plano kadto sa atong Langitnong Amahan, ug Iya kining gipresentar ngadto sa Iyang espiritu nga mga anak kinsa nagpundok diha sa Dakong Konseho sa Langit. Si Jesukristo, kinsa “pinili sukad sa sinugdanan” nga mahimong Manluluwas niana nga plano, mapailubong misugyot nga ipatuman ang plano sa Langitnong Amahan, sa pag-ingon “Amahan, ang imong pagbuot [i.e. plano] mao ang matuman.” Niining sitwasyona nga si Satanas mihimo og wala mauyuni ug hinakog nga sugyot nga usbon ang plano sa Langitnong Amahan aron kini makahatag og


kaluwasan sa tanan (tan-awa sa Moises 4:1). Sa dili pa nato hisgutan kon sa unsang paagi iya kining tumanon, importante nga atong timan-an nga si Satanas gipasabut niining mga bersikuloha isip “amahan sa tanan nga mga bakak” (Moises 4:4). Sa laing higayon siya gitawag nga “usa ka bakakon gikan pa sa sinugdanan” (D&P 93:25). Kita ignorante ra kaayo aron i-asumir nga si Satanas nagsulti sa tinuod sa dihang siya mihimo niining dili katuohang pagpangangkon sa kaluwasan sa tanan.

Kon atong masabtan ang kinaiya ug kasaysayan ni Satanas, mas angay nga ikonsiderar siya isip unang mangingilad nga ahente nga namaligya kanato og produkto nga siya nasayud nga dili niya mahatag. Matud pa niya kitang tanan iyang maluwas kon kita mosunod kaniya kaysa plano nga gihimo sa atong Langitnong Amahan para sa atong kaluwasan ug gisuportahan sa atong Manluluwas nga si Jesukristo.

Ang gisugyot ni Satanas usa ka bakak. Dili kini mosalir. Dili kini epektibong alternatibo ngadto sa hingpit nang daan nga plano sa Langitnong Amahan, apan kini usa ka lit-ag nga gihimo sa pagbitik ug pag-ilad sa mga tawo nga mosunod ni Satanas. Kini, sa katapusan, usa ka plano sa kalaglagan, dili plano sa kaluwasan.

Paglaglag sa Kabubut-on

Sa mahinungdanong paagi, kini nga mga bersikulo sa kasulatan dili klaro nga namahayag *unsaon* ni Satanas pagpatuman niining bakak. Ang anaa lang sa kasulatan mao nga kini “[mollaglag sa kabubut-on sa tawo” (Moises 4:3). Si Presidente J. Reuben Clark (1871–1961), Unang Magtatambag sa Unang Kapangulohan, misugyot og duha ka dagkong



posibilidad kon unsay gisugyot nga buhaton ni Satanas ug nagpahinumdom kanato nga kini dili mosalir. Siya mipasabut: “Samtang nagbasa ko sa kasulatan, ang plano ni Satanas nagkinahanglan og usa sa duha ka butang: Ang pagpugos sa . . . tawo, o pagluwas sa mga tawo diha sa sala. Nagduha-duha ko kon ang kabubut-on sa tawo mahimo ba nga mapugos. Sigurado ang tawo dili maluwas diha sa sala” (sa Conference Report, Okt. 1949, 193; gikutlo sa *Doctrines of the Gospel Student Manual* [2010], 15).

Bisan tuod walay usa niini nga mga posibilidad mosalir, atong makita ang mga elemento niini diha sa mga paningkamot ug mga taktika ni Satanas karon.

Sama pananglit, ang pagpamugos gigamit karon sa mga malupigon nga nagtinguha og gahum sa mga nasud ug sa mga aktibista sa politika kinsa nagtinguha nga malimitahan ang kagawasan sa relihiyon ug mipugos sa katilingban nga modawat sa makasasala nga kinaiya. Ang Ginoo nanghimauraut sa paggamit sa “gahum o kamandoan o pagpugos sa mga pagbati sa mga katawhan, bisan unsa nga matang sa pagkadili matarung” (D&P 121:37).

Hinoon, ang Ginoo mipasabut usab nga ang gahum ug impluwensya magamit sa pagdasig sa pagkamatarung pinaagi sa mahigugmaong pagdani, matarung nga pagpanton, ug hustong mga sangputanan (tan-awa sa D&P 121:41–43). Kining importante nga katin-awan nagpakita nga ang hustong pagdisiplina diha sa Simbahan ug sa ginikanan, pagpatuman sa mga balaod ug mga sumbanan diha sa misyon ug sa mga eskwelahan sa Simbahan, ug pag-establisar og matarung nga mga balaod sa katilingban mga buhat nga gitugutan sa Ginoo ug dili kabahin sa “plano ni Satanas.” Ang pagtahud sa kabubut-on wala magpasabut nga dawaton ang anarkiya.

Ang ikaduhang posibilidad kon giunsa pagtanyag ni Satanas sa pagluwas sa tanan gihulagway diha sa LDS Bible Dictionary: “Si Lucifer ug ang iyang mga sumusunod gusto nga awtomatik nga maluwas kadtong mosinati sa pagkamortal, dili igsapayan sa indibidwal nga gusto, kabubut-on, o boluntaryong pagpahinungod” (“War in Heaven”). Sa laing pagkasulti, laing interpretasyon mao nga si Satanas mitanyag sa pagluwas natong tanan, bisan unsa pa ang atong gihimo. Kini molaglag sa kabubut-on pinaagi sa paghimo niini nga walay gamit. Kon walay mga sangputanan

sa atong mga pagpili ug ang tanan makadawat sa samang ganti, ang atong mga pagpili mahimong walay kahulugan ug ang atong kabubut-on nalaglag.

Kini nga interpretasyon kon giunsa pagtanyag ni Satanas sa pagluwas kanato makita usab diha sa daghan niyang mga paningkamot ug taktika nga pamilyar nato karon. Si Satanas kanunay nagsaad sa mga tawo nga mahimo silang magkinabuhi diha sa sala ug maluwas ra gihapon o sila makakaplag og kalipay diha sa pagkadautan. Kining makapadani nga mensahe sa sayon nga kaluwasan ug estilo sa kinabuhi sa sala popular kaayo karon, sama sa sugyot ni Satanas diha sa Gubat sa Langit diin “daghan ang misunod kaniya” (Abraham 3:28).

Atong makita pinaagi niining mga ehemplo nga ang pamaagi ni Satanas wala kaayo mausab sukad sa kinabuhi sa wala pa dinhi sa yuta. Si Satanas nagpadayon sa pagpamakak sa mga tawo pinaagi sa pagsaad nila nga kon sila mosunod kaniya sila maluwas, o magmalipayon, o bisan unsay ilang gusto nga madungog. Nagpadayon usab siya sa pagpugos aron sa pagpatuman sa iyang dili matarung nga mga panglantaw ug binuhatan ngadto sa uban. Busa, “ang gubat nagpadayon dinhi sa pagka-mortal . . . nakiggubat kabahin sa samang mga problema, ug ang samang kaluwasan ang girisgo” (Bible Dictionary, “War in Heaven”).

Usa ka Plano sa Pagrebelde

Tingali ang pinakayano nga paagi sa paghulagway sa plano ni Satanas wala makabasi sa pangagpas sa mga teyoriya kon unsay gustong buhaton ni Satanas apan unsay tinuoray nga nabuhat niya ug sa iyang mga sumusunod tungod sa iyang plano—kana, ang pagrebelde. Ang kasulatan mibalik-balik og pahayag nga si Satanas dayag nga mirebelde batok sa Dios. Sama pananglit, ang Ginoo mideklarar nga si “Satanas misukol batok kanako” (Moises 4:3); “ang anghel sa Dios kinsa may pagtugot diha sa atubangan sa Dios . . . misupak batok sa Bugtong Anak” (D&P 76:25); ug “siya misukol batok kanako, nag-ingon, Ihatag kanako ang imong dungog, diin mao ang akong gahum” (D&P 29:36).

Gikan niining mga bersikulo klaro nga ang sugyot ni Satanas dili inosente nga sugyot sa pag-usab sa plano sa Dios. Kini usa ka pagrebelde, pagsukol, pagsulay sa pag-alsa aron sa pagpalagpot sa Dios ug mopuli sa kalangitan. Kadtong misunod ni Satanas mideklarar og gubat sa langit ug mihimo sa ilang kaugalingon nga mga kaaway sa Dios. Ang ilang kabubut-on nalaglag tungod kay sila wala mopili sa “kalingkawasan ug sa kinabuhi nga dayon, pinaagi sa halangdon nga Tigpataliwala,” apan mipili sa “pagkabihag

ug sa kamatayon, sumala sa pagkabihag ug sa gahum sa yawa; kay siya nagtinguha nga ang tanan nga mga tawo unta mahimo nga mauyamot sama ngadto kaniya” (2 Nephi 2:27). Isip resulta, “ikatulo nga bahin sa mga panon sa langit siya mipabiya gikan [sa Dios] pinaagi sa ilang kabubut-on” (D&P 29:36).

Buot ipasabut, ang yanong paagi sa pagtan-aw sa plano ni Satanas mao ang plano sa pagrebelde ug pagsupak sa Dios. Agig pagtandi, ang Dios mi-summarize sa Iyang plano niining mga pulonga: “Kita mosulay kanila dinhi, aron pagsuta kon sila mobuhat ba sa tanan nga mga butang bisan unsa ang isugo sa Ginoo nga ilang Dios ngadto kanila” (Abraham 3:25). Agig dugang, “Kami nagtuo nga pinaagi sa Pag-ula ni Kristo, ang tanan nga mga katawhan mahimo nga maluwas, pinaagi sa pagsunod sa mga balaod ug mga ordinansa sa Ebanghelyo” (Mga Artikulo sa Hugot nga Pagtuo 1:3). Ang plano sa Dios mao ang plano sa pagkamasulundon ug pagkamatarung, samtang ang plano ni Satanas mao ang pagkamasinupakon ug pagrebelde.

Pag-ila sa Plano


Ang husto nga pagsabut sa kalainan sa plano sa Dios ug sa tumong ni Satanas makatabang nato nga mas klarong mailhan kon si kinsa *gyud* ang nagsunod ug wala magsunod ni Satanas. Kini makatabang nato sa paglikay sa pagakusar nga nagsunod sa plano ni Satanas kadtong nagdasig sa pagkamatarung ug nagpasiugda nga magmasulundon nga sa tinuoray sila nagsunod sa plano sa Dios. Kini makapadayag usab sa tinuod nga mga sumusunod sa plano ni Satanas karon.

Kadtong nagprotesta ug nagrebelde batok sa Dios ug sa Iyang mga propeta, kadtong nagtinguha sa pag-usab sa plano sa Dios, kadtong nagbungat nga paubsan ang mga sumbanan sa pagkamatarung ug nagtinguha sa pagpugos sa uban nga dawaton ang dili moral nga pamatasan, ug kadtong nagtinguha sa paglingla sa mga tawo nga ang pagkadautan mao ang kalipay ug nga kita makakaplag og kaluwasan diha sa sala, ang tanan nagsuporta sa lain-laing mga elemento sa estratehiya ni Satanas sa pagrebelde.

Unta kita nagsunod sa tinuod nga plano sa Langitnong Amahan, ang plano sa kaluwasan “pinaagi sa Pag-ula ni Kristo” ug pinaagi sa “pagsunod sa mga balaod ug mga ordinansa sa Ebanghelyo” (Artikulo sa Hugot nga Pagtuo 1:3). ■
Ang tagsulat nagpuyo sa Utah, USA.

Sa paghatag og feedback niining artikulo o sa bisan unsang artikulo sa Liahona, palihug og e-mail sa liahona@ldschurch.org.





**Ni Elder
Ulisses Soares**

Sa Kapangulohan
sa Seventy

GUNIT SA GUNITANAN NGA PUTHAW

Kon kita mogamit sa hugot nga pagtuo ug makugihong mosunod sa mga sugo sa Ginoo, sayon kitang makapili sa matarung.

Sa dihang ang usa ka maayong miyembro sa Simbahan nga akong nailhan nag-eskwela sa kolehiyo, giimbitar siya sa party sa Sabado sa gabii sa balay sa usa ka kauban sa klase. Ang mga propesor sa kolehiyo sa akong higala giimbitar usab, ilabi na kadtong mahigalaon sa mga estudyante. Ang party ingon og maanindot ug luwas ra.

Sa dihang ang akong higala miabut, bisan pa niana, dali kaayo siyang nakamatikod nga ang palibut dili mao ang iyang gidahum. Ang mga estudyante nanag-inom, nanigarilyo, naggamit og drugas, ug nagbuhat og mangil-ad nga mga butang sa tanang suok sa balay. Nabalaka siya ug nakahukom nga mobiya, apan ang party gipahigayon nga layo sa iyang panimalay. Misakay lang siya uban sa mga higala, mao nga wala siyay paagi nga makabiya nga siya lang.

Nianang higayuna nag-ampo siya sa Ginoo, nangayo og panabang. Human makapamalandong, iyang gibati nga kinahanglang moadto siya sa gawas. Misunod siya sa iyang mga pagbati ug nagpabilin sa gawas sa balay hangtud nahuman ang party.

Sa pagpamauli na, ang iyang mga higala naghigot mahitungod sa mangil-ad nga mga butang nga nahitabo atol sa party. Ang akong higala mibati nga dili komportable

sa sitwasyon. Dili sayon alang niya ang pagpaminaw.

Sa dihang siya miambit sa sakrament sa sunod nga adlaw sa simbahan, hinoon, siya mibati nga kalma, malinawon, ug sigurado nga siya mihimo og husto nga desisyon. Nakaamgo siya unsay buot ipasabut sa paggunit sa gunitanan nga puthaw ug dili mamuhi, bisan moagi pa sa gabon sa kangitngit. Klara siyang nakasabut unsay gitudlo ni Nephi sa iyang igsoong mga lalaki sa dihang siya miingon nga “si kinsa kadto nga mopatalinghug sa pulong sa Dios, ug hugot nga mogunit niini, dili gayud sila malaglag; ni ang mga pagtintal ug ang nagdilaab nga mga pana sa kaaway makabuntog kanila ngadto sa pagkabuta, sa pagdala kanila sa kalaglagan” (1 Nephi 15:24).

Hunahunaa kon unsa kaha ang mahitabo kon kana nga batan-on, tungod sa kaulaw, dili kaayo lig-on nga mogunit sa gunitanan nga puthaw. Isip resulta niini ug sa ubang mga desisyon sa iyang kinabuhi, siya naminyo sa usa ka batan-ong babaye didto sa templo, naghimo og matarung nga pamilya, ug nahimong malampuson. Nagserbisyo siya nga matinud-anon sa Simbahan karon ug nagtinguha nga mahimong maayo nga ehemplo alang sa iyang mga anak.

Ang Kinaiyanhon nga Tawo

Dili sayon ang pag-atubang sa inadlaw nga tintasyon. Kitang tanan nabantang sa palibut nga mapang-hudlat ngadto sa ebanghelyo ni Jesukristo. Nagpuyo kita sa kalibutan nga nagkakunhod ang moralidad. Ang media ug teknolohiya nag-imbatar nato sa pag-apil sa mga kalihokan nga makadaot ug makaguba sa kinabuhi nga nagsupak sa atong mga pagtuo ug mga mithi sa ebanghelyo ni Jesukristo. Ang mga pagpamugos sa mga higala kinsa wala motuo sa atong mga mithi, o kinsa mituo sa atong mga mithi apan huyang sa ilang pagtuo, modani nato sa pag-apil sa makapakunhod nga mga binuhatan. Apil pa niini, kinahanglan pa natong atubangon ang kinaiyanhon nga tawo nga anaa sa matag usa kanato.

Ang Giya ngadto sa mga Kasulatan mipasabut sa kinaiyanhon nga tawo, nga “usa ka tawo nga mipili nga maimpluwensyahan sa mga kahinam, mga tinguha, mga gana, ug lawasnong mga tinguha kay sa mag-agad sa mga aghat sa Espiritu Santo. Ang mao nga tawo makasabut sa pisikal nga mga butang apan dili sa espirituhanong mga butang. . . . Ang matag tawo kinahanglang matawo pag-usab pinaagi sa pag-ula ni Jesukristo nga mohunong sa pagkakinaiyanhaon nga tawo.”¹

Si Presidente Thomas S. Monson kasagaran nga mokutlo og yanong panultihon nga makatabang nato nga makalikay sa mga tintasyon ug makapadayon nato sa saktong direksyon: “Dili kamo mahimong matarung pinaagi sa pagbuhat og sayop, ug dili kamo mahimong masayop pinaagi sa pagbuhat og matarung.”²

Kon magpakita kita og hugot nga pagtuo ug makugihong mosunod sa mga sugo sa Ginoo, mas sayon kitang makapili sa matarung.

Ang Kahayag ni Kristo.

Si propeta Mormon mitudlo sa iyang katawhan:

“Busa, ako mopakita nganha kaninyo sa paagi sa paghukom; kay ang matag butang nga modapit sa paghimo sa maayo, ug sa pagdani sa pagtuo diha kang Kristo, gipadala



Ang akong higala mi-abati nga kinahanglan siyang mobiya sa party ug nagpabilin sa gawas sa balay hangtud nahuman kini. Nakaamgo siya unsay buot ipasabut sa paggunit sa gunitanan nga puthaw ug dili mamuhi, bisan moagi pa sa gabon sa kangitngit.

pinaagi sa gahum ug gasa ni Kristo; busa kamo mahimo nga masayud uban sa usa ka hingpit nga kasayuran nga kini gikan sa Dios.

“Apan bisan unsa nga butang nga modani sa mga tawo sa pagbuhat sa dautan, ug sa dili pagtuo kang Kristo, ug sa paglimud kaniya, ug sa dili pag-alagad sa Dios, niana kamo masayud uban sa usa ka hingpit nga kasayuran nga kini gikan sa yawa; kay sa ingon niini nga paagi ang yawa mobuhat, kay siya dili modani sa tawo sa pagbuhat og matarung, dili, bisan og usa, ni ang iyang mga anghel; ni sila kinsa nagpaulipon sa ilang mga kaugalingon ngadto kaniya” (Moroni 7:16–17).

Ang atong Langitnong Amahan mihatag nato sa Kahayag ni Kristo, nga mao ang “balaan nga kusog, gahum, o impluwensya nga nagagikan sa Dios pinaagi ni Kristo ug naghatag og kinabuhi ug kahayag sa tanan nga mga butang.”³ Makatabang kini sa usa ka tawo sa pagpili tali sa matarung og sayop. Kini nga gasa, uban sa pakig-uban sa Espiritu Santo, makatabang nato sa pagtino kon ang usa ka pagpili nagbutang ba nato sa teritoryo sa Ginoo o diha sa linya sa kaaway. Kon maayo ang atong kinaiya, kita gidasig sa Dios. Kon ang atong kinaiya dili maayo, kita giimpluwensya sa kaaway.

Ang akong higala sa kolehiyo mi-gamit niining duha ka mga gasa. Ang Kahayag ni Kristo nakatabang niya sa pag-ila kon unsa ang matarung, ug ang Espiritu Santo naggiya sa iyang desisyon kon unsa nga dalan ang subayon. Kining duha ka mga gasa magamit niadtong kinsa nanggunit sa gunitanan nga puthaw.

Ang Gasas sa Paghinulsol

Hunahunaon kuno nato nga sa pipila ka rason kita gilingla o gilibug sa tintasyon ug misangpot sa pagbuhat og sala. Unsay angay natong buhaton? Kon kita mahulog ngadto sa tintasyon ug sala, kinahanglang makig-uli kita uban sa Dios. Sa pinulongan sa mga kasulatan, kinahanglan kitang maghinulsol.

Si Elder Neil L. Andersen sa Korum sa Napulog Duha ka mga Apostoles mitudlo:

“Kon kita makasala, kita mopalayo gikan sa Dios. Kon kita maghinulsol, kita mobalik ngadto sa Dios.

“Ang pagdapit sa paghinulsol dili kanunay nga usa ka tingog sa pagkastigo apan hinoon usa ka mahigugmaon nga hangyo sa pagbalik ug sa “pagduol og usab” ngadto sa Dios [tan-awa sa Helaman 7:17]. Ang pagtawag sa usa ka mahigugmaong Amahan ug sa Iyang Bugtong Anak maoy makahimo nato nga mas maayo pa kay sa karon, sa pagkab-ot sa mas taas nga dalan sa kinabuhi, sa pag-usab, ug mobati sa kalipay sa pagsunod sa mga sugo. Isip mga disipulo ni Kristo, kita nagmaya sa panalangin sa paghinulsol ug sa kalipay nga mapasaylo. Mahimo kining kabahin nato, maghulma sa atong paghunahuna ug pagbati.”⁴

Ang paghinulsol usa ka talagsaon nga gasa nga alang sa tanan kinsa nagtinguha sa pagbalik ngadto sa Dios ug motugot Kaniya nga pag-umol sa ilang kinabuhi.

Natawo kita uban sa binhi sa pagkabalaan sa atong mga espiritu tungod kay kita mga anak sa Dios. Kini nga binhi kinahanglan nga motubo. Motubo kini samtang kita mogamit sa atong kabubut-on diha sa pagkamatarung, samtang kita mohimo og saktong desisyon, ug samtang kita mogamit sa Kahayag ni Kristo ug sa Espiritu Santo sa paggiya nato sa mga desisyon nga atong himoon sa atong mga kinabuhi. Kini nga proseso nagkinahanglan og panahon, apan posible nga mohulma sa atong mga espiritu ug sa atong mga kinabuhi gikan sa usa ka adlaw ngadto sa lain.

Sa pag-ila sa atong pagkamahalaron ug determinasyon, ang Ginoo mohatag nato unsay dili nato maangkon pinaagi sa atong mga kaugalingon. Hulmahon kita Niya tungod kay Siya nakakita sa atong mga paningkamot sa pagbuntog sa atong mga kasaypanan ug tawhanong mga kahuyang.

Niining paagiha, ang paghinulsol mahimong kabahin sa atong inadlaw nga mga kinabuhi. Ang atong sinemana nga pag-ambit sa sakrament—nga magmaaghup, mapaub-sanon sa atubangan sa Ginoo, moila sa atong pagsalig diha Kaniya, naghangyo Kaniya sa pagpasaylo ug pagbag-o kanato, ug nagsaad nga mohinumdom Kaniya kanunay—importante kaayo.

Usahay sa atong inadlaw-adlaw nga mga paningkamot nga mahimong mas sama kang Kristo, atong makita ang atong kaugalingon nga nakigbisog sa samang mga kalisdanan. Ingon og kita nagkat-kat og bukid nga puno sa kakahoyan. Usahay kita dili makakita sa atong pag-uswag hangtud nga kita magkaduol sa ibabaw ug motan-aw gikan sa taas nga mga pangpang. Ayaw pagpakawala sa paglaum. Kon kamo naningkamot ug nanglimbasug sa paghinulsol, kamo anaa sa proseso sa paghinulsol.

Si Elder D. Todd Christofferson sa Korum sa Napulog Duha ka mga Apostoles miingon, “Ang pagbuntog sa dili maayo nga naandang mga buhaton o pagkaadik sa kasagaran nagpasabut nga usa ka paningkamot karon nga pagasundan sa lain pagkaugma ug dayon sa lain, tingali sulod sa daghang mga adlaw, gani mga bulan ug mga tuig, hangtud maangkon nato ang kadaugan.”⁵

Samtang kita molambo, mas klaro natong makita ang kinabuhi ug mobati sa Espiritu Santo nga nag-impluwensya kanato. Alang niadtong kinsa tinuod nga mahinulsulon apan daw wala mobati og kahupayan, padayon sa pagsunod sa mga sugo. Mosaad ko nga ang kahupayan moabut sa panahon sa Ginoo. Ang pagkaayo nagkinahanglan og panahon.

Ipadayon nato ang mahangturong panglantaw pinaagi sa pagbuntog sa kinaiyanhon nga tawo, paghukom pinaagi sa Kahayag ni Kristo, magtinguha sa giya gikan sa Espiritu Santo, maghinulsol kon masayop kita, ug magtugot sa atong Langitnong Amahan sa pag-usab sa atong mga kinabuhi ngadto niana nga Iyang giplano alang kanato. ■

Gikan sa usa ka debosyonal nga pakigpulong, “Becoming a Work of Art,” nga gihatag didto sa Brigham Young University niadtong Nobyembre 5, 2013. Alang sa kompleto nga teksto sa Iningles, bisitaha ang speeches.byu.edu.

MUBO NGA MGA SULAT

1. Giya ngadto sa mga Kasulatan, “Kinaiyanhon nga Tawo”; scriptures.lds.org.
2. Presidente Thomas S. Monson, “In Harm’s Way,” *Ensign*, Mayo 1998, 48.
3. Giya ngadto sa mga Kasulatan, “Kahayag, Kahayag ni Kristo”; scriptures.lds.org.
4. Neil L. Andersen, “Paghinulsol . . . Aron Ako Moayo Kaninyo,” *Liahona*, Nob. 2009, 40.
5. D. Todd Christofferson, “Pag-ila sa Kamot sa Dios diha sa Atong Inadlaw nga mga Panalangin,” *Liahona*, Ene. 2012, 29.



USA KA SAAD ALANG SA TANAN

“Ang Manluluwas mihimo sa Pag-ula, nga naghatag og paagi alang nato nga malimpyo. . . . Kadtong maghinulsol ug mobiya sa sala makakaplag nga ang Iyang bukton sa kalooy gituy-od gihapon. . . . Ang resulta sa Iyang sakripisyo mao ang pagpalingkawas kanato gikan sa epekto sa sala, nga ang tanan nga dunay kasaypanan mapasaylo ug mobati og paglaum.”

Presidente Boyd K. Packer, Presidente sa Korum sa Napulog Duha ka mga Apostoles, “Ang Rason sa Atong Paglaum,” *Liahona*, Nob. 2014, 6, 7.



ANG PAGTAHUD SA MANLULUWAS PARA SA MGA

Babaye

Nila ni Robert ug Marie Lund

Sa panahon diin ang kababayen-an kasagaran gitratar nga ubos, ang Ebanghelyo ni Juan mopakita nga gitratar ni Jesukristo ang mga babaye uban sa kalooy ug pagtahud ug, sama sa gipahayag ni Elder James E. Talmage (1862–1933) sa Korum sa Napulog Duha ka mga Apostoles nga “ang pinakabantugan nga manlalaban sa kalibutan alang sa mga babaye ug sa pagkababaye mao si Jesukristo.”¹

Kini nga artikulo nagtutok sa mosunod nga mga babaye diha sa Ebanghelyo ni Juan: (1) Maria, ang inahan ni Jesus (tan-awa sa Juan 2:1–11; 19:25–27); (2) ang Samarianhon nga babaye diha sa atabay (tan-awa sa Juan 4:4–30, 39–42); (3) ang babaye nga nasakpang nakapanapaw (tan-awa sa Juan 8:1–11); ug (4) Maria Magdalena (tan-awa sa Juan 20:1–18). Bisan tuod ang kinabuhi niining mga babaye managlahi gayud, gihtagagan og gibug-aton ni Juan ang pagsabut sa Manluluwas sa nagkalahi-lahing mga sirkumstansya sa ilang kinabuhi, ug iyang girekord ang mga panalangin nga ilang nadawat tungod sa ilang hugot nga pagtuo ni Jesukristo.

Pinaagi sa pagtuon sa mga inter-aksyon ni Kristo sa mga babaye diha sa basahon ni Juan, kita mas makasabut sa atong potensyal nga relasyon ngadto Kaniya.

Ang Hugot nga Pagtuo ni Maria Nakapahimo sa Unang Milagro sa Publiko

Gipaila ni Juan si Maria sa mga magbabasa sa sayo nga bahin sa iyang Ebanghelyo. Ang iyang saysay sa unang publiko nga milagro ni Jesukristo sa kasal sa Cana naglangkob og pasidungog sa hugot nga pagtuo ni Maria.

Si Maria ingon og may responsibilidad diha sa kasal.² Sa dihang ang mga bisita “[gusto og bino], ang inahan ni Jesus miingon kaniya, Wala na silay bino” (Juan 2:3). Kini nga bersikulo nagsugyot nga sa dihang si Maria miduol kang Jesukristo para mangayo og tabang, posible nga nagdahum siya og usa ka milagro.³

Sa pagtubag, si Jesukristo miingon “Babaye, unsay imong labut kanako? ang akong takna wala pa moabut” (Juan 2:4). Sa dinasig nga paghubad ni Joseph Smith niining bersikulo, ang Manluluwas nangutana unsay gusto ni Maria nga Iyang buhaton ug nagsaad nga buhaton kini.⁴ Ang titulo nga *babaye* daw walay pagtahud paminawon para sa magbabasa karon; apan, ang pagkagamit niini dinhi sa Manluluwas nagpasabut sa katugbang nga kahulugan niini.⁵ Usa ka eskolar nagpasabut, ang “‘Babaye,’ sa pinulungang Griyego maoy usa ka titulo sa pagtahud, gani gigamit sa pagtawag sa mga reyna.”⁶ Sama ra nga Iyang gisultihan ang Iyang inahan, “Babaye, bisan unsay imong pangayuon uban sa hugot nga pagtuo, ako kining ihatag kanimo.” Kini nga saysay nagpakita nga ang Manluluwas nasayud sa balik-balik nga palas-anon nga giatubang sa mga babaye. Gipasidunggan ni Jesukristo ang Iyang inahan pinaagi sa pagtanyag og tabang niya sa iyang mga palas-anon ug responsibilidad.

Ang saysay dayon nagrekord sa padayon nga pagtuo ni Maria samtang iyang gisugo ang mga sulugoon sa pagsunod ni Jesukristo: “Unsa ganiy iyang isugo kaninyo, buhata ninyo” (Juan 2:5). Ang mga tadyaw gipuno og tubig, ug gihimo sa Manluluwas ang tubig og bino isip tubag sa hangyo ni Maria aron ihatag kini sa mga bisita diha sa kasal. Pagkanindot nga leksyon nga atong nakat-unan gikan kang Maria: kon nangingahanglan, pangayo og tabang ug salig ni Jesukristo, kinsa aduna sa tanang gahum. Sama kang Maria, ang mga babaye nga Santos sa Ulahing mga Adlaw karon makasalig ni Jesukristo uban sa hugot nga pagtuo kon sila mabug-aton pag-ayo sa ilang mga responsibilidad.

Kining mubo nga saysay wala lang magtudlo sa gahum sa hugot nga pagtuo ni Maria apan nagpamatuod usab sa tinuod nga pagkatawo ni Jesukristo isip Anak sa Dios pinaagi sa Iyang unang milagro sa publiko. Ang sunod



Pagkanindot nga leksyon nga atong nakat-unan gikan kang Maria: kon nangingahanglan, pangayo og tabang ug salig ni Jesukristo, kinsa aduna sa tanang gahum.



Tungod sa iyang pagtuo, ang Samarianhon nga babaye nakadawat og pagsaksi gikan sa Espiritu ug nagtinguha sa pagpamatuod nga si Jesus mao ang Kristo, ang gisaad nga Mesiyas.

nga babaye nga gipaila ni Juan sa mga magbabasa mao ang babaye sa Samaria.

Si Jesukristo Mitahud sa usa ka Babaye gikan sa Samaria

Ang saysay nga anaa sa Juan 4 nagmatuod sa pagtahud ni Jesus sa tanang babaye, dili igsapayan sa ilang nasyonalidad o tinuohan. Pipila sa mga Judeo naghunahuna sa mga taga-Samaria nga “mas makasasala kaysa Hentil o sa uban pang nasyonalidad”⁷ ug dili makig-interact kanila. Wala lang gibaliwala ni Jesukristo ang mga tradisyon nianang panahona, apan giila usab ni Elder M. Russell Ballard sa Korum sa Napulog Duha ka mga Apostoles ang pasidungog sa Manluluwas niini nga babaye: “Ang unang higayon nga giila sa Ginoo nga Siya ang Kristo, ngadto sa Samarianhon nga babaye sa atabay ni Jacob.”⁸

Human og lakaw sa init nga adlaw, si Jesukristo mihunong aron mopahulay ug mokuha og tubig. Gisugdan sa Manluluwas ang pag-istorya sa Samarianhon nga babaye sa atabay pinaagi sa pagpangayo og tubig nga imnon. Hinayhinay, pinaagi sa pag-istoryahanay, siya nakabaton og pagpamatuod sa Iyang kabalaan. Si Juan mirekord nga una niyang gitawag si Jesus isip “Judeo,” dayon “Senyor,” dayon “propeta,” ug katapusan isip “ang Kristo” (tan-awa sa Juan 4:9–29). Ang iyang nagkaanam kamatinahuron nga gigamit nga titulo nagpasabut nga siya nakapalambo og pagtuo ni Jesukristo ug nakabig.

Ang Manluluwas mitudlo kaniya nga Siya adunay “buhi nga tubig” (Juan 4:10) ug kadtong moinom niini dili na gayud pagauhawon. Naglibog, ang babaye nagpadayon sa pagpangutana. Gipadayag ni Jesukristo ngadto sa Samarianhong babaye ang kaagi og kasamtangang makasasala nga relasyon sa babaye. Bisan tuod mibati siya nga naulawan, tingali mibati usab siya nga si Jesukristo namulong nga may pagtahud, tungod kay siya manggihunahunaong mitubag, “Senyor, naila ko nga ikaw usa ka propeta” (Juan 4:19). Ang iyang mga sala nasayran na, nga wala nay angay nga itago, ang babaye migamit og hugot nga pagtuo diha ni Jesukristo samtang Siya nagtudlo kaniya. Usa sa Iyang mga tubag mahinungdanon sa pagbaton og kaluwasan: “Babaye, tuohi ako” (Juan 4:21).

Tungod sa iyang pagtuo, ang Samarianhon nga babaye nakadawat og pagsaksi gikan sa Espiritu ug nagtinguha sa pagpamatuod nga si Jesus mao ang Kristo, ang gisaad nga Mesiyas. Gibiyaan ang iyang banga (simbolo sa iyang kalibutanong mga butang), siya miadto sa siyudad ug mipahibalo, “Umari kamo, tan-awa ninyo ang usa ka

tawo nga mitug-an kanako sa tanang nabuhat nako: mao ba kaha kini ang Kristo?” (Juan 4:29). Nahimong instrumento sa mga kamot sa Dios, ang hugot nga pagtuo ug misyonaryong kadasig sa Samarianhong babaye nakapahumok sa mga kasingkasing sa uban aron dawaton si Jesukristo.

Pinaagi sa paglatid niini nga kasinatian, si Juan nagpakita nga ang Manluluwas nakaila sa mga babaye ug nasayud sa detalye sa ilang kinabuhi. Dugang pa, Iyang gitahud ang mga babaye dili igsapayan sa ilang background. Para sa mga babaye kinsa wala mobati nga sila may relasyon ni Kristo o mibati nga sinalikway sa ilang katilingban, kini nga saysay nagpakita nga si Jesukristo nasayud sa mga ha-git sa matag babaye ug makadawat ug makabayaw kaniya. Ang Ebanghelyo ni Juan naghatag og gibug-aton niini nga punto pinaagi sa pagtudlo kabahin sa kalooy ni Kristo ngadto sa babaye nga nasakpang nanapaw.

Si Jesukristo Nagpakita og Kalooy sa Babaye nga Nasakpang Nanapaw

Ang Juan 8 nagkomparar sa walay kalooy nga pagtagad sa mga Pariseo sa babaye ngadto sa malumong pagtahud ug kalooy nga gipakita ni Jesukristo kaniya. Tingali sa pagsulay sa pagpaamgo ug pagpahunong sa mga Pariseo sa ilang bangis nga pagtratar sa babaye, ang Manluluwas “mitikubo, ug nagsulat sa yuta pinaagi sa iyang tudlo, [nga daw wala kadungog nila]” (Juan 8:6). Ang “pagsulat sa yuta usa ka aksyon nga may simbolo nga nailhan sa karaan, nga nagpasabut nga dili gustong makigsabut sa kasamtangang isyu.”⁹

Bisan pa niana, ang mga escriba ug Pariseo nagpadayon sa pagsamok-samok ni Jesukristo ug gipakaulawan ang babaye. Tungod sa kalooy sa babaye, si Jesus “mitul-id, ug miingon kanila, Kinsa kaninyo ang walay sala maoy pautahag labay kaniyag bato. Ug unya miusab siya pagtikubo, ug mipadayon sa pagsulat sa yuta” (Juan 8:7–8). Nagbarug nga nabantang ug gipanghimaraut ang kaugalingon, ang mga namasangil tagsa-tagsang milakaw nga naulaw, gibiyaa ang babaye nga nanapaw aron atubangon si Jesus.

Dalaygon, nga ang babaye nagpabilin sa kiliran ni Jesukristo imbis nga mopahawa. Tingali mibati siya nga gibayaw ug nalig-on tungod sa pagtahud nga gipakita ni Jesus kaniya. Siya nangutana, “Babaye, hain na sila? wala bay mihukom nimog silot? Siya mitubag, Wala, Señor. Ug si Jesus miingon kaniya, Dili usab ako mohukom kani-mog silot: lumakaw ka, ug ayaw na pagpakasala” (Juan 8:10–11).¹⁰



Dalaygon, nga ang babaye diha sa Juan 8 nagpabilin sa kiliran ni Jesukristo imbis nga mopahawa. Tingali mibati siya nga gibayaw ug nalig-on tungod sa pagtahud nga gipakita ni Jesus kaniya.



Si Maria Magdalena mao ang gipili nga unang tawo nga mosaksi ug dayon gimandoan sa pagpamatuod sa nabanhaw nga Manluluwas. Ang Ginoo nagpadayon sa pagsalig sa mga babaye sa atong panahon sa pagbarug isip mga saksi Kaniya.

Usab, ang Ebanghelyo ni Juan nagpamatuod nga gitratar ni Jesukristo ang mga babaye nga may kalooy ug pagtahud, dili igsapayan sa ilang mga sala. Ingon nga ang tanan makasala, kita makaangkon og paglaum gikan sa ehemplo niining babaye kinsa migamit og hugot nga pagtuo diha kang Jesukristo. Sama sa gipakitang pagbati sa Manluluwas niining babaye kinsa anaa sa makalibog ug makasagmuyo nga mga sirkumstansya, Iyang gihupay si Maria Magdalena kinsa Iyang nakaplagnan nga naghilak diha sa may lubnganan.

Si Maria Magdalena Napili nga Saksi sa Nabanhaw nga Kristo

Si Juan mao lang ang tagsulat sa Ebanghelyo kinsa nagpaila sa unang tawo nga nakakita sa nabanhaw nga Ginoo, nagpakita nga ang maisugon ug makahimo nga mga babaye makadawat og talagsaong espiritwal nga mga pagpakita. Si Juan mirekord, “Sa nahaunang adlaw sa semana si Maria Magdalena miadto sa lubnganan sayo sa kaadlawon, samtang mangitngit pa, ug iyang nakita nga ang bato nakuha na gikan sa lubnganan” (Juan 20:1). Nakakita nga ang bato nakuha na, si Maria midagan aron mangayo og tabang ug sa pagpahibalo sa mga Apostoles nga wala na ang lawas ni Jesus. Iyang nakit-an silang Pedro ug Juan, kinsa midagan padulong sa lubnganan ug ang sinina nga panglubong na lang ang nakit-an. Dayon mibiya ang duha ka Apostoles, gibiyaa si Maria nga naginusara diha sa lubnganan.

Si Maria naghilak diha tungod sa lubnganan: ang paghunahuna nga wala masayud unsay nahitabo sa lawas sa Ginoo mahimong nakapaguol kaayo niya. Bisan tuod ang Manluluwas nagpakita ug nakig-istorya niya, wala siya dayon makaila Niya. Dayon si “Jesus miingon kaniya, Maria” (Juan 20:16). Adunay usa ka butang nga nakapasa-yud niya nga kini ang Manluluwas. “Ang pag-ila diha-diha dayon. Ang iyang paghilak nahimong dako nga kalipay. Siya kini; siya nabanhaw; siya buhi.”¹¹ Human og saksi sa nabanhaw nga Ginoo, si Maria gihangyo sa pagpamatuod ngadto sa mga Apostoles nga Siya buhi.

Bisan ang mga disipulo sa sinugdanan nagduha-duha (tan-awa sa Lucas 24:11), ang pagsaksi ni Maria adunay epekto. Sa wala madugay, ang mga disipulo nagpundok sa paghisgot kabahin sa nahitabo nianang adlaw, tingali namalandong sa pagpamatuod ni Maria, sa dihang si Jesus “mitindog sa ilang taliwala, ug miingon kanila, ang Kalinaw magauban kaninyo” (Juan 20:19).

Kini nga kasinatian naghatag og gibug-aton sa taas nga



pagtahud ni Jesukristo ngadto sa mga babaye, tungod kay si Maria Magdalena mao ang gipili nga unang tawo nga mosaksi ug dayon gimandoan sa pagpamatuod sa nabanhaw nga Manluluwas. Ang Ginoo nagpadayon sa pagsalig sa mga babaye sa atong panahon sa pagbarug isip mga saksi Kaniya. Si Elder M. Russell Ballard mideklarar, “Adunay dalaygong mga babaye sa atong dispensasyon karon. Daghang babaye gikan sa matag kontinente ug kahintang sa kinabuhi nakahimo og dakong kontribusyon sa kawasa ni Kristo. . . . Ang akong pangutana kini, ‘Mahimo ba kamo nga usa niining mga babaye? Ug kamong mga lalaki nga naghupot sa priesthood mosa-nong ba sa samang panawagan?’”¹²

Kita Makasunod sa Ilang Ehemplo.

Pinaagi sa hugot nga pagtuo kang Jesukristo, kita maka-sunod sa ehemplo niining mga babaye diha sa mga sinulat ni Juan. Kita makasalig nga ang Manluluwas makasabut sa naandan nga palas-anon sa atong mga kinabuhi ug motabang sa pagpagaan sa atong mga palas-anon. Kita makatuo nga si Jesukristo mobayaw kanato bisan pa sa atong mga kalapasan. Agig dugang, kita masayud nga si Kristo makatabang kanato sa atong grabe nga mga kaguol, pag-antus, ug kasakit. ■

Ang mga tagsulat nagbuyo sa Utah, USA.

MUBO NGA MGA SULAT

1. James E. Talmage, *Jesus the Christ*, 3rd ed. (1916), 475.
2. Tan-awa sa Bruce R. McConkie, *Doctrinal New Testament Commentary*, 3 vols. (1965–73), 1:135.
3. Tan-awa sa James E. Talmage, *Jesus the Christ*, 145.
4. Tan-awa sa Joseph Smith Translation, John 2:4 (sa John 2:4, footnote a).
5. Tan-awa sa James E. Talmage, *Jesus the Christ*, 144–145.
6. Sa J. R. Dummelow, ed., *A Commentary on the Holy Bible* (1909), 778.
7. James E. Talmage, *Jesus the Christ*, 172.
8. M. Russell Ballard, “Women of Righteousness,” *Liahona*, Dis. 2002, 34.
9. Sa Dummelow, ed., *Commentary*, 788–89.
10. Ang Joseph Smith Translation nagdugang nga sukad niadtong hitaboa, ang babaye mihimaya sa Dios ug mituo Kaniya (tan-awa sa Joseph Smith Translation, John 8:11).
11. Bruce R. McConkie, *The Mortal Messiah*, 4 vols. (1979–81), 4:263.
12. M. Russell Ballard, *Liahona*, Dis. 2002, 38–39.



KON ANG MGA Pagduha-duha UG MGA Pangutana MOTUMAW

Ang mga pangutana mahinungdanong bahin sa atong mahangturong kalamboan, ug ang pagsiksik og mga tubag sa paagi sa Ginoo makapaduol nato sa atong Langitnong Amahan.

Ni Adam Kotter

Kasagaran tungod sa Internet, daghang mga miyembro sa Simbahan makasugat og mga ideya nga mosumpaki sa ilang pagtuo. Pipila sa mga miyembro nahasol sa mga pangutana nga nasugatan ug naghuhuna kon maayo ba nga adunay pangutana kabahin sa ilang pagtuo.

Importante nga masabtan nga maayo nga adunay mga pangutana. Gani, ang pagpangutana kabahin sa pagtuo mahinungdanon sa atong espirituhanong paglambo. Apan, ang kinasingkasing nga mga pangutana dili parehas sa pagduha-duha.

Mga Pangutana itandi sa mga Pagduha-duha

Unsa ang kalainan sa pangutana ug pagduha-duha? Ang mga pangutana, kon ipangutana uban sa kinasingkasing nga tinguha sa pagpalambo sa pagsabut ug pagtuo, giawhag. Daghang karaan ug modernong pagpadayag napahinabo gumikan sa matitud-anong pangutana.¹ Ang sugo diha sa kasulatan sa pagpangita ug pagpangutana aron makakaplag mao ang usa sa mga sugo nga kanunayng gibalik-balik. Ang matitud-anong mga pangutana ipangutana uban sa “tinuod nga katuyoan” (Moroni 10:4) aron mas makasabut ug mas makasunod sa kabubut-on sa Ginoo.

Ang matitud-anong nangutana magpadayon sa pagkamasulundon samtang nagsiksik sa mga tubag. Sa sukwahi, akong nakita nga kon ang mga tawo nagduha-duha sa ilang pagtuo, kasagaran hunungon nila ang ilang pasalig sa kasugoan ug pakigsaad samtang nagpaabut og mga

tubag. Ang mga nagduha-duha sa kalagmitan mohunong sa pagkamasulundon o limitahan kini, hangtud matubag ang mga pagduha-duha.

Walay sugyot diha sa kasulatan o sa mga pagtulun-an sa mga propeta nga nag-awhag og pagduha-duha. Gani, ang mga kasulatan puno sa mga pagtulun-an nga sukwahi niini. Sama pananglit, kita giingnan nga “ayaw pagduha-duha, ayaw kahadlok” (D&P 6:36). Ug sa Mormon 9:27, kita giawhag nga “ayaw pagduha-duha, apan pagmatinuohon.”

Usa ka problema sa pagduha-duha mao ang tinguha sa pagsunod *lamang* kon ang walay kasiguradoan matubag na sa katagbawan sa nagduha-duha. Kini ang kinaiya nga gipakita ni Korihor, kinsa miingon, “Kon ikaw mopakita kanako og usa ka timailhan . . . diha ako madani sa kama-tuoran” (Alma 30:43).

Ang gahum sa pagduha-duha nga makapahuyang sa pagtuo, paglaum, ug gani sa pamilya maminusan sa higa-yon ang tawo matitud-anong moingon, “Akong buhaton ang mga butang nga gisugo sa Ginoo, matubag man ang akong mga pangutana diha-diha dayon o dili, tungod kay nakigsaad ko nga buhaton ko kini.” Ang kalainan sa matitud-anon nga “Mosunod ko sa kasugoan *tungod kay*. . .” ug ang nagduha-duha nga “Mosunod ko sa kasugoan *kon* . . .” adunay gamhanan ug mahangturong importansya.

Ang Sundanan sa Ginoo sa Pagdawat og mga Tubag

Isip usa ka network engineer, kinahanglan nakong sundon ang estrikto nga mga sumbanan kon gusto nako nga

ang akong mga computer network makonektar sa ubang mga network. Usahay kining mga lagda daw makakapoy, apan kon ang kada network engineer mosunod sa samang mga sumbanan, kami makamugna og usa ka butang nga mas gamhanan kaysa mahimo kon kami-kami lang sa among kaugalingon.

Sa samang paagi, kon kamo nagtinguha og tubag sa espirital nga pangutana gikan sa Tinubdan sa tanang kahibalo, kinahanglan ninyong sundon ang Iyang mga lagda aron makakuha sa tubag. Kini nga proseso nagkinahanglan og tinguha nga masabtan ang kamatuoran ug kaandam sa pagsunod sa kabubut-on sa Dios (tan-awa sa Alma 32:27). Kay kon dili, adunay risgo nga imong tuohan ang mga tubag nga gusto nimong tuohan imbis makadawat og tinuod nga mga tubag gikan sa Dios.

Normal lang gyud nga mobati og kabalaka ug dili komportable kon mag-atubang og dili pamilyar nga ideya, ilabi na kon kini mosukwahi sa lig-ong gihuptan nga pagtuo. Ang importante dili nato tugutan ang ka dili komportable nga makapahilayo nato sa atong mga pakigsaad panahon sa atong pagsiksik og mga tubag. Akong nakat-unan gikan sa personal nga kasinatian nga dili mahimong talikdan nato ang Dios ug magdahum nga tubagon kita Niya sa atong mga pangutana sumala sa atong gusto. Gikinahanglan ang hugot nga pagtuo aron padayon nga mosunod sa mga kasugoan samtang nangita pa og tubag sa atong walay kasiguradoan. Makatintal nga mohunong o limitahan ang atong pagkamasulundon hangtud matubag ang atong mga kabalaka, apan dili kini mao ang paagi sa Dios.

Sa praktikal nga paagi, kinahanglan nga pangutan-on nato ang atong kaugalingon, “Andam ba nakong buhaton ang tanan aron makakuha og tubag gikan sa Ginoo, o yano lang nga buhaton ni nako sa akong paagi?” Ang Manluluwas Mismo mitudlo niining sumbanan sa dihang miingon Siya, “Kon tuyoon ni bisan kinsa ang pagbuhat sa kabubut-on sa Dios, nan, iyang mahibaloan kon ang akong gitudlo gikan ba sa Dios o nagsulti ba lamang ako sa kinaugalingon kong pagbulot-an” (Juan 7:17).

Mao nga ang unang lakang sa pagtubag sa mga pangutana mao ang pagbarug nga “makanunayon ug dili matarug sa paghupot sa mga sugo sa Dios” (Alma 1:25). Si Elder Neil L. Andersen sa Korum sa Napulog Duha ka mga Apostoles nangutana:

“Unsaon ninyo sa pagpabilin nga ‘makanunayon ug dili matarug’ kon sulayan ang hugot nga pagtuo? Isubsob ninyo ang inyong kaugalingon sa mga butang nga nakatabang sa paglig-on sa pagtuo: ipakita ninyo ang inyong hugot nga pagtuo kang Kristo, mag-ampo kamo, mamalandong sa kasulatan, maghinulsol, magsunod sa mga sugo, ug mag-serbisyo sa uban.



Ang pagpalayo gikan sa gingharian sa Dios sa panahon sa pagsulay sa hugot nga pagtuo sama ra sa pagbiya sa luwas nga lawak taguanan dihang nagkaduol na ang buhawi.

“Kon mag-atubang og pagsulay sa hugot nga pagtuo— bisan unsay inyong buhaton, ayaw pagpalayo sa Simbahan! Ang pagpalayo gikan sa gingharian sa Dios kon may pagsulay sa hugot nga pagtuo sama ra sa pagbiya sa luwas nga lawak taguanan dihang nagkaduol na ang buhawi.”²

Si Elder Andersen mitudlo usab nga ang “hugot nga pagtuo . . . usa ka desisyon.”³ Ang Ginoo dili mamugos sa inyong kaintelihente o pagkamasalundon. Kinahanglang tuyoon ninyo nga pilion ang hugot nga pagtuo! Kana nga pagpili wala makalapas sa inyong pagkamatinuoron sa intelektwal; kini ebidensya sa mahangturon ug balaanong pagtahud sa inyong kabubut-on.

Ang mga Pangutana Makapadugang sa Pagsabut

Ang pipila sayop nga naghunahuna nga ang pagbaton og matinud-anong kabalaka kabahin sa kasaysayan o doktrina sa Simbahan ebidensya nga ang usa ka tawo wala magsunod sa mga sumbanan sa Simbahan. Ang pagbaton og mga pangutana wala magpasabut nga sad-an mo og dakong sala. Ang mga pangutana kabahin na sa kinabuhi ug gikinahanglan sa atong paglambo ug dugang pagsabut. Ang problema dili kon kita adunay mga pangutana apan kon kita ba mosunod sa mga kasugoan samtang kita nagsiksik og tubag pinaagi sa pagpadayag.

Pagmatngon nga si Satanas makapadako sa atong mga pagduha-duha o mogiya kanato sa pagpangatarungan sa atong mga sala. Ang Espiritu Santo modasig kanato og dili komportabling mga pagbati kon kita makasala, ug kita mahimo nga maghinulsol o mosalikway niini nga pagdasig. Kon magduha-duha, makatabang nga matinuorong mangu-tana sa kaugalingon, aduna bay usa ka butang nga akong

gibuhat o gitinguha nga sukwahi sa ebanghelyo? Kon ang tubag oo, pangayo og tabang sa inyong bishop. Kini makahimo sa tanang kalainan! Ang pagtugot sa inyong pagduha-duha nga maoy ipangatarungan sa inyong sala dili gayud puli sa paghinulsol.

Pipila sa mga tawo nahasol sa mga pahayag sa mga lider sa Simbahan nga nasayran sa kaulahian nga dili husto, dili kabahin sa doktrina apan sa ilang personal nga mga opinyon. Sama pananglit, si Presidente Joseph Fielding Smith (1876–1972) misulat sa unang edisyon sa iyang libro nga *Answers to Gospel Questions*, “Dili mahitabo nga ang tawo makahimo og instrumento o sakyanan nga makabiyahe sa kawanangan ug makaadto sa bulan o sa bisan unsang layo nga planeta.”⁴

Sa wala madugay, human sa pag-landing sa Apollo ngadto sa buwan ug sa kamatayon ni Presidente David O. McKay, si Joseph Fielding Smith nahimong Presidente sa Simbahan. Sa usa ka press conference, usa ka reporter nangutana kaniya kabahin niini nga pahayag. Si Presidente Smith mitubag, “Nan, nasayop ko, dili ba?”⁵

Sama sa naobserbaran ni Elder Jeffrey R. Holland sa Korum sa Napulog Duha ka mga Apostoles: “Atong giusik-usikan ang atong bililhong emosyonal ug espiritwal nga kusog kon magsige og hunahuna . . . sa panghitabo sa kasaysayan sa Simbahan nga yanong nagpakita nga ang mga mortal kanunay manlimbasug aron mamahimo unsa ang gipaabut kanila sa Dios.”⁶

Pagsiksik sa Makapadasig nga Paagi

Daghang mga basahon ang nasulat ug daghang mga oras ang gigahin sa pagsuhid sa istorya sa Pagpahiuli. Kini sa kanunay nagdala og dugang panabut, apan nakamugna usab og dili komportabling mga pangutana, ilabi na kon kita wala makasabut sa motibo sa mga tawo nianang panahona. Sayon ra usab nga motutok og maayo sa pagsiksik sa mga reyalidad sa kasaysayan nga mahimong sayop nga nasabtan o wala pa kanato sa karon, apan posible

kanunay nga makakuha og tinuod ug makahuluganong impormasyon sa Usa nga nakasabut sa tanang butang.

Kini tingali ang pinakaimportanting yawe sa tanan: *kon kita lig-on nga nagtuman sa atong mga pakigsaad ug nagkinabuhi nga matinud-anon sa kahayag nga anaa kanato, ang Ginoo mopanalangin sa atong kinabuhi ug mohatag kanato og inspirasyon*. Akong nabati kining malumong kalooy; kini personal gyud kaayo, direkta nga kasinatian tali kanato ug sa atong Langitnong Amahan. Kini kahayag ug kahibalo. Walay igong pagbasa o pagtuon sa mga kasinatian nga nadunggan lang sa mga tawo nga makakompara sa ato mismong kasinatian nga gihatag kanato pinaagi sa kalooy ug gugma sa atong Amahan.

Magpadayon ang mga pangutana samtang kita nagtinguha nga magtuon kada adlaw sa kasulatan ug sa ebanghelyo. Kon gusto sa Ginoo nga tudluan kita, Iya kining buhaton pinaagi sa paghatag kanato og pangutana nga pamalandungon. Ang mga tubag moabut pinaagi sa pagkamatinud-anon sa atong mga pakigsaad ug pagserbisyo sa uban samtang kita nagtuon, tungod kay kini ang dalan sa pagbaton og personal nga kasinatian nga, inig-abut sa panahon, mohatag sa tubag sa tanang mga pangutana. ■

Ang tagsulat nagpuyo sa Georgia, USA.

Ang mga tubag sa daghang pangutana kabahin sa ebanghelyo makita sa lds.org/topics.

MUBO NGA MGA SULAT

1. Tan-awa, sama pananglit, Genesis 25:21–23; Exodo 3:11–22; Mosiah 26; Alma 40; 3 Nephi 27; Doktrina ug mga Pakigsaad 76; 77; 138.
2. Neil L. Andersen, “Pagsulay sa Inyong Hugot nga Pagtuo,” *Liahona*, Nob. 2012, 40.
3. Neil L. Andersen, “Kamo Igo nga Nasayud,” *Liahona*, Nob. 2008, 14.
4. Joseph Fielding Smith, *Answers to Gospel Questions* (1958), 5 vols., 2:191.
5. Personal nga panumduman ni David Farnsworth; ang press conference nahitabo niadtong Ene. 23, 1970, unom ka bulan human sa pag-landig ngadto sa buwan.
6. Jeffrey R. Holland, “Mga Mamumuo sa Ubasan,” *Liahona*, Mayo 2012, 32.



KASIGURADOAN SA DOKTRINA

“Makalahutay ra ko uban sa pipila ka tawhanong mga sayop, gani taliwala sa mga propeta sa Dios—gilauman na kana kay kita mga mortal. Makalahutay ra ko sa gipatuo sa siyensya nga mosukwahi sa Basahon ni Mormon; moabut ang panahon nga makorihian ra kana. Makalahutay ra ko sa daw mga anomaliya sa kasaysayan; ginagmay ra kana itandi sa kamatuoran. Apan dili ko makalahutay kon wala ang mga kamatuoran sa doktrina ug mga ordinansa nga gipahiuli ni

Joseph Smith, dili ko makalahutay kon wala ang priesthood sa Dios aron panalanginan ang akong pamilya, ug dili ko makalahutay kon dili masayud nga ang akong asawa ug ang akong mga anak nabugkos ngari nako alang sa ka-hangturan. Kana ang pagpili nga atong giatubang—pipila ka wala matubag nga mga pangutana itandi sa daghang kamatuoran sa doktrina ug gahum sa Dios.”

Tad R. Callister, kinatibuk-ang presidente sa Sunday School, “What Is the Blueprint of Christ’s Church?” (debosyonal sa CES, Ene. 12, 2014); cesdevotionals.lds.org.

KINAHANGLAN KA NGA MAG-AMPO

Niadtong Enero 12, 2010, ang Langitnong Amahan mipakita kanako sa Iyang gahum human ang upat ka andana nga konkreto nga building nahugno diha nako ug sa akong palibut human sa grabeng linog nga migun-ob sa Haiti.

Samtang nagsyagit nga nadat-ugan sa mga tinumpag, usa ka malinawong tingog ang misulti kanako: “Jimy, nganong dili ka mag-ampo imbis nga mosyagit?”

Dili ko makapugong sa pagsyagit, tungod kay nahadlok ko nga mamatay sulod sa pipila ka minuto. Ang tingog, sama sa tingog sa buotan nga higala nga madasigon kaayong motabang, namulong kanako pag-usab: “Jimy, kinahanglan ka nga mag-ampo.”

Ang kasakit sa akong paa hapit na nga dili maagwanta, ug hapit nako

mahutdan og oxygen diha sa kangitngit sa akong palibut. Ang tingog mi-balik pa pag-usab: “Jimy, kinahanglan ka nga mag-ampo.”

Niining higayona wala nako mag-magahi. Sa luya nga tingog miingon ko: “Langitnong Amahan, Ikaw nasayud sa akong kalig-on, ug Ikaw nasayud hangtud kanus-a nako magwanta kining sakit. Mangamuyo ko Nimo, palihug kuhaa kining kasakit kanako. Sa pangalan ni Jesukristo, amen.”

Diha-diha dayon human og sulti niining yano nga pag-ampo, nakatulo ko. Wala nako kahinumdom sa nahitabo paghuman niadto, apan sa dihang nakamata ko gikan sa lawom nga pagkatulog, ang kasakit nawala. Pagkataud-taud niadto, ang mga tigluwas [rescuers] nakakita nako samtang

sila nangita sa mga biktima diha sa nagun-ob nga office building.

Pagkahuman akong nahibaloan nga sa lima ka mga trabahante diha sa ikaduhang andana sa Port-au-Prince building kon asa ko nagtrabaho, ako lang ang nakagawas nga buhi. Tungod sa kadaut, kinahanglang putlon ang usa sa akong paa ug migahin og pipila ka bulan sa ospital. Apan nasayud ko nga ang Espiritu Santo midasig nako sa pag-ampo ug ang Langitnong Amahan mitubag niadtong pag-ampo.

Makapamatuod ko nga ang Langitnong Amahan motubag sa atong mga pag-ampo sa Iyang kaugalingong paagi ug sumala sa Iyang gusto—bisan asa kita ug bisan kanus-a kita mag-ampo. ■

Jimy Saint Louis, Haiti



ANG AKONG NAKAT-UNAN NAKAUSAB SA AKONG KASINGKASING

Human sa kamatayon sa among 18 anyos nga anak nga lalaki, si Jaxon, naghunahuna ko og lawom sa kalidad ug direksyon sa akong kinabuhi. Duna koy anak nga tua sa kahangturan, ug duna koy dako kaayong tinguha sa pagpuyo sa akong kinabuhi sa paagi nga sa umaabut among matagamtaman ang relasyon sa pamilya. Gusto usab akong mas makasabut sa mga kasulatan aron kini makagiya sa akong kinabuhi.

Wala ko makasiguro kanus-a nagsugod ang akong tinguha sa kasingkasing, apan nadasig kini sa paglaum nga makita pag-usab ang akong anak. Samtang nagbasa ko sa Basahon ni Mormon, nagsugod ko sa pagkamatikod sa unsang paagi ang kasingkasing gihimong simbolo isip kondisyon sa kinabuhi sa tawo o direksyon o

kondisyon sa mga tawo.

Kada higayon nga hisgutan ang kasingkasing, gahi man o humok, maghimo ko og gamay nga pulang kasingkasing sa may daplin. Nagsugod ko sa pagkakita sa mga sumbanan. Kon ang mga kasingkasing sa mga tawo mahumok, duna silay kalig-on sa pag-atubang sa kalisud, ang ilang gugma alang sa uban molambo, ug sila mahimong mas mabination ug malumo. Nakat-unan nako nga ang paghinulsol mao ang makausab sa mga kasingkasing samtang kita motawag sa Manluluwas ug sa Iyang mau-laong sakripisyo.


Nalingaw ko nga nagbasa sa Basahon ni Mormon. Ang akong nakat-unan nakausab sa akong kasingkasing, nga nakausab sa akong kinabuhi. Ang akong nakat-unan

nakatabang usab nako sa akong propesyonal nga trabaho samtang motabang ko sa mga magtiayon sa ilang mga hagit. Akong nasabtan nga ako makatudlo ug makapahinumdom sa mga magtiayon mahitungod sa komon nga mga baruganan nga makahatag og katagbawan sa kaminyoon ug tinuod nga pagkasuod. Apan hangtud nga modala sila og humok nga kasingkasing ngadto sa ilang kaminyoon, gamay ra og kahigayunan nga mahitabo o molahutay ang kausaban.

Sukad niadtong higayuna nga mi-himo ko og mga kasingkasing diha sa daplin sa pahina sa akong Basahon ni Mormon, ablihan nako pirme aron basahon pag-usab kadtong mga tudling ug nagpadayon sa pagkat-on gikan niadtong mga bersikulo. Nakakita gani ko og bag-ong mga tudling kabahin sa kasingkasing nga akong nalabyan sa unang pagbasa, nga nagpahinumdom nako nga kanunay adunay bag-o diha sa mga kasulatan nga makat-unan, masabtan, ug magamit.

Labing importante, ako mapahinumduman sa gugma sa akong Langitnong Amahan ug sa akong Manluluwas. Tungod niana nga gugma, akong ikauban ang akong pamilya sa kahangturan. Nasayud ako niini sa akong tibuok kasingkasing, diin ako mapasalamaton kaayo. ■

Darcy Logan, Alaska, USA



Ang kasakit sa akong paa hapit na nga dili maagwanta, ug hapit nako mahutdan og oxygen diha sa kangitngit sa akong palibut.



Human sa dinaliang paglimpyo ug pagpasinaw sa sapatos sa akong kompanyon, hinay-hinay nako kining ibalik kon asa kini gibutang.

ANG CELESTIAL NGA SAPATOS SA AKONG KOMPANYON

Daghang tuig ang milabay, human og biya sa Provo Missionary Training Center, miabut ko sa Florida nga mibati nga andam ug naghinamhinam nga magsugod sa mission field. Sa dihang akong nahimamat ang akong bag-ong kompanyon, kami adunay daghan nga mga interes nga managsama ug ang among panagkompanyon daw haum kaayo.

Hinoon, human sa pipila ka semana, nakamatikod ko og pipila ka kalahian. Sama pananglit, andam ko nga mag-tracting kada adlaw, apan ang akong kompanyon dili madasigon nga manuktok sa pultahan. Gani, bisan siya ang senior nga kompanyon, mipili siya nga dili kaayo mobuhat niini.

Nakamatikod usab ko nga ang akong kompanyon ingon og perming moistorya kabahin sa iyang kaugalingon. Ang iyang pamilya arangan, ug daghan siya og nasinati nga ako, gikan sa mas ubos nga kahimtang, wala makasinati.

Kining mga butanga misugod sa pagpalambo og dili komportabing pagbati ngari nako, hapit moabut sa punto sa kalagot. Ang pagbati og kalagot sa akong kompanyon nakaapekto nako sa espirituhanong paagi, ilabi na kon mosulay ko sa pagtudlo sa ebanghelyo. Ako kinahanglan nga adunay buhaton. Sa sinugdanan mikonsiderar ko sa pagpakig-istorya sa akong kompanyon ug yanong magpagawas sa tanan nakong kasagmuyo. Apan mipili ko og laing pamaagi.

Kada buntag ang akong kompanyon ug ako magpuli-puli sa pagshower ug pagpangandam. Samtang naa siya sa shower, nakadesisyon ko nga sekretong moadto sa ubos nga bahin sa iyang higdaanan ug pasinawon ang iyang sapatos. Human sa dinaliang paglimpyo ug pagpasinaw niini, hinay-hinay nako nga ibalik ang sapatos kon asa kini gibutang. Ako kining gibuhat kada buntag sulod sa duha ka semana.

Niining higayona nakamatikod ko nga ang akong kalagot nagsugod og kawala. Samtang nagserbisyo ko sa akong kompanyon, nausab ang akong kasingkasing. Wala ko mosulti kaniya kabahin sa akong ginagmay nga pagserbisyo. Hinoon, usa ka adlaw, ang akong kompanyon misulti nga siya siguro napanalanginan og “celestial nga sapatos” kay dili gyud kini magkahugaw.

Nakakat-on ko og duha ka talagsaong leksyon gikan niining kasinatian. Una, ang tinuod nga problema anaa ra nako—bisan tuod ang hinungdan sa akong mga pagbati gikan sa gawas. Maayo ra ang akong kompanyon.

Ikaduha, nasayud ko nga kasagaran atong serbisyonan kadtong atong gihi-gugma. Apan wala ko makaamgo nga ang samang baruganan epektibo usab sa binali: kita mahigugma niadtong atong giserbisyonan. ■

Michael Reid, Arizona, USA

NAKAILA KO SA TINGOG SA PROPETA

Usa ka Domingo sa gabii mga tulo ka bulan human ako mibalhin gikan sa Mexico ngadto sa Estados Unidos aron moeskwela, namili ko sa daghang mga estasyon sa radyo aron makapaminaw og musika sa Domingo. Samtang naminaw ko sa daghang mga lokal nga mga estasyon, nakadungog ko og pamilyar nga tingog ug mihunong.

Nagtuo ko nga ang tingog iya ni Presidente Gordon B. Hinckley (1910–2008), kinsa mao ang Presidente sa Simbahan nianang higayona. Nakamgo ko nga makatingala nga makaila ko sa iyang tingog. Naanad ko nga maminaw sa kinatibuk-ang komperensya, Church Educational System firesides, ug ubang mga sibya sa Simbahan pinaagi sa tingog sa usa ka Katsila nga maghuhubad nga nagsulti puli sa tingog sa mamumulong. Pero morag nakaila gyud ko nga ang tingog diha sa radyo iya ni Presidente Hinckley.

Dili pa kaayo ko makamao sa Iningles aron makasabut unsay iyang gisulti, apan naminaw lang gihapon ko sa pakigpulong diha sa radyo. Ang iyang tingog nakahatag og kalinaw. Sa dihang nahuman na ang pakigpulong, ang tigbalita sa

radyo miingon, “Bag-o lang natong nadunggan si Presidente Gordon B. Hinckley.”

Nasayud ko nga ang Ginoo mamulong pinaagi sa Iyang mga sulugoon ug nga bisan ang mensahe gikan sa Iyang kaugalingon nga tingog o gikan sa Iyang mga propeta, kini managsama ra (tan-awa sa D&P 1:38).

Naghunahuna ko nga talagsaon kaayo nga ako nakaila sa tingog ni Presidente Hinckley. Nga nakahimo sa ingon nakapamgo nako nga ako gusto kanunay nga makaila sa tingog nga gigamit sa Ginoo sa pagpakigsulti

sa Iyang mga anak—bisan pa sa tinubdan.

“Ang akong mga karnero nagapatalinghug sa akong tingog, ug ako nakaila kanila, ug sila nagasunod kanako,” miingon ang Manluluwas (Juan 10:27).

Sa kalibutan nga puno sa daghang mga tingog—daghang “mga estasyon”—nga kapilian, manghinaot ko nga kanunay nga takus nga makaila sa tingog sa akong Magbalantay ug sa Iyang mga sulugoon ug andam nga mosunod sa ilang tambag. ■
Miriam Ruiz, Utah, USA

Samtang naminaw ko sa daghang mga lokal nga mga estasyon, nakadungog ko og pamilyar nga tingog ug mihunong.



Unsay Among Nakat-unan gikan sa Among mga Ginikanan

Ang mga young adult mipakigbahin kon sa unsang paagi ilang gigamit ang mga leksyon nga ilang nakat-unan gikan sa ilang mga ginikanan.



PAGKUGI SA TRABAHO

Sa akong panimalay nakakat-on ko nga magkugi. Ang akong pamilya naggamit og sistema nga among gitawag og “listahan sa kakugi.” Sa sinugdanan sa bulan, makadawat mi og lista sa lain-laing mga buluhaton, sama sa pagpanghugas, pag-atiman sa mga kabayo, ug uban pa. Among tsikan ang buluhaton inigka human niini, ug dayon sa pagtapos sa bulan, hatagan mi og kantidad sa kwarta sumala sa among pagkugi basi sa gidaghanon sa tsik nga among nabutang sa tsart. Gikan niini nakakat-on ko nga magkugi sa trabaho ug magkontrol sa paggasto sa kwarta.

Peter Stegeby sa Västerbotten, Sweden

MATARUNG NGA PAGKAGINIKANAN

Isip single parent, ang akong inahan daghan kaayo og mga buluhaton, apan mogahin gyud siya og panahon sa pagtabang, paghupay, o yanong pagpaminaw nako. Ang masayud nga anaa siya kanunay bililhon gyud kaayo, ug gusto ko nga ihatag usab kini sa akong mga anak sa umaabut.

Sa dihang naminyo siya og usab, ang iyang bag-ong bana mipili nga mahimong amahan sa akong magulang ug kanako. Sa wala madugay, aduna mi manghud nga gamayng babaye, apan wala gyud koy mabati nga kalainan sa mabination ug mahigugmaong paagi sa iyang pag-atiman kanamo isip iya mismong mga anak. Salamat sa iyang batasan, ang akong magulang ug ako nagdako sa lig-on ug nagkahiusang pamilya uban sa priesthood diha sa balay. Ang adlaw nga kami nabugkos isip pamilya epesyal gyud kaayo. Ang iyang mahigugmaong ehemplo nagtudlo nako nga ang amahan dili lang kon unsa ka—apan unsa ka nga mamahimo.

Amanda Cornelius sa Stockholm, Sweden



BALANONG PROTEKSYON

Sa bata pa ko, ang akong papa nagtrabaho sa layo nga dapit ug kanunay moabut nga gabii na. Magmata ko hangtud nga moabut siya. Apan usa ka gabii dugay kaayo siyang miabut, ug dili nako siya makontak sa telepono. Nahadlok kaayo ko. Nakahinumdom ko sa gisulti sa akong mga ginikanan nga mag-ampo kanunay ug mangayo og tabang kon mahadlok ko, busa miluhod ko ug nag-ampo nga luwas lang nga makauli ang akong papa. Sa akong katingala, sa pagtapos sa akong pag-ampo, nadunggan nako ang pag-abut sa bisikleta sa akong papa sa gawas. Mapasalamaton kaayo ko sa akong Langitnong Amahan sa pagbantay sa akong papa.

Isip usa ka young adult, kon ako maglibog o mahadlok, ang unang tawo nga akong mahinumduman mao ang Langitnong Amahan. Nasayud ko nga naa Siya kanunay ug Siya maminaw sa akong mga pag-ampo.

Rohini Krishnan sa Bangalore, India

PAG-AMPO

Usa ka gabii miadto ko sa kwarto sa akong mga ginikanan kay aduna koy ipangutana sa akong papa, apan siya nagluhod diha sa pag-ampo, busa milakaw ko ug mibalik pipila ka minuto nga anaa gihapon siya sa samang posisyon. Mihukom ko nga mangandam aron matulog, naghuhuna nga siguradong mahuman na siya og ampo kon mahuman ko sa akong buluhaton sa dili pa matulog. Mibalik ko sa kwarto sa akong ginikanan paglabay sa mga 10 minutos nga nag-ampo gihapon siya! Nakakita nianang ehemplo gikan sa akong amahan nakapalig-on sa akong pagpamatuod. Siya sa tinuoray kinasingkasing gyud nga nag-ampo sa Langitnong Amahan.

Jen Hansen sa Idaho, USA



KAMINYOON DIDTO SA TEMPLO

Mapasalamaton ko nga ang akong mga ginikanan mipakigbahin sa istorya sa ilang relasyon ngari nako. Nahimong silang maayo nga managhigala sa edad nga 14, ug dungan nga nagdako ug nag-eskwela. Paglabay sa panahon, ang ilang panaghigalaay milambo ngadto sa matuod nga gugma, ug sila naminyo sa templo. Nagplano ko nga sundon ang ehemplo sa akong mga ginikanan nga magminyo sa templo ug naglaum nga makasinati ko og kalipay ug tinuod nga gugma sama kanila.

Pasăre Ana Maria sa Prahova, Romania





PANIMALAY NGA NAKASENTRONG KANG KRISTO

Si Jesukristo kanunay anaa sa sentro sa relasyon sa akong mga ginikanan. Ilang gitutokan ang paghimo og panimalay diin maanaa ang Espiritu ug himoong prayoridad ang pagtuon sa kasulatan uban ang pamilya, pag-ampo sa pamilya, ug ang family home evening.

Ang akong inahan gitawag nga mag-visit teach sa usa ka batan-ong inahan kinsa nanlimbasug sa bag-ohay lang nga diborsyo. Kadaghan mouli ko sa balay nga nakita akong mama nga nagbantay sa duha ka batang lalaki niini nga babaye. Usahay kami mohapit sa balay niining babaye samtang kami mamalit, ug ang akong mama magbilin og gamayng sulat sa pultahan. Mapasalamaton ko sa ehemplo sa akong mama nga ang gugmang putli “dili mangita alang sa iyang kaugalingon” (Moroni 7:45).

Ang akong mga ginikanan kanunay nagkat-on ug naggamit sa ilang bag-ong mga kahanas ug kahibalo sa pagtukod sa gingharian sa Dios. Tungod sa ilang ehemplo, akong gihimo ang edukasyon nga prayoridad sa akong kinabuhi. Ang ehemplo sa akong mga ginikanan nakapahimo nako nga maminyo sa usa ka lalaki kinsa si Jesukristo mao usab ang sentro sa iyang kinabuhi.

Rachel Nielsen sa Utah, USA



MAGSALIG SA LANGITNONG AMAHAN UG NI JESUKRISTO

Ang akong papa makaayo sa tanang butang. Isip usa ka tin-edyer, nangutana ko niya kon giunsa niya nga makaayo og tarung sa mga butang. Siya miingon, “Sa dili pa siya magsugod og trabaho, mag-ampo ko nga mangamuyo sa Langitnong Amahan sa pagtabang nako. Dayon motrabaho ko.” Ang iyang ehemplo nagtudlo kanako nga magmapainubsanon ug tinguhaon ang langitnong inspirasyon.

Kon ang akong inahan mawad-an og kadasig, nakakaplag siya og kaayohan ug kalinaw diha sa tiilan sa Manluluwas. Kon ako adunay susama nga mga panghitabo, siya modasig nako nga mosalig sa gahum sa Pag-ula. Isip usa ka young adult, padayon nakong makaplagan ang kalinaw ug makahupay nga gugma sa Manluluwas pinaagi sa pagsunod sa iyang matarung nga ehemplo.

Isak Malm sa Jönköping, Sweden



DIOSNONG KINAIYA

Sa dihang bata pa ko, ang akong mga ginikanan natisok ngari kanako ang gugmang putli gikan sa akong Amahan sa Langit. Nailhan nako Siya samtang ang akong mama mokanta og “Ako Anak sa Dios” (*Mga Himno ug mga Awit sa mga Bata*, nu. 58) ngari kanako, ug sa paglabay sa panahon ang ehemplo sa akong mga ginikanan nahimong talagsaon nga inspirasyon aron masayud ug mohigugma sa akong Amahan sa Langit pinaagi sa pagserbisyo ug sa matitud-anong pagtambong sa mga miting ug kalihokan sa Simbahan.

Marlin Ortega Vásquez sa Managua, Nicaragua

Usa ka Bag-ong Destinasyon

Ni Amancay Kotecka-Miño

Usahay ang akong kinabuhi ingon og usa ka padayon nga biyahe sa eroplano. Ang akong mama usa ka Ecuadorian ug ang akong papa usa ka Polish. Natawo ako sa Ecuador, apan sa dihang 10 anyos na ko mibalhin mi sa Spain. Nagpuyo ra mi didto sulod sa duha ka tuig. Sa dihang 12 anyos nako, milupad na usab ang eroplano, niining higayuna padulong sa Poland. Nangandoy ko nga mapermanente, mga higala ug paryente naa sa duol, ug maundang na ang pagsiglang og panamilit.

Unang Pakighimat uban sa mga Elder

Dihay nanuktok sa pultahan. Akong giablihan ug nakita ang duha ka batan-ong mga lalaki nga nagbarug. Sa walay tahud, akong gisirhan ang pultahan sa wala pa sila makasulti.

“Ablihi ang pultahan pag-usab ug pangayo og pasaylo,” mitingog ang akong papa nga mimando gikan sa luyo sa balay. “Wala kami magtudlo nimo sa pagtagad sa mga tawo ingon niana!”

Medyo nangyam-id, akong giablihan ang pultahan. “Pasayloa ko,” miingon ko.

“Gusto kong makahibalo mahitungod ninyo, mahitungod sa inyong pagtuo. Palihug sulod,” miimbitar ang akong amahan. Ang batan-ong mga lalaki mipaila sa ilang mga kaugalingon nga mga misyonaryo sa Ang Simbahan ni Jesukristo sa mga Santos sa Ulahing mga Adlaw.

Nagduha-duha, naminaw ko sa ilang mensahe—sa edad nga 13, ako walay kapilian kondili sa pag-apil.

Upat ka bulan ang mga misyonaryo mibisita sa akong balay, nagtudlo sa mga doktrina sa gipahiuli nga Simbahan ni Jesukristo. “Gitahud namo ug gidayeg ang inyong kaisug, apan kami dili gayud mousab sa among relihiyon,” sa katapusan giingnan sila sa akong amahan, ug wala na gayud namo makita pa ang maong mga elder.

Usa ka Tinguha sa Pagpangita sa Kamatuoran

Milabay ang duha ka tuig, ug ang pag-usab-usab sa sirkumstansya sa pamilya nakapaguol nako pag-ayo. Ang akong papa mibiya sa Poland aron mangita og trabaho mao nga nabalhin ang among pamilya. Gibati nako ang pagkadesperado, nangita sa Dios. Mas nahimong sinsero ang akong mga pag-ampo, nangamuyo sa Langitnong Amahan sa pagtabang nako nga makaplaga sa Iyang presensya.

Usa ka adlaw ang akong inahan misulti kanako, “Dunay tawo nga ginganlan og Garling nangita nimo. Giingnan nako siya nga motawag og balik sa sunod semana.” Nasayud siya nga usa kadto ka misyonaryo ug wala mainteresado sa mensahe, mao nga siya wala mobati nga gikinahanglan motubag siya dayon.

Nianang pagka-Biyernes sa gabii nakadungog ko nga dihay nanuktok sa pultahan. Niining higayuna akong gihatagan ang mga misyonaryo og

Ang akong tibuok kinabuhi ingon og walay hunong nga pagsakay sa eroplano. Nangandoy ko og kalinaw ug kapermanente apan wala gayud kini makaplaga hangtud nga tinud-anay akong midangop ngadto sa Ginoo.

sinsero nga pag-abi-abi ug mipahiyom. “Welcome mo sa akong panimalay, apan kinahanglan ninyong masayran nga ako dili gayud mahimong usa ka Mormon,” giingnan nako sila.

Gitudloan gihapon ko sa mga elder—kada Biyernes sa hapon sulod sa unom ka mga bulan. Human makakaon og daghang mga biskwit ug liboan ka pangutana, ang akong importante nga mga pangutana natubag. Ingon og sa matag higayon nga ang mga misyonaryo mobisita, laing piraso sa puzzle sa kinabuhi nasulbad. Naintriga, sa katapusan akong gibuhathang gihangyo sa mga elder nga akong buhaton: sa pag-ampo ug pagpangutana sa Langitnong Amahan kon ang ilang mga pulong ug ang Basahon ni Mormon tinuod ba. Ilang gipaniguro nako nga ang Dios motubag sa mga pag-ampo.

Kumpirmasyon ug Pagduha-duha

Samtang ako nag-ampo ug nagtuon sa mga kasulatan nga mas

lawom, kini nga mga doktrina nahimong tam-is sa akong kalag. Sulod sa daghang mga bulan ako nagduhaduha, mibati nga nagkinahanglan ko og solido nga ebidensya, kinahanglan nga masayud sa tanan mahitungod sa ebanghelyo sa dili pa moapil niini

dili dawaton sa mga minahal.

Sa hinay-hinay, mga sayop ug mga desisyon nakapabungol nako sa mga hung-hong sa Espiritu. Ang akong mga kasulatan gibutang sa labing lawom nga bahin sa akong kaban ug gani ako mihunong sa pag-ampo.



nga Simbahan. Sa katapusan, ang mga pulong sa Manluluwas sa Juan 20:29 namulong sa akong kalag: “Daglaygon kadtong wala managpakakita, ngani nanagpanoo.” Nakahukom ako nga magpabunyag.

Ang akong mga ginikanan miingon nga maghulat ko hangtud nga ako usa na ka hamtong aron magpabunyag, apan ang panahon sa paghulat nakatabang sa akong pag-uswag ug kahibalo sa ebanghelyo. Subo lang, samtang ang akong petsa sa bunyag nagkaduol, ako nawad-an og pagsalig sa akong tubag. Nadani ako sa mga butang sa kalibutan ug nahadlok nga ang akong pagpili nga magpabunyag

Ang mga Panalangin sa Paghinulsol

Lahi ang gidangatan sa akong kinabuhi—daghang mga luha ug mga kahigawad. Lisud kaayo sabton nganong ang akong pamilya kinahanglang makasinati og daghan kaayong mga pagsulay. Sa wala pa magsugod ang akong katapusang tuig sa high school, ang akong mga ginikanan kinahanglang mobiya sa Poland. Ang gipaabut nga pagbalhin pag-usab nakapaguol nako. Sa katapusan, miluhod ako pag-usab sa pag-ampo, tinud-anay nga misulti sa mga pulong: “Langitnong Amahan, ang Imong pagbuot mao ang matuman, dili akooa.”

Kana nga pag-ampo mitimaan sa sinugdanan sa akong pagbalik sa Simbahan, nga ako nasayud nga nagkinahanglan og paghinulsol. Niana nga Dominggo, sa unang higayon sa hapit usa ka tuig, ako mitambong og sakrament miting. Pagkasunod adlaw ako nakahukom pag-usab nga magpabunyag.

Ang Ginoo mitabang kanako sa akong malisud nga proseso sa pagbalik ngadto sa unsay akong nahibaloan nga tinuod. Karon akong giisip kadtong malisud nga mga kahimtang nga pipila sa pinakatam-is nga mga panalangin gikan sa Dios. Wala Niya ako kalimti. Naminaw Siya sa akong mga pag-ampo ug naghulat nako nga makaila sa Iyang tubag. Mitabang siya kanako sa tanang pag-antus nga akong nasinati, milig-on ug nanalipod nako. Pinaagi niini ako nakabaton og mas klaro nga kahulugan sa balaan nga misyon ni Kristo ug sa Iyang Pag-ula.

Nabunyagan ko niadtong Abril 2011. Ang akong eroplano milupad na usab sukad—karon ako nagpuyo sa France, nga nagpasabut og dugang nga mga kausaban. Hinoon, ako karon mapasalamaton ngadto Kaniya alang sa akong kinabuhi ug alang sa mga sirkumstansya nga Iyang gihatag nako nga akong puy-an. Tungod sa akong pagpamatuod sa Pag-ula ni Jesukristo, karon nakasabut na ko nga wala ko maginusara, bisan unsa nga sunod nga destinasyon ang ihatag sa kinabuhi. Wala ko masayud kon molupad ba pag-usab ang akong eropano. Ang bugtong butang nga akong nahibaloan mao nga ang akong bag-ong destinasyon mao kanang hignipit nga dalan nga paingon sa kinabuhing dayon uban sa Langitnong Amahan ug sa Iyang Anak, si Jesukristo. ■
Ang tagsulat nagpuyo sa France.

KALIG-ON NGA LAPAS SA ATONG KAUGALINGON

*Ang makaabag nga gahum sa Pag-ula ni Jesukristo molig-on
kanato sa pagbuhat ug pagkahimong maayo ug sa pagserbisyo
nga lapas sa indibidwal natong tinguha ug natural nga kapasidad.*



**Ni Elder
David A. Bednar**

Sa Korum sa
Napulog Duha ka
mga Apostoles

Nagtuo ko nga daghang mga miyembro sa Simbahan ang mas pamilyar sa kinaiyahan sa makatubos ug makalimpyo nga gahum sa Pag-ula kay sa makalig-on ug makaabag nga gahum. Usa ka butang ang pagkasayud nga si Jesukristo mianhi sa yuta aron mamatay alang kanato—kana usa ka mahinungdanon ug nag-unang mga baruganan sa doktrina ni Kristo. Apan kinahanglan usab kita nga mopasalamat nga ang Ginoo nagtinguha, pinaagi sa Iyang Pag-ula ug pinaagi sa gahum sa Espiritu Santo, nga *mopuyo* kanato—dili lamang sa pagtudlo kanato apan sa paghatag usab kanato og gahum.

Kadaghanan kanato nasayud nga kon kita nagbuhat og sayop nga mga butang, kita nagkinahanglan og tabang sa pagbuntog sa mga epekto sa sala diha sa atong mga kinabuhi. Ang Manluluwas mibayad sa bili ug mihimo niini nga posible alang kanato nga malimpyo pinaagi sa Iyang matubsanong gahum. Kadaghanan nato klaro nga nakasabut nga ang Pag-ula alang sa mga makasasala. Wala ko makasiguro, hinoon, nga kita nakahibalo ug nakasabut ba nga ang Pag-ula alang usab sa mga santos—alang sa buotang mga lalaki ug mga babaye kinsa masulundon, takus, ug mainampingon ug kinsa naningkamot nga mahimong mas maayo ug magserbisyo nga mas matunud-anon. Tingali

kita nasayop nga nagtuo nga kinahanglang mopaingon gikan sa maayo ngadto sa mas maayo ug mahimong usa ka santo pinaagi lamang sa atong kaugalingong hugot nga deteminasyon, kabubut-on, ug disiplina ug uban sa atong klarong limitadong mga kapasidad.

Ang ebanghelyo sa Manluluwas dili lamang kay mahitungod sa paglikay sa kadautan sa atong kinabuhi; kini usab kabahin sa pagbuhat ug pagkahimong maayo. Ug ang Pag-ula naghatag og tabang nato sa pagbuntog ug paglikay sa dautan ug sa pagbuhat ug pagkahimong maayo. Ang tabang gikan sa Manluluwas anaa alang sa tibuok nga panaw sa pagka-mortal—gikan sa pagkadautan ngadto sa pagkamaayo ngadto sa mas maayo ug sa pag-usab sa atong kinaiya.

Ako wala magsugyot nga ang matubsanon ug makaabag nga mga gahum sa Pag-ula managbuwag ug managlahi sa usag-usa. Hinoon, kining duha ka dimensyon sa Pag-ula konektado ug nagkompleto sa usag usa; kining duha kinahanglan nga maglihok sa tanang ang-ang sa panaw sa kinabuhi. Ug importante sa mahangturon nga kitang tanan makaila nga kining *duha* ka importanting mga elemento sa panaw sa pagkamortal—ang pagsalikway sa kinaiyanhon nga pagkatawo ug mahimo nga usa ka santos,

magbuntog sa dili maayo ug mahimong maayo—matuman pinaagi sa gahum sa Pag-ula. Ang indibiwal nga kabubut-on, kaugalingong determinasyon ug pagdasig, epektibo nga pagplano ug paghimo og mga tumong gikinahanglan apan sa katapusan dili igo sa atong madaugon nga pagkompleto niining mortal nga panaw. Sa tinuod, kinahanglan kitang mosalig sa “mga maayo nga buhat, kalooy, ug grasya sa Balaang Mesiyas” (2 Nephi 2:8).

Ang Grasya ug ang Makaabag nga Gahum sa Pag-ula

Sa LDS Bible Dictionary atong makat-unan nga ang pulong nga *grasya* gigamit kanunay sa mga kasulatan nga nagpasabut sa makaabag nga gahum:

Ang “[Grasya mao] ang pulong nga gibalik-balik kanunay diha sa Bag-ong Tugon, ilabi na diha sa mga sinulat

ni Pablo. Ang importante nga ideya sa pulong mao ang *balaang paagi sa tabang o kusog*, gihatag pinaagi sa buhong nga kalooy ug gugma ni Jesukristo.

“Pinaagi sa grasya ni Ginoong Jesus, nahimong posible pinaagi sa Iyang maulaon nga sakripisyo, nga ang tawo mabuhi ngadto sa pagka-imortal, ang matag tawo makadawat sa iyang lawas gikan sa lubnganan sa usa ka kahimtang sa walay katapusan nga kinabuhi. *Pinaagi usab kini sa grasya sa Ginoo nga ang mga indibidwal*, pinaagi sa hugot nga pagtuo sa pag-ula ni Jesukristo ug paghinulsol sa ilang mga sala, *makadawat og kalig-on ug tabang sa paghimo og maayong mga buhat nga dili unta nila mahimong mapadayon kon sa ilang kaugalingong mga paagi lamang. Kini nga grasya mao ang makaabag nga gahum* nga nagtugot sa mga lalaki ug mga babaye nga

makaangkon og kinabuhing dayon ug kahimayaan human nila mahimo ang ilang labing maayong mga paningkamot” (Bible Dictionary, “Grace”; emphasis gidugang).

Ang grasya mao ang balaan nga tabang o langitnong tabang nga gikinahanglan kaayo sa matag usa nato aron mahimong sarang sa celestial nga gingharian. Sa ingon, ang makaabag nga gahum sa Pag-ula molig-on kanato sa pagbuhat ug pagbinuotan ug pagserbisyo nga lapas sa indibidwal natong tinguha ug natural nga kapasidad.

Sa akong personal nga pagtuon sa kasulatan, kanunay nakong isukip ang pulong nga “makaabag nga gahum” kon akong masugatan ang pulong *grasya*. Hunahunaa, pananglit, kini nga bersikulo nga pamilyar natong tanan: “Kita (Kami) nasayud nga pinaagi sa grasya kita (kami) maluwas, human





sa tanan nga atong mabuhat” (2 Nephi 25:23). Nagtuo ko nga daghan kita og makat-unan niining importante nga bahin sa Pag-ula kon atong isukip ang “makaabag ug makalig-on nga gahum” matag higayon nga makita nato ang pulong *grasya* diha sa mga kasulatan.

Ang Ehempro ni Nephi

Ang panaw sa pagka-mortal mao ang pag-usab gikan sa pagkadautan ngadto sa pagkamaayo ngadto sa mas maayo ug sa pag-usab sa atong kinaiya. Ang Basahon ni Mormon puno sa mga ehempro sa mga disipulo ug mga propeta kinsa nahibalo, nakasabut, ug nausab pinaagi sa makaabag nga gahum sa Pag-ula sa paghimo niana nga panaw. Samtang kita mas makasabut niining sagrado nga gahum, ang atong panglantaw sa ebanghelyo mapalapdan pag-ayo ug mapalambo. Ang ingon nga panglantaw mousab kanato sa talagsaong mga paagi.

Si Nephi maoy usa ka ehempro sa usa ka tawo kinsa nahibalo, nakasabut, ug nagsalig sa makaabag nga gahum sa Manluluwas. Hinumdumi

nga ang mga anak nga lalaki ni Lehi mibalik sa Jerusalem aron agnihon si Ishmael ug sa iyang pamilya ngadto sa ilang kawsa. Si Laman ug ang uban sa pundok nga nagbiyahe kauban ni Nephi gikan sa Jerusalem balik ngadto sa kamingawan misupak, ug si Nephi miawhag sa iyang mga igsoon sa pagbaton og hugot nga pagtuo sa Ginoo. Mao kining higayuna sa ilang panaw nga ang mga igsoon ni Nephi migapos kaniya ug miplano sa iyang kamatayon. Palihug timan-i ang pag-ampo ni Nephi: “O Ginoo, sumala sa akong hugot nga pagtuo diha kanimo, luwasa ako gikan sa mga kamot sa akong igsoon nga mga lalaki; oo, gani *hatagan mo ako sa kusog nga ako makabugto niini nga mga pisi* diin ako gigapos.” (1 Nephi 7:17; emphasis gidugang).

Nasayud ba kamo unsa untay akong iampo kon gigapus pa ako sa akong mga igsoon? “Palihug tabangi ko nga makagawas niini nga sitwasyon KARON!” Nakapaikag kaayo nako nga si Nephi wala mag-ampo nga usbon ang iyang mga kahimtang. Hinoon, nag-ampo siya alang

sa kalig-on sa pag-usab sa iyang mga kahimtang. Ug ako nagtuo nga nag-ampo siya niining paagi tungod kay nakahibalo, nakasabut, ug nakasinati siya sa makaabag nga gahum sa Pag-ula.

Wala ko magtuo nga ang mga gapos nga gigapos ni Nephi nanga-badbad lang gikan sa iyang mga kamot ug pulso. Hinoon, nagtuo ko nga gipanalanginan siya og determinasyon ug personal nga kusog lapas sa natural niyang kapasidad, nga siya “pinaagi sa gahum sa Ginoo” (Mosiah 9:17) naningkamot ug milubag ug mibira sa mga pisi, ug sa katapusan ug sa tinuoray naabagan sa pagbugto sa mga gapos.

Ang implikasyon niini nga istorya alang sa matag usa kanato yano ra. Samtang kamo ug ako makasabut ug mogamit sa makaabag nga gahum sa Pag-ula sa personal natong kinabuhi, mag-ampo kita ug magtinguha sa kalig-on sa pag-usab sa atong mga kahimtang kay sa mag-ampo nga ang atong mga kahimtang mausab. Kita mahimo nga mga tinugyanan kinsa naglihok kay sa mga butang nga aghaton sa paglihok (tan-awa sa 2 Nephi 2:14).

Ang Manluluwas Nahibalo ug Nakasabut

Sa Alma kapitulo 7 atong makat-unan sa unsang paagi ug ngano ang Manluluwas makahatag sa makaabag nga gahum:

“Ug siya magpadayon, mag-antus sa mga *sakit* ug mga *kasakit* ug mga *pagtintal* sa matag matang; ug kini aron ang pulong matuman nga nag-ingon nga siya modala diha kaniya sa mga *sakit* ug mga *balatian* sa iyang mga katawhan.

“Ug siya modala diha kaniya sa kamatayon, nga siya mahimo nga moadbad sa mga higot sa kamatayon diin naghigot sa iyang mga katawhan; ug siya modala diha kaniya sa ilang mga *kahuyang*, nga ang iyang

kasingkasing mahimo nga mapuno uban sa kalooy, sumala sa unod, nga siya mahimo nga masayud sumala sa unod unsaon pagtabang ang iyang mga katawhan sumala sa ilang mga kahuyang” (Alma 7:11–12; emphasis gidugang). Ang Manluluwas nag-antus dili lamang sa atong mga kadautan apan usab alang sa kawalay kaangayan, sa kasakit, sa kaguol, ug sa emosyonal nga mga

kalisud nga kanunay nga naghasol kanato.

Walay pisikal nga kasakit, walay tumang kaguol sa kalag, walay pag-antus sa espiritu, walay sakit o kahuyang nga inyo ug akong masinati panahon sa atong mortal nga panaw nga wala masinati og una sa Manluluwas. Kamo ug ako sa higayon sa kahuyang mahimong motuaw, “Walay usa nga nakasabut. Walay usa nga

nakahibalo.” Walay tawo, tingali, ang nakahibalo. Apan ang Anak sa Dios hingpit nga nakahibalo ug nakasabut, kay Iyang nabati ug napas-an ang atong mga alantuson sa wala pa nato kini masinati. Ug tungod kay Iyang nabayran ang labing taas nga bili ug mipas-an sa alantuson, Siya hingpit nga nakasabut sa atong pagbati ug makalugway ngari nato sa Iyang buktion sa kalooy sa daghang mga bahin sa atong kinabuhi. Siya makakab-ot, makahikap, makaabag—tinud-anay nga magdali og duol kanato—ug makalig-on kanato nga mahimong mas labaw kay sa ato mismong mahimo ug makatabang kanato sa pagbuhat niana nga dili gayud nato mahimo nga nagsalig lamang diha sa atong kaugalingong gahum.


“Umari kanako, kamong tanan nga nabudlay ug nabug-atan, ug papahulayon ko kamo.

“Isangon ninyo ang akong yugo diha kaninyo, ug pagtuon kamo gikan kanako; kay ako maaghup ug mapaubsanon sa kasingkasing; ug makakaplag kamog pahulay alang sa inyong mga kalag.

“Kay masayon ang akong yugo, ug magaan ang akong luwan” (Mateo 11:28–30).

Ako mohatag sa akong saksi ug mopasalamat sa walay katapusan ug mahangturong sakripisyo ni Ginoong Jesukristo. Nasayud ko nga ang Manluluwas buhi. Akong nasinati ang Iyang matubsanon nga gahum ug ang Iyang makaabag nga gahum, ug ako mopamatuod nga kini nga mga gahum tinuod ug magamit sa matag usa kanato. Sa pagkatinuod, “sa kusog sa Ginoo” kita makabuhay ug makabuntog sa tanang mga butang samtang mopadayon sa atong panaw sa pagkamortal. ■

Gikan sa “Ang Pag-ula ug ang Panaw sa Pagka-mortal,” Liahona, Abril 2012, 12–19.





Ni Randall L. Ridd

Ikaduhang
Magtatambag
sa Kinatibuk-ang
Kapanguloan sa
Young Men

Ayaw Husgahi KON SI KINSAY ANDAM NA

*Dili gyud ka masayud kon
si kinsay andam na nga
modawat sa ebanghelyo.*

Kanunay gyud nakong mahi-numdoman ang panihapon sa ika-40 nga high school reunion. Nabalaka ko nga mahimamat ang mga higala sa una nga wala na nako makita sulod sa daghang katuigan ug masayran unsay nahitabo sa ilang kinabuhi sukad sa high school.

Samtang nag-istorya mi sa may lamesa nga adunay 8 o 10 ka mga klasmeyt atol sa panihapon, usa sa akong higala, si Greg Link, naghigot nga siya nabunyagan sa Simbahan sa dihang siya anaa sa edad nga mga 20.

Dayon siya prangka nga nangutana: “Nganong wala may usa kaninyo nga mihtag nako og Basahon ni Mormon samtang high school pa ta? Wala ba mo maghunahuna nga ako mahimong miyembro sa Simbahan?”

Laing higala—kinsa dili miyembro sa Simbahan—miingon, “Unta imoha na

to ang usa ka kopya nga naa nako; gihatagan ko og mga 50 niini!”

Nakuratan ko. Balik sa high school, kon inyo kong giingnan nga si Greg mabunyagan ug mahimong malam-pusong makadasig nga mamumulong, dili gayud unta ko motuo niini. Ganahan kaayo ko ni Greg. Siya usa ka matinud-anong higala nga makasalig mo kon kamo nagkinahanglan niya. Apan kahibalo ko nga siya ganahan og party, ug siya may kalagmitan nga maapil sa away. Wala gyud ko maghunahuna nga siya mainteresado nga maminaw sa Simbahan. Ang makalin-gaw kay, nagtuo gyud ko nga ang laing higala, kinsa akong gipakigbahin sa ebanghelyo ug gani gihatagan og kopya sa Basahon ni Mormon, magpamiyembro sa umaabut nga ad-law. Ang tinuod kay, dili mo masayud kon si kinsay andam nga modawat sa ebanghelyo ug si kinsay dili.

Naulaw ko og gamay human sa among panag-istoryahanay ni Greg tungod kay ako, sama sa uban, wala mopakigbahin sa ebanghelyo niya. Nangutana ko niya kon unsay nakapahimo niya nga mamiyembro sa Simbahan. Mao kini ang iyang istorya:



Ang akong pamilya mibalhin sa Siyudad sa Salt Lake, Utah, sa dihang ako mga 11 anyos, apan wala ko magpamiyembro sa Simbahan hangtud ko nga nag-24 anyos. Naghinumdom, akong makita nganong walay mopakigbahin sa ebanghelyo. Dili ko makita nga ideyal nga tawo nga istoryahan sa ebanghelyo. Sa tinuoray, ako medyo kiat nga bata. Kanunay ko nga adunay makaaway ug maapil sa kagubot sa eskwelahan.

Ako adunay daghang mga higala nga LDS, apan usa ra gyud ang nakig-istorya kanako kabahin sa Simbahan. Ug kana tungod kay ako siyang gisungog sa pagbasa sa Basahon ni Mormon kon siya magbantay sa bata.

Hinoon, nakuryuso ko sa mga butang. Gidala ko ni mama sa lokal nga Kristyanong simbahan. Kausa nangutana ko nila nganong si Jesus wala moanhi sa Amerika. Morag ila ko nga gikatawan sa pagpangutana niini, busa wala na ko mangu-tana og lain pa.

Paglabay sa pipila ka tuig mihukom ko nga mobisita sa

visitors' center sa Temple Square sa Siyudad sa Salt Lake. Adunay diorama ni Kristo sa Amerika. Diha-diha dayon akong nahinumduman ang akong mga pangutana kabahin niini nga hilisgutan sa dihang batan-on pa ko. Mao kadto ang higayon nga ang Espiritu mitandog kanako, ug nasayud ko nga andam nakong maminaw.

Ang ehemplo sa akong mga higala gikan sa high school akong nahinumduman. Gani, ang mga tawo nga akong gitahud pag-ayo kay mga LDS. Si Randy Ridd ug iyang asawa miadto sa akong eskwelahan. Sila kanunay talagsaong mga ehemplo, buotan kaayo nga mga tawo. Kana adunay dakong epekto ngari kanako sa wala madugay. Naghunahuna ko, "Kon si Randy nagtuo nga kini tinuod, kini importante gyud kaayo."

Wala ko masayud kon unsay mahitabo kon sila mas mipakigbahin pa sa ebanghelyo niadtong panahona. Posible nga dili pa ko andam. Apan sa paghinumdom, unta ila kining gibuhat. Nasa-yud ko nga kini unta adunay epekto ngari kanako.



ANG GINOO NAG-ANDAM SA IYANG MGA ANAK

"Ang Ginoo nahigugma sa tanan Niyang mga anak. Siya nagtinguha nga ang tanan makadawat sa hingpit Niyang kamatuoran ug kaabunda sa Iyang mga panalangin. Siya nasa-yud kon kanus-a sila andam, ug gusto Niya nga kita maminaw ug mosunod sa Iyang direksyon sa pagpakigbahin sa Iyang ebanghelyo. Kon ato kining buhaton, kadtong mga andam na motubag sa Iyang mensahe nga Iyang giingon, 'Ang akong mga karnero nagapatalinghug sa akong tingog ... ug sila nagasunod kanako' (Juan 10:27)."

Elder Dallin H. Oaks sa Korum sa Napulog Duha ka mga Apostoles, "Sharing the Gospel," *Liahona*, Ene. 2002, 9.

Mapasalamaton ko nga ang akong ehemplo adunay postibo nga epekto kang Greg. Hinoon, mas maayo ang akong pagbati, kon ako adunay gibuhat kabahin niini nianang higayona. Kon gipakigbahin lang nako ang ebanghelyo o ang Basahon ni Mormon o gani giimbitar lang si Greg sa usa ka kalihokan, kini nakausab unta sa iyang kinabuhi. Siguro mas sayo siya nga nagpamiyembro sa Simbahan. Siguro nakaserbisyo siya og misyon.

Nakakat-on ko nga ang maayo nga ehemplo sa tinuoray importante, ug mao usab ang

responsibilidad sa pagpakigbahin sa ebanghelyo. Gimandoan kita sa Ginoo nga buhaton kini: "Panglakaw kamo sa tibuok kalibutan, ug iwali ninyo ang maayong balita ngadto sa tibuok nga kabuhatan" (Marcos 16:15).

Busa ayaw kahadlok sa pagpakigbahin. Labaw pa, ayaw pagdali-dali sa paghusga kon kinsay andam ug kinsay dili andam. Basin og matingala mo kansang kasingkasing ang napa-humok, bisan kon kana nga interes dili gayud ninyo makita. ■

PAGBATON OG KAISUG SA PAGPAKIGBAHIN SA EBANGHELYO



Nagkinahanglan og kaisug ang pagpakigbahin sa ebanghelyo ngadto sa usa ka estranghero. Panguntan-a lang ang usa ka bag-ong full-time nga misionaryo. Usahay magkinahanglan pa og dugang kaisug sa pagpangutana sa inyong mga higala kon sila gahan ba nga masayud kabahin sa Simbahan, sa Basahon ni Mormon, o sa atong mga pagtuo.

Maghunahuna mo: Unsa kaha kon dili sila interesado? Unsa kaha kon sila malain? Unsa kaha kon ila ko nga kataw-an? Unsa kaha kon sila masilag nako ug dili na gustong makigkita kanako pag-usab?

Ayaw og kabalaka. Dili gyud kana mahitabo. Ang inyong mga higala posibling mosulti lang, “Dili, salamat na lang.” Ayaw katingala kon adunay motubag, “Sige,

sultii pa ko og dugang”—ilabi na kon kamo nagsunod sa ebanghelyo.

Si Elder M. Russell Ballard sa Korum sa Napulog Duha ka mga Apostoles miingon: “Mga miyembro kita sa gipahiwali nga Simbahan ni Jesukristo, nga gihatagan og gahum ug gipadala Mismo sa Ginoo sa pagpangita, pag-amuma, ug pagdala ngadto sa Iyang Simbahan, kadtong kinsa nangita sa kamatuoran.”

Sumala nianang panglantaw, ang pagpakigbahin sa ebanghelyo “yano ra ug klaro.” Apan, miangkon si Elder Ballard, “ang misionaryo nga buhat mahagiton ug usahay makahadlok.”

Unsaon nato pagbuntog nianang kahadlok? Si Elder Ballard misugyot og tulo ka paagi:

UNA, *pag-ampo sa inyong kaugalingon ug sa inyong pamilya* nga ang Ginoo motabang kaninyo nga makakita og paagi sa pagpakigbahin sa ebanghelyo. (Tan-awa ang sidebar kon unsay gibuhay sa usa ka batan-ong babaye sa Brazil.) Usab, hangyog ang Ginoo sa paggiya kaninyo ngadto niadtong andam na.



IKADUHA, *mahimong ehemplo*. Sa kalibutan nga nagkaubos ang mga sumbanan, ang inyong mga higala makamatikod sa inyong kahayag. Ang inyong personal nga katakus mohatag kaninyo og kaisug ug espiritwal nga gahum.



IKATULO, *gamita ang inyong pagtuo ug salig sa Ginoo* ug kanunay pakita og gugma alang sa uban.



“Ang ubang mga miyembro moingon, ‘mahadlok ako nga mopakigbahin sa ebanghelyo tungod kay ako makasilo unya og tawo,’” miingon si Elder Ballard. “Ang kasinatian nagpakita nga ang mga tawo dili masilo kon ang pagpakigbahin giaghat sa espiritu sa gugma ug pagpakabana. Sa unsang paagi masilo ang uban kon kita moingon: ‘Ganahan kaayo ko sa paagi sa simbahan sa pagtabang nako’ ug dayon modugang bisan unsay igiya sa Espiritu?”¹

Ang buluhaton sa pagpakigbahin sa ebanghelyo anaa sa tanang miyembro sa Simbahan—lakip ninyo. Busa pagmaisugon ug tuguti ang Ginoo sa pagpanalangin sa inyong mga paningkamot. ■

MUBO NGA SULAT

1. M. Russell Ballard, “Ang Mahinungdanon nga Tahas sa Miyembro nga Misyonaryo nga Buhat,” *Liahona*, Mayo 2003, 38, 39–40.



ANG KAISUG SA MGA TUMUTUO

“Uban sa kaisug sa akong konbiksyon, hinaut nga kita mopahayag, uban ni Apostol Pablo, ‘Kay wala ko igakaulaw ang ebanghelyo ni Kristo’ (Mga Taga-Roma 1:16). Ug dayon, uban nianang sama nga kaisug, hinaut nga kita mosunod sa tambag ni Pablo: ‘Sa mga magtutuo, pagkinabuhi ingon nga panig-ingnan sa sinultihan ug sa paggawi, sa gugma, sa pagtuo, sa kaputli’” (1 Timoteo 4:12).

Presidente Thomas S. Monson, “Magmakusganon Ka ug Magmaisug,” *Liahona*, Mayo 2014, 69.

ANG LABING BILILHONG BUTANG NGA AKONG NAANGKON

Ni Mariana Santos

Sa among komperensya sa kabatan-onan sa multistake, kaming tanan nakadawat sa Basahon ni Mormon ug gidapit mi sa paghatag niini ngadto sa usa ka tawo. Gusto nakong ihatag kini sa akong paborito nga pop singer.

Sa dihang akong nahibaloan nga siya dunay konsyerto sa among siyudad, naghunahuna ko nga kini ang nindot nga oportunidad. Ang matag usa sa iyang mga konsyerto dunay sistema nga mopili og 15 ka mga fans nga moadto sa luyo sa entablado ug makighimamat niya. Imposible kaayo nga mapili, apan misulod gihapon ko.

Pipila ka semana sa wala pa ang konsyerto, akong gisulat ang akong pagpamatuod sa Basahon ni Mormon ug nagampo. Akong gipasabut sa Langitnong Amahan nga lisud kaayo nako ug nga nagkinahanglan ko sa Iyang tabang.

Sa akong pagsulti og “amen”, ang akong cell phone mi-bagting nga ang tawag gikan sa opisina sa singer. Napili ko!

Sa luyo sa entablado nianang adlaw sa konsyerto, akong gihatag sa singer ang basahon. Giablihan niya ug gibasa ang akong pagpamatuod: “Naggahin ko og daghang mga oras sa paghunahuna og bililhon, mapuslanon nga regalo alang nimo. Akong naamguhan nga kinahanglan kong mohatag kanimo og usa ka butang nga bililhon tungod sa unsay anaa niini ug dili tungod sa kantidad. Mao kini ang Basahon ni Mormon; mao kini ang labing bililhong butang nga akong naangkon. Mao usab kini nganha nimo kon basahon nimo kini.”

Iya kong gigakus ug miingon nga basahon niya kini. Wala ako makapugong sa mga luha!

Talagsaon nga kasinatian ang paghatag og Basahon ni Mormon ngadto sa usa ka inila nga tawo. Apan ang paghatag sa basahon kinahanglang usa ka komon nga kasinatian. Makahatag ako niini ngadto sa usa ka higala sa eskwelahan, usa ka silingan, o bisan kinsa.

Ang paghatag og Basahon ni Mormon, pagpamatuod, paghisgot mahitungod sa Simbahan, ug pagpakita og ehemplo mao ang atong mga katungdanan. Kinahanglang dili gayud kita maulaw sa pagpakigbahin sa ebanghelyo ni Jesukristo.

Ang tagsulat nagpuyo sa Manaus, Brazil.



HINUMDUMI nga Ila Kanang Pagpili

Ang kabubut-on para sa tanan, lakip niadtong inyong gidapit sa pagkat-on kabahin sa Simbahan.



KANUNAY MOIMBITAR, UG MOIMBITAR SA TANAN.

Tungod kay imposible nga masayran daan kon si kinsa ang mainteresado o dili mainteresado sa ebanghelyo, kanunay mo nga mopakigbahin ug ipakigbahin kini kutob sa inyong mahimo, maminaw sa mga pagdasig sa Espiritu. Kita molampos isip misyonaryo kon kita modapit sa mga tawo sa pagkat-on ug pagdawat sa kamatuoran.

Samtang mag-imbatar kamo sa uban sa pagkat-on sa ebanghelyo, importante nga masayud nga sila adunay kabubut-on sa pagpili nga dawaton o dili dawaton ang inyong imbitasyon. Ang inyong kalampusan wala masukod sa ilang tubag; kini gisukod sa inyong pasalig sa pagpakigbahin.

Busa kon ang kalampusan wala masukod kon si kinsa ang miingon og oo o si kinsay nabunyagan, unsay *angay* ninyong tutukan samtang maghimo kamo og mga tumong sa misyonaryo nga buhat? Tutuki kon unsay *inyong* mahimo kay sa unsay itubag sa uban. Hinumdumi, kamo usab adunay kabubut-on. Kamo makapili nga:



PABILIN NGA MAGMAHIGALAON.

Kon ang tawo dili modawat sa imbitasyon nga dugang magkat-on, padayon nga magmatinahuron ug magmabination. Ipabilin ang panaghigalaay basta nagsunod gihapon sa taas nga sumbahan. Ipabati ang Kristohanong gugma sa tanan, bisan kon wala sila makasabut sa inyong gituohan ug gibuhat.

MAGPABILING MATINUD-ANON.

Maayo kaayo kini nga pagkaskulti sa Manluluwas: “Pasigaa ninyo ang inyong kahayag sa atubangan sa mga tawo aron makita nila ang inyong mga maayong buhat ug dayegon nila ang inyong Amahan nga anaa sa langit” (Mateo 5:16). Higugmaa ug sunda ang ebanghelyo, ug sa dili madugay inyong *makaplagan* ang mga tawo nga gustong masayud kon ngano ug kinsa andam nga modawat sa ebanghelyo.



PAGTUO SA PAGPAKIGBAHIN

“Gitahud nato ang matag usa nga pagpili ug ang tayming. Miingon ang Ginoo, ‘Himoa nga ang matag tawo mopili alang sa iyang kaugalingon’ (D&P 37:4). Ang kakulang sa interes sa usa ka tawo kinahanglang dili mopaminos sa atong panaghigalaay ug gugma. Dawaton man o dili ang inyong pag-imbatar nga “umari kamo ug makita ninyo,” inyong bation ang pag-aprubar sa Ginoo ug niana nga pag-aprubar, dugang sukod sa pagtuo sa pagpakigbahin og balik sa inyong gituohan.

Elder Neil L. Andersen sa Korum sa Napulog Duha ka mga Apostoles, “Usa Kini ka Milagro,” *Liahona*, Mayo, 2013, 79.

Unsaon nga Mahimong Malampusong Misyonaryo?

Nangita pa og laing mga tip kon unsaon nga mahimong mas malampuson nga misyonaryo? Susiha ang 10 ka talagsaong mga ideya sa pahina 12 sa *Isangyaw ang Akong Ebanghelyo: Usa ka Giya sa Misyonaryo nga Pangalagad* (2004).

KANUNAY NGA MAGMAPAILUBON.

Sama sa gipakita sa istorya sa tuo, usahay molungtad og daghang imbitasyon sa dili pa moabut ang husto nga panahon. Padayon sa pagpangita og oportunidad sa pagpakigbahin sa ebanghelyo, padayon nga magmahigalaon, ug ayaw pagkawala og kadasig. Ang Ginoo nasayud sa inyong mga paningkamot ug Siya mopanalangin kaninyo. (Tan-awa sa D&P 98:2.) ■

NAGSIGE KOG PANGUTANA

Ni Meiry Susana da Silva Rosa

Nasayud ko nga kitang tanan kinahanglang mopakigbahin sa ebanghelyo, apan wala gyud ko magmalampuson. Dayon, atol sa klase sa Spanish nga akong gikuha, nakahimamat kog batan-ong lalaki nga ginganlan og Tiago. Nagkahigala kami ug kasagaran magkuyog paglakaw pauli gikan sa eskwelahan. Usa ka adlaw nakalabay mi og LDS chapel nga bag-o lang natukod.

“Miyembro ako sa Ang Simbahan ni Jesukristo sa mga Santos sa Ulahing mga Adlaw sulod na sa daghang mga tuig,” miingon ko. Akong gipakigbahin kaniya ang pipila ka mga butang nga atong gituohan, ug misulti kaniya nga napanalangin ang akong pamilya ug ako tungod sa ebanghelyo. Giimbitar nako siya nga motambong sa miting nianang pagka-Dominggo sa alas 9:00 sa buntag.

Miabut ang Dominggo ug madasigon akong naghulat, apan wala siya moabut. Niana nga semana, giimbitar nako siya pag-usab. Nagpadayon kini matag semana sulod sa duha o tulo ka bulan. Kanunay siyang mohatag nako og rason nganong wala siya moabut: “Dugay kong nakatulog,” “Gikapoy ko,” “Adunay mga problema.” Apan kanunay kong nanghangyo niya, ug daw wala siya magpakabana.


Usa ka Dominggo sa buntag milingkod ko sa usa sa mga lingkuranan sa luyo sa chapel. Pipila na lang ka minuto sa dili pa magsugod ang miting sa dihang dunay hinay nga mitawag nako. Mitan-aw ko sa pultahan, ug diha si Tiago.

“Dili ba misaad man ko kanimo nga usa ka adlaw moanhi ako?” miingon siya. Mitambong siya sa sakrament miting, ug sa akong katingala, nagpabilin sa ubang mga miting ug daw nalipay sa dihang akong gipaila-ila siya sa mga misyonaryo. Nagsugod siya sa pagpakigmiting nila kanunay. Si Tiago ug ako nagpadayon sa pag-istoryahanay samtang kami maglakaw pauli gikan sa eskwelahan, apan ang among panag-istoryahanay kabahin sa mga kamatuoran nga iyang nakat-unan. Nakatubag ko sa mga pangutana ug nakahatag sa akong pagpamatuod. Sa katapusan, nakaangkon siya og pagpamatuod sa iyang kaugalingon ug miapil sa Simbahan.

Karon full-time nga misyonaryo ako sa Brazil Santa Maria Mission. Sa wala pa ako mibiya para sa misyon, si Tiago misumiter usab sa iyang application nga mahimong usa ka full-time nga misyonaryo, ug karon siya nagserbisyo sa Brazil Manaus Mission.

Bag-o akong nakadawat og sulat gikan niya. “Salamat sa imong pagsige og imbitar nako nga mosimba,” misulat siya. “Mapasalamaton ako sa kahangturan.” Dili lang ako malipayon sa pagpakigbahin sa ebanghelyo matag adlaw apan usab nga mahibalo nga mao usab ang gibuhay ni Tiago.

Ang tagsulat nagpuyo sa São Paulo, Brazil.



Sulayi kining 11 ka sayon nga paagi sa pagpakigbahin sa ebanghelyo sa kada adlaw nga panag-istoryahanay.

PAG-IMBITAR UG PAG-FOLLOW UP

Kon kamo gusto nga mopakigbahin sa ebanghelyo apan gikulbaan o dili sigurado kon unsaon sa pagbuhat niini, kini nga artikulo alang kaninyo. Ang pagpakigbahin sa ebanghelyo labaw pa kaysa pag-imitar lang sa imong mga higala sa pagpakighimamat sa mga misionaryo. Nindot kana nga ideya, apan dunay daghan kaayong laing mga butang nga inyong mahimo sa “pag-imitar sa uban sa pagduol ngadto ni Kristo” (*Isangyaw ang Akong Ebanghelyo: Usa ka Giya sa Misionaryo nga Buhat* [2004], 1). Ug mas sayon kay sa inyong gihunahuna. Tingali makatabang ang samingay sa football.

Ang maayong mga magdudula nasayud kon unsaon ug kanus-a mopasa sa bola ngadto sa ilang mga kaubanan sa team sa paghatag kanila og oportunidad sa pagpadayon. Ang pagdapit sa uban nga makat-on sa ebanghelyo sama sa pagpasa sa bola, imbis mohatag lamang nila og oportunidad ngadto kang Kristo.

Aniay pipila ka ideya aron kamo makasugod. Pag-ampo alang sa inspirasyon ug paghunahuna og maayo samtang inyong ipahiangay kini nga mga ideya aron mohaum sa mga tinguha o sitwasyon sa inyong mga higala. Dayon abibaha sila!

Imbitara ang usa ka higala ngadto sa Mutual

Ikaw dunay higala kinsa gusto kaayo og sport. Mao nga kon makadungog kamo nga ang kalihokan sa Mutual karong semanaha mao ang gabii sa mga sports, kamo makahunahuna nga kini mao ang hingpit nga oportunidad sa pag-imbatar niya.

Pag-imbatar og usa ka higala sa pagtambong og kinatibuk-ang komperensya uban ninyo

Naminaw kamo og pakigpulong sa kinatibuk-ang komperensya sa inyong MP3 player samtang kamo naglakaw sa eskwelahan. Dunay usa ka higala nga nangutana kon unsay inyong gipaminaw. Sultih siya sa kamatuoran—nga naminaw mo sa mga pulong sa buhing propeta sa Dios. Unsa man ang ipasabut niana?” ang inyong higala mangutana. Kamo mopasabut mahitungod sa modernong mga propeta ug mga apostoles ug dayon pangutan-a ang inyong higala kon gusto ba siya nga mouban ninyo sa pagka-Abril aron maminaw unsay isulti niadto nga mga lider.

Pagpakigbahin og artikulo gikan sa *Liahona*

Usa sa mga artikulo gikan sa bag-ong isyu sa *Liahona* nagpahinumdom ninyo sa inyong panagistoryahanay sa usa sa inyong mga higala. Kamo mopakigbahin sa inyong kopya sa magasin (o ang internet link) ngadto kaniya ug moimbatar niya sa pagbasa sa artikulo.

Pagsulti sa usa ka tawo mahitungod sa Basahon ni Mormon

Ang inyong ward dunay tumong sa pagbasa sa Basahon ni Mormon hangtud sa katapusan sa tuig, mao nga inyong dad-on ang inyong mga kasulatan ngadto sa eskwelahan. Usa sa inyong mga higala nakakita sa inyong libro ug nangutana kon unsa kini, mao nga inyong ipasabut kon unsa ang Basahon ni Mormon ug ipakigbahin ang inyong pagpamatuod niini.

Basaha unya ang istorya ni Kenneth niini nga artikulo aron makita unsa ang nahitabo sa dihang iyang nakita ang usa ka miyembro sa Simbahan nga dunay Basahon ni Mormon didto sa eskwelahan.



PAG-IMBITAR UG PAG-FOLLOW UP

“Akong pagpamatuod nga samtang kita maghiusa nga molihok, sa pagpangita og usa ka tawo, pag-imbatar, ug sa pag-follow up uban ang pag-salig ug hugot nga pagtuo, ang Ginoo mopahiyom kanato ug gatusan ka libo ka mga anak sa Dios makakaplag og katuyoan ug kalinaw sa Ang Simbahan ni Jesukristo sa mga Santos sa Ulahing mga Adlaw.”

Elder M. Russell Ballard sa Korum sa Napulog Duha ka mga Apostoles, “Pag-Follow Up,” *Liahona*, Nob. 2014, 81.



Pag-imbatar og usa ka higala sa pagtambong sa sayaw sa Simbahan

Ang inyong labing suod nga higala midapit ninyo nga makig-uban karong Biyernes, apan kamo adunay sayaw sa Simbahan nianang gabhiona. Imbis mobalibad lang sa imbitasyon, imbitara siya sa sayaw!

Pag-imbatar og higala ngadto sa simbahan

Kamo gihangyo sa pagtudlo og usa ka bahin sa leksyon sa Dominggo. Kon usa ka higala mangutana kon unsay inyong buhaton karong tapus sa semana, imbis dili ninyo buhaton ang inyong mga plano sa Dominggo, ipasabut nga kamo motudlo og usa ka bahin sa leksyon sa simbahan. Nakuryuso ang inyong higala, mao nga inyo siyang imbitaron nga mouban ninyo aron siya makadungog sa inyong pagtudlo.

Pagpakita sa inyong mga higala sa Mormon.org

Ang inyong mga higala dunay daghang mga pangutana mahitungod sa atong mga pagtuo, mao nga ipakita nila ang Mormon.org sa pagtabang nga matubag ang ilang mga pangutana.

GINAGMAY NGA MGA LAKANG SA DALAN SA PAGKAKABIG

Sa unang adlaw sa akong bag-ong eskwelahan, akong namatikdan ang usa ka batang babaye nga lahi sa uban. Siya adunay usa ka lisud nga kinabuhi sa panimalay, ug siya kanunay nga bugal-bugalan sa ubang mga estudyante. Tungod kay ang iyang locker tupad sa ako, wala madugay mas nakaila nako siya. Buotan siya, apan siya adunay kinaiya nga mamalikas.

Akong gipasabut kaniya ang akong mga pagtuo ug ang mga sumbanan nga gitudlo diha sa *Alang sa Kalig-on sa Kabatan-onan*. Interesado kaayo siya. Giimbitar nako siya sa Mutual sulod sa pipila ka semana, ug siya naningkamot nga mabuntog ang mga kinaiya sa pagpamalikas.

Sa kadugayan gihatagan nako siya og kopya sa *Alang sa Kalig-on sa Kabatan-onan* ug usa ka kopya sa *Matinud-anon sa Tinuohan*. Sa pagkasunod nga adlaw sa eskwelahan miingon siya nga siya nakakat-on og daghang bag-o nga mga butang sa duha ka mga booklet. Ako siyang gidapit sa Mutual niana nga gabii, ug samtang kami nanglimpyo pagkahuman, siya miingon, “Hannah, mahimo ba akong bunyagan?”

Mikaging ko. Wala pa gyud ako makatabang og tawo nga mopasakop sa Simbahan. Sa makadiyot nagbarug lang ko—dili ako makasulti—apan sa katarasan akong gigunitan ang iyang kamot ug gidala siya ngadto sa sakop sa kapangulohan sa Young Men, kinsa mitabang sa akong higala nga makigkita sa mga misyonaryo aron siya makasugod sa pagpangandam alang sa bunyag.

Nindot kaayo ang akong gibati nga ang akong higala nakahukom nga magpabunyang. Ang paghunahuna nga ako nakatabang kaniya ngadto sa dalan sa pagkakabig nindot kaayo. Diha-diha misugod ako sa paghunahuna og unsaon sa pagtabang sa uban sa pagsubay sa sama nga dalan.

Hannah Christensen, Idaho, USA



Pagpakigbahin og kasulatan sa text message

Atol sa inyong pagtuo sa kasulatan sa buntag, kamo nakabasa og usa ka bersikulo nga makatabang gayud alang sa usa ka higala kinsa adunay problema karong bag-o. Mopadala mo kaniya og text message nga nagpahibalo kaniya nga kamo naghunahuna kaniya ug nasugatan ang usa ka kasulatan nga tingali magustuhan niya.

Pag-imbitar og usa ka tawo alang sa panihapon

Si papa magluto sa iyang inila nga spaghetti karong semanaha! Nakakita mo og bag-ong estudyante sa inyong eskwelahan nga wala kaayoy daghang mga higala, mao nga kamo mohukom nga imbitaron siya sa panihapon sa pamilya. Kon Lunes kini sa gabii, mahimong hangyoon ninyo siya nga moapil sa family home evening pagkahuman.

Paghangyo og usa ka higala sa pagtabang nimo sa paghimo sa proyekto sa Personal nga Kauswagan o sa Katungdanan ngadto sa Dios

Samtang magplano kamo sa inyong dako nga proyekto, kamo makaamgo nga nagkinahanglan kamo og tabang, mao nga nakahukom kamo nga manghangyo og tabang sa inyong mga higala nga dili miyembro sa simbahan. Kini makahatag kaninyo og oportunidad sa pagpasabut kon ngano nga kamo moserbisyo, ug kamo usab malingaw nga magdungan sa pagserbisyo.

Hatagi ang usa ka higala og *Alang sa Kalig-on sa Kabatan-onan*

Kon ang usa ka higala mangutana nganong nagsunod kamo og mga sumbanan, hatagi siya og kopya sa *Alang sa Kalig-on sa Kabatan-onan* ug hisguti kon sa unsa nga paagi nga ang pagsunod og mga sumbanan nakatabang ninyo nga mobati nga mas malipayon.

Basaha ang istorya ni Hannah niini nga artikulo aron makita giunsa niya sa pagpakigbahin kini nga booklet sa usa ka higala.



GUSTO BA KAMONG MAKAT-ON SA AKONG RELIHIYON?

Adunay lahi kabahin ni Apryl. Dili ko kasulti sa kalainan, apan bisan unsa man kini, usa kini ka nindot nga kalainan. Sa katapusan akong nahibaloan nga siya usa ka Santos sa Ulahing mga Adlaw.

Usa ka adlaw sa paniudto, milingkod ko sa usa ka bakanting lamesa—bakanti gawas sa mga libro ni Apryl nga nagtumpi. Ibabaw sa nagtumpi mao ang Basahon ni Mormon. Miduol ko ug akong gikuha.

“Mitan-aw ko sa imong libro,” akong gisultihan si Apryl sa dihang siya miabut pipila ka minuto ang milabay nga dala ang iyang paniudto. “OK,” miingon siya, morag natingala og gamay.

Mibasa ko og gamay ug ginindutan. Mituo ko sa Dios, apan giisip usab nako ang akong kaugalingon nga usa ka tawo nga hilig og science. Unsay akong

nabasa, hinoon, dunay kamatuoran niini. Posibleng nahitabo gyud kini. Ug kon nahitabo gyud, dayon unsa? Nadasig ang akong kaugalingon sa paghunahuna niini.

Sa dihang nahuman na ang tingpaniudto, akong giuli ang libro ni Apryl niya ug misulod sa akong sunod nga klase. Naghinam-hinam ko sa unsay akong nabasa sa Basahon ni Mormon, apan sa gihapon ako malaw kaayo nga makig-istorya kaniya kabahin niini.

Paglabay sa pipila ka semana, si Apryl miduol nako atol sa panahon sa pagtuon nga seryoso kaayo. “Interesado ka ba gayud nga makat-on sa akong relihiyon?” nangutana siya. “Dunay espesyal nga miting

karong Biyernes alang sa mga tawo kinsa gusto nga masayud mahitungod sa among simbahan,” miingon siya. “Naghunahuna ko nga basin ganahan ka nga moadto.

Ganahan ko. Atol sa miting, ang presidente sa misyon mipasabut sa pipila ka sukaranang mga doktrina sa Simbahan. Ang tanan nga iyang gisulti dunay kahulugan nako. Sa wala madugay gitudloan na ko sa mga leksyon sa misyonaryo. Wala dayon ko makabig, apan human sa pagpuasa ug pag-ampo, ako nakadawat sa akong pagpamatuod ug nabunyagan.

Lahi kaayo ang akong kinabuhi gikan sa unsa unta kini kon wala pa ko modawat sa gipahiuli nga ebanghelyo. Ug kini usa ka maayo nga kalainan.

Kenneth Hurst, Alabama, USA

Ayaw kalimot sa pag-follow up

Human moimbitar, ang sunod nga lakang mao ang pag-follow up. Sa football, ang labing maayo nga mga magdudula nakahibalo nga ang ilang trabaho wala pa mahuman inig pasa nila sa bola—kinahanglan silang mopadayon ug mangitag paagi nga mapasahan sa bola.

Ang pag-follow up mahimo sama ka yano sa pagpangutana sa inyong kauban sa klase sa iyang hunahuna mahitungod sa kasulatan nga inyong gipakigbahin o unsay gibati sa inyong higala human makaadto sa simbahan uban ninyo.

Alang sa usa ka ehemplo kon sa unsa nga paagi nga ang pag-follow up nakausab sa kinabuhi sa batan-ong lalaki, susiha ang istorya ni Kenneth.

Kon kamo mo-follow up human moimbitar sa uban nga makat-on sa inyong mga pagtuo, kamo nagpakita nga kamo nagpakabana sa ilang kalipay. Makamatikod sila sa inyong sinsero nga tinguha sa pagtabang ug mobati sila nga komportable nga mangutana ninyo og dugang nga mga pangutana sa umaabut. ■



*Kini ba sekreto
nga angayng
taguan ni Luisa?*

Pagtug-an sa



Ni David Dickson

Mga Magasin sa Simbahan

Gibase sa usa ka tinuod nga istorya

*“Sama sa gugma Ko diha ninyo,
maghigugmaay” (“Love One Another,”
Hymns, nu. 308).*

Gisiradoan ni Luisa ang iyang libro sa math sa dihang mibagting. Wala sad siya makatutok sa mga problema niini sa milabayng usa ka oras.

Ang uban nga mga estudyante nagdali-dali sa paggawas. Kini mao ang katapusang klase sa Biyernes. Kasagaran maghinaminam usab si Luisa sa katapusan sa semana. Apan karon nabalaka kaayo siya. Sukad sa udto. Mao kad-tong gipangutana siya sa iyang suod nga higala, nga si Carlotta: “Makatago ka og sekreto?”

Niadtong higayona, si Luisa mipa-duol ug madasigong miyango. Ma-ayo siya sa pagtago og mga sekreto. Naghunahuna siya nga sultian siya ni Carlotta bahin sa usa ka gwapong lalaki nga iyang ganahan.

Apan dili gyud maka-lingaw ang sekreto ni Carlotta.

Usa ka tingog ang nakabalda sa paghuna-huna ni Luisa. Siya nami-
lok ug mihangad gikan sa iyang lamesa. “Aduna ka bay pangutana sa imong homework, Luisa?” nangutana ang

mga SEKRETO



“Ang usa ka higala magpakabana. Ang usa ka higala mohigugma. Ang usa ka higala maminaw. Ug ang usa ka higala motabang.”

Presidente Thomas S. Monson, “To the Rescue,” *Liahona*, Hulyo 2001, 59.

iyang magtutudlo. Ang tanang estudyante migawas na sa kwarto.

“Wala,” mitubag si Luisa. Iyang gitan-aw ang mga mata sa magtutudlo. *Kinahanglan* nga iya kining isulti sa usa ka tawo! Apan gipasaad siya ni Carlotta nga dili isulti.

“Kinahanglan kong makasakay sa bus,” daling misulti si Luisa. Iyang gisul-ob ang iyang coat ug nagdali paggawas ngadto sa bugnawng hangin sa tingtugnaw.

Sa tibuok biyahe sa bus sa iyang pag-uli, si Luisa nakulbaan pag-ayo nga dili na niya kini maagwanta. Mi-*huot* iyang dughan, daw lisud kaayo nga iginhawa.

Dili makahunong si Luisa sa paghunahuna sa sekreto ni Carlotta. Sa pagpaniudto si Carlotta miingon nga siya nagbuhat og usa ka makuyaw nga binuhatan. Dili gihapon makatuo si Luisa sa iyang nadunggan. Abi niya kaila siya sa iyang suod nga higala! Dili siya makahunahuna nga si Carlotta mobuhat og usa ka makahadlok nga butang sama niadto. Sa dihang nahuman na ang paniudto, gipasaad ni Carlotta si Luisa nga dili mosulti ni bisan kinsa.

Apan unsaon man kon masakitan si Carlotta?

Si Luisa naningkamot nga ibaliwala ang pagpangatawa ug

panag-istoryahanay sa iyang pali-but diha sa bus samtang iyang gipiyong ang iyang mata ug nag-ampo diha sa iyang kasingkasing.

“Palihug, Langitnong Amahan, tabangi ko unsay angay nga buhaton. Dili ko gusto nga masuko ang akong higala nako. Apan dili usab nako gusto nga may bati nga mahitabo kaniya. Sa pangalan ni Jesu-kristo, amen.”

Ang paglakaw padulong sa balay mora og mas dugay kaysa sagad nga lakaw. Makamatikod kaha si Mama nga adunay problema si Luisa inigabut niya sa balay? Unsa man ang iyang isulti?

Nagtan-aw sa snow diha sa yuta, si Luisa nakahimumdom sa snowball fight nga giduwa niya ug ni Carlotta uban sa laing mga bata diha sa parke sa miaging semana. Makalingaw kaayo kadto! Naghunahuna usab siya sa ubang mga butang nga ganahan kaayo niya ug ni Carlotta nga dungang buhaton. Magkuyog. Mag-hiking. Magbuhat sa homework. Magdula og sport.

Unsa kahay mahitabo kon isulti ni Luisa ang iyang sekreto ug dili na ganahang makighigala si Carlotta kaniya? Kini nga paghunahuna daw nakapasakit ni Luisa.

Dayon nakahunahuna siya og lain. Sa karon ang pinakaimportanting butang mao ang unsay labing ikaayo ni *Carlotta*—dili kon unsay hunahunaon ni Carlotta kabahin *niya*. Si Carlotta nanginahanglan og tinuod nga higala, usa ka higala nga mosigurong luwas siya. Si Luisa nasayud nga kanunay buhaton ni Jesus kon unsay labing ikaayo sa uban, bisan ang ubang mga tawo dili maganahan *Niya*.

Si Luisa nasayud na kon unsay angay niya nga buhaton. Kinahanglan niyang sultian si Mama kabahin niini. Iya usab nga tawagan si Carlotta ug sultian kon unsa siya ka nabalaka niya ug nagkinahanglan siya og tabang sa usa ka hamtong. Tingali si Carlotta makig-istorya usab sa iyang mama.

Migaan ang pamati sa kasingkasing ni Luisa samtang siya naglakaw padulong sa atubangan nga pultahan.

“Ma?” nanawag siya samtang misulod sa balay. “Mahimo ba nga mag-istorya ta?”

Si Carlotta mahimong masuko, apan si Luisa nasayud nga kini mao ang husto nga buhaton. Siya mahimong tinuod nga higala.

Pipila sa mga sekreto importante ra kaayo aron itago. ■

Ni Jan Pinborough
Mga Magasin sa Simbahan

KANUS-A Ako Mosulti?



Kon ang usa ka tawo—

Magdula og makuyaw nga dula
Maggamit og tambal nga dili ilaha
Magkaon, mag-inom o magsimhot og butang nga lahi
Magpasakit sa ilang lawas
Maghimo og butang nga dili nila gustong mahibaloan
sa mga hamtong

Kon dunay tawo nga—

Mosulay sa pagpabuhay ninyo og bisan unsa gikan sa lista sa ibabaw
Magpakita og mga litrato sa mga tawo nga walay sinina
Mohangyo ninyo nga motan-aw o mohikap sa ilang lawas o sila motan-aw o mohikap
sa inyong lawas.
Mohangyo ninyo sa pagtipig og sekreto nga makahimo ninyo nga mobati og dili maayo
Mangaway ug walay tahud ninyo o sa usa ka tawo—sa linawas, pinaagi sa teksto, o diha
sa internet

Kon dunay—

Mopabati ninyo nga dili
luwas o dili komportable
Ingon og dili sakto o mo-
pabati ninyo nga dunay
sayop

Paminaw sa Espiritu Santo
ug salig sa inyong mga
pagbati!

Kinsa ang Akong Sultihan?

Ginikanan, apohan, o tigbalantay
Maestra o magtatambag
Magtutudlo o lider sa Simbahan
Magulang nga lalaki o babaye
Doktor
Higala nga makatabang sa pagsulti sa usa ka hamtong

Dili kinahanglan nga mag-inusara kamo sa usa ka sekreto. Usa ka
hamtong makatabang ninyo nga mahibalo unsay buhaton. Padayon
sa pagsulti sa mga tawo hangtud kamo makakuha
sa tabang nga inyong gikinahanglan.
Pagmaisugon! Kamo lig-on. Ang pagsulti makatabang ninyo
ug sa uban nga mahimong luwas! ■

LINAIN NGA SAKSI



**Ni Elder
Robert D. Hales**

Sa Korum sa
Napulog Duha ka
mga Apostoles

*Ang mga sakop sa
Korum sa Napulog
Duha ka mga Apos-
toles gitawag nga
linain nga mga
saksi ni Jesukristo.*

Nganong kinahanglan nga **MAMINAW** kita sa kinatibuk-ang komperensya?



*Gikan sa "Kinatibuk-
ang Komperensya:
Paglig-on sa Pagtuo
ug Pagpamatuod,"
Liahona, Nob. 2013,
6–8.*


Akong isaad nga kon
kamo maminaw, bation
gyud ninyo ang Espiritu.

Atong madawat ang
pulong sa Ginoo nga
alang gayud kanato.

Pinaagi sa mga
komperensya malig-on
ang atong pagtuo ug
mapalambo ang atong
pagpamatuod.

Kon mag-ampo kamo
sa tinuoray aron ma-
kadungog sa tingog sa
Langitnong Amahan
diha sa mga mensahe
niini nga komperensya,
madiskubrihan ninyo nga
Siya namulong kaninyo sa
pagtabang kaninyo.

Si Jesukristo mipakita og hingpit nga ehemplo nga atong sundon. Magamit ninyo kini nga kalihokan sa pagkat-on og dugang mahitungod Kaniya ug sa pag-andam alang sa Pasko sa Pagkabanhaw. Sugdi sa numero 1 sa Dominggo sa dili pa ang Pasko sa Pagkabanhaw. Matag adlaw, pagbasa og mahitungod ni Jesus ug tubaga ang pangutana. Dayon guntinga ang haum nga litrato ug idugang kini ngadto sa tsart.



Pag-andam alang sa Pasko sa

1

1. Gihugasan ni Jesus ang mga tiil sa Iyang mga disipulo ug mihupay nila pinaagi sa pag-ingon, “Kinahanglan dili magkaguol ang inyong kasingkasing ni magtalaraw” (Juan 14:27). Unsa ang inyong mahimo sa pagserbisyo o paghupay sa usa ka higala karon?

2

2. Atol sa Katapusang Panihapon, si Jesus mitudlo sa Iyang mga disipulo sa pag-ambit sa sakrament. Miingon Siya kanila, “Buhata ninyo kini sa paghandum kanako” (Lucas 22:19). Unsa ang usa ka paagi nga kamo mas makapakita og balaan nga pag-tahud panahon sa sakrament?

3

3. Sa dihang si Jesus misugod sa Pag-ula didto sa Tanaman sa Getsemani, Iyang gibuhat ang unsay gusto sa Langitnong Amahan Kaniya nga buhaton, bisan tuod kini lisud kaayo. Nag-ampo Siya, “Dili ang akong pagbuot maoy matuman, kondili ang imo” (Lucas 22:42). Unsa ang usa ka paagi nga kamo mas masulundon diha sa simbahan, sa eskwelahan, o sa panimalay?

Pagkabanhaw

4

4. Sa dihang gipasakitan sa mga tawo si Jesus panahon sa Paglansang, Siya miingon, “Amahan, pasayloa sila; kay wala sila makasabut sa ilang ginabuhat” (Lucas 23:34). Nganong importante ang pagpasaylo sa ubang mga tawo?



5. Si Jesus misiguro nga ang Iyang inahan maatiman human Siya mamatay. Siya misulti kang Juan, “Tan-awa ang imong inahan,” o sa pagtagad ni Maria ingon og iyang kaugalingon nga inahan (Juan 19:27). Unsa ang inyong mabuhat karon sa pagtabang sa inyong mga ginikanan o mga tigbantay?

5



6

6. Sa wala pa Siya mamatay, si Jesus nag-ampo ngadto sa Langitnong Amahan ug miingon, “Sa imong mga kamot itugyan ko ang akong espiritu” (Lucas 23:46). Sa unsang paagi nga ang inyong mga pag-ampo mahimong mas espesyal?



7. Human Siya namatay, si Jesus nabuhi pag-usab! Mao kini ngano nga kita mosaulog sa Pasko sa Pagkabanhaw. Si Kristo mibisita sa Iyang mga disipulo human sa Pagkabanhaw ug miingon, “ayaw na nianang pagkadili matinuohon, hinonoa magmatinuohon ka” (Juan 20:27). Nganong importante kaayo ang Pasko sa Pagkabanhaw?

7



DIHA-DIHA

Base sa usa ka interbyu ni
Richard M. Romney

Mga Magasin sa Simbahan

Ako si Magnolia. Mosimba ko sa
ward diin nagkinatsila kami.
Usa ka adlaw si Mia misulod sa
akong klase sa Primary. Iningles
ra ang iyang masulti. Gusto kong
motabang ni Mia nga mobati nga
giabi-abi, busa mihukom ako sa
pagtabang kaniya. Ako ang mahimo
niyang *tighubad!*

PAG-APAS

*Sa sinugdanan lisud ang pag-apas kon
ako mohubad alang ni Mia. Dayon ang
mga magtutudlo mihinay aron paghatag
nako og panahon. Kaming tanan mibati
og nindot nga kami makatabang ni Mia.*

TABANGI KAMI!

Unsaon ninyo sa pagpakita
sa inyong gugma pinaagi
sa pagtabang sa uban?
Subaya sa pag-drawing ang
inyong kamot ug padad-i
kami sa inyong istorya ug
litrato, uban sa pagtugot sa
inyong ginikanan. Bisitaha
ang liahona.lds.org o email
liahona@ldschurch.org.

DAGHAN OG KAPAREHA

*Sa wala madugay kami
gibunyagan ug nakum-
pirmahan. Kaming duha
ganahan og musika, ilabi
na sa mga himno ug
mga kanta sa Primary.
Kaming duha ganahan
sa family home evening.
Ug kaming duha gana-
han nga mobasa sa
mga istorya sa
Liahona.*

Ang usa ka
tighubad mohubad sa
mga pulong nga gisulti
sa usa ka tawo ngadto sa
laing pinulongan.

MAGNOLIA

nga Pagsabut

GIHUNG-HONG NGA TABANG

Ako si Mia. Ang akong mga ginikanan Kinatsila ang sinultihan, busa miadto kami sa ward nga nagsulti og Kinatsila. Wala ko makasabut unsay gisulti sa mga tawo. Nakakita si Magnolia nga ako nahigawad. Mitapad siya kanako ug mihung-hong og Iningles sa akong dunggan.



UNSAON NINYO SA PAGTABANG

Mga Tip gikan ni Mia ug Magnolia:

Kon dunay:

- Bag-o sa simbahan o sa eskwelahan, tabangi siya nga mobati nga giabi-abi.
- Dili moadto sa simbahan kanunay, dapita siya nga mouban ninyo.
- Giaway, labani siya. Sultihi ang imong magtutudlo.
- Daw nagsubo, dapita siya sa pag-apil ninyo.
- Nagkinahanglan og higala, hangyoa siya nga mahimo ninyong higala. Uban sa pagtugot sa inyong mga ginikanan, dapita siya sa pagdula.

Kon kamo makasulti og sobra sa usa ka pinulongan, tanyag sa paghubad.

BUOTANG MGA HIGALA

Pagkahuman sa Primary, nangutana ko ni Magnolia kon mahimo ba nako siyang higala. Miingon siya og oo. Gikan nianang higayuna, si Magnolia nahimo nakong higala ug akong tighubad. Mitabang siya nako nga makahigala sa uban usab.

BUHATA UNSAY BUHATON NI JESUS

Ang tanan makatabang sa mga tawo, sama ni Magnolia nga mitabang nako. Pag-ampo. Ang Langitnong Amahan motabang ninyo nga makahibalo kinsa ang tabangan. Sama kini sa kanta, "If The Savior Stood Beside Me" (Friend, Okt. 1993, 14). Makasulay kita sa pagbuhat unsay gusto ni Jesus nga atong buhaton. ■

MIA

Ang Istorya sa Tawo nga Buotan ug sa Tawo nga Boang-boang

UNSA ANG SAMBINGAY?

Ang sambingay usa ka espesyal nga matang sa istorya. Kini nagsaysay sa yanong mga butang, sama sa unos o perlas, nga pamilyar. Si Jesus nagsaysay og mga sambingay aron pagtabang sa mga tawo nga makasabut sa espirituhanong kamatuoran. Usa ka sambingay anaa sa Mateo 13:44–46. Unsay gitudlo niini kon unsa ka bililhon ang ebanghelyo? Makabasa pa mo og ubang mga sambingay?

Ni Jean Bingham

Usa ka adlaw gusto ni Jesus nga tudluan ang mga tawo kon unsaon nga magpabiling lig-on bisan sa kalisdanan. Siya misaysay kanila kabahin sa dakong unos, sa tawo nga buotan, ug tawo nga boang-boang. Sa dihang miabut ang unos, ang balay sa tawo nga buotan wala matumpag tungod kay kini natukod diha sa bato. Apan ang balay sa tawo nga boang-boang natumpag tungod kay kini natukod diha sa balas.

Si Jesus nagtudlo kon unsa kaimportante nga magbaton og pagtuo Kaniya ug mosunod sa Iyang mga pagtulun-an. Kon kita magpalambo og lig-ong pagpamatuod, kita may igong kalig-on nga mobarug, bisan unsa pa nga kalisdanan ang moabut. ■

Ang tagsulat nagpuyo sa Utah, USA.

BATO O BALAS?

Isulat ang mga kalihokan sama sa ubos diha sa ginunting nga papel. Pagpuli-puli sa pagpili ug pagbasa niini nga kusog. Hisguti nganong ang pagbuhat niini susama sa pagtukod og balay diha sa bato o balas. Sa unsang paagi ang pagpaminaw sa mga propeta makatabang nato sa pagsunod sa mga pagtulun-an ni Jesus ug paghimo og maalamong mga pagpili?

Pagbasa og dungan sa mga Kasulatan	Pagpangopya sa buluhaton sa ekswelahan
Buhaton ang hagit	Pagpaapil sa usa ka bag-o nga tawo
Pagsimba	Paggamit og makapasakit nga mga pulong
Pagpasangil sa uban sa nahimong sayop	Pakigdula sa igsoon
Pagbuhat sa homework	Pagpakigbahin sa uban
Pagtahud sa uban	Paggahin og daghang oras sa mga dula sa computer
Pagsulti sa tinuod	Pagkuha og gamit nga dili inyo
Pagpabiling hilom samtang ang usa ka tawo gidaug-daug	Pag-ampo kada buntag ug gabii
Pagpaminaw sa kinatibuk-ang komperensya	Pagpaapil sa usa ka tawo nga wala maapil

ROCK ART

Pagpili og hamis nga bato. Gamit ang marker o pintal, isulat ang "Jesukristo" niini. Pagpamulong nganong importante kaayo nga itukod ang atong kinabuhi sa lyang mga pagtulun-an. Ibutang ang bato sa dapit diin inyo kining makita kanunay.



TIP SA KASULATAN


Ang Basahon ni Mormon makatabang nato nga makasabut sa Bag-ong Tugon. Basaha sa Helaman 5:12. Unsay inyong nakat-unan kabahin sa kahulugan sa pulong nga *bato* gikan sa pagbasa niining bersikulo? Tan-awa ang "Rock" diha sa Guide to the Scriptures aron makakita og dugang mga bersikulo nga makatabang ninyo nga mas makasabut.

PANAG-ISTORYAHANAY SA PAMILYA

Basaha og dungan ang Mateo 7:24–29. Makadrowing usab kamo og litrato kabahin sa istorya. Dayon makahisgot mo kabahin niining mga pangutana: Unsay mga butang sa atong kinabuhi nga sama sa ulan ug hangin? Sa unsang paagi ang pagdesisyon sumala sa unsay sikat sama sa pagtukod og balay diha sa balas? Sa unsang paagi ang pagsunod sa mga pagtulun-an ni Jesus makaprotektar nato ug makapalig-on nato sama sa balay nga natukod diha sa bato? Paghisgot og mga paagi nga inyong mapalig-on ang inyong pagtuo diha kang Jesukristo.

Kanta: "The Wise Man and the Foolish Man" (*Children's Songbook*, 281)

Kasulatan: Mateo 7:24–29



GIHIGUGMA AKO SA LANGITNONG AMAHAN
"Gihatagan ko Niyag mata aron nindot nga butang makit-an. Gihatagan ko Niyag dalunggan aron nindot nga tingog mabatian. . . . Gihigugma ko sa Amahan"
(Children's Songbook, 228).



Ni Bonnie L. Oscarson

Kinatibuk-ang Presidente
sa Young Women

MGA KASULATAN ubos sa mga Bitoon



“Akong masayran, nga tinuod ang mga kasulatan” (Children’s Songbook, 109).

Sa dihang bata pa ko, ang akong Sigsoong mga lalaki ug ako ganahan nga matulog sa gawas panahon sa ting-init. Among ibukhad ang among mga banig sa balkonahe, dayon mangita og mga constellation sa mga bitoon ug maminaw sa mga gangis hangtud kami makatulog.

Usa ka gabii ang akong magulang nga si Larry ug ako anaa sa balkonahe. Kami nanghigda ug nagtan-aw sa mga bitoon. Si Larry dili sagad nga istoryador, apan niadtong gabhiona siya miingon nga gusto ko niyang suginlan og mga istorya. Iya kong gisuginlan og mga istorya gikan sa Basahon ni Mormon, sugod ni Lehi ug sa iyang

pamilya nga mibiya sa Jerusalem.

Nakadungog ko og mga istorya gikan sa Basahon ni Mormon sa Primary kaniadto, apan sa dihang gisugilon kini ni Larry, lahi kini. Kini mabati nga mas tinuod. Samtang nagtan-aw ko sa mga bitoon ug naminaw sa akong igsoon, mibati ko og kainit ug kalipay diha sa akong kaugalingon. Bisan tuod og wala ko kahibalo niini kaniadto, akong nabati ang Espiritu Santo nga nagdasig kanako nga ang Basahon ni Mormon tinuod.

Paglabay sa pipila ka bulan, nakakita ko og mga gihulagway nga mga istorya gikan sa Basahon ni Mormon sa among balay. Sa dihang ako kining gisugdan og basa, nabati nako ang sama nga kainit, makahupay nga pagbati nga akong nabati

sa dihang gisuginlan ko ni Larry sa samang mga istorya.

Paglabay sa mga tuig, sa dihang nagtimbang-timbang ko kon aduna ba koy pagpamatuod, nagguol ko kay wala koy dako o lig-ong tubag. Nagpasabut ba kini nga ako walay pagpamatuod? Dayon akong nahinumduman ang akong gibati sa dihang ang akong magulang nga lalaki misugilon kanako sa mga istorya gikan sa Basahon ni Mormon, ug akong nasayran nga ako *nasa-yud* nga ang Simbahan tinuod.

Ang usa ka pagpamatuod dili kanunay moabut pinaagi sa usa ka dakong panghitabo. Kasagaran kini naggikan sa gamay, hilom nga mga panghitabo diin ang Espiritu Santo naghunghong kanato nga kining mga butanga tinuod. ■

Pagkatulog sa Sabado ug mga Pahiyom sa Dominggo

Ni Miche Barbosa

Gibase sa usa ka tinuod nga istorya “*Kanunay ko nga malipayon kon mosimba ko*” (Children’s Songbook, 157).

Si Mara ganahan nga **S**makapahiyom sa mga tawo. Siya makapahiyom sa iyang magtutudlo sa eskwelahan kon iisa niya iyang kamot aron mangutana. Siya makapahiyom sa iyang igsoon, si Marcella, kon siya mosulti og maayong mga butang ngadto kaniya.

Dayon si Mara mopahiyom usab. Nindot ang pagbati nga

makatabang sa ubang tawo nga malipay.

Apan adunay usa ka panahon kada semana nga si Mara maglisud gyud sa pagpahiyom. Kadto nga panahon mao ang sayo sa Dominggo sa buntag. Kana ang panahon nga si Mara ug Marcella kapuyon pag-ayo. Ang pagdali-dali aron mangan-dam para mosimba nakapakulismaot nila. Dayon kapoy kaayo nga maglakaw padulong sa simbahan. Sobra kini sa usa ka milya! Si

Mara ug Marcella kanunay ma-
ulahi. Dili sila makatambong sa
unang bahin sa Primary.

“Mingawon mi ninyo kon dili
mo makaabut sa saktong oras
dinhi,” kausa miingon si Sister
Lima. Siya ang presidente sa
Primary sa ilang ward sa Brazil.

Si Mara nasayud nga kinahang-
lan niyang moabut sa saktong
oras sa pagsimba. Apan unsaon?





Dayon nakahunahuna og ideya si Mara. Sa sunod Sabado sa gabii, si Mara mihukom nga mobuhat og bag-o nga butang.

Imbis nga mag-snacks sa dili pa matulog human og paniha-pon, iyang gisipilyohan iyang ngipon. Kasagaran si Mama kinahanglang mopahinumdom sa mga babaye nga pawungon ang TV ug matulog. Bisan pa niini sila magdula ug maghung-hungay nga nagtabon hangtud sa gabii na kaayo. Usahay dugay kaayo silang matulog nga mag-lisud sila og buka sa ilang mata. Kinahanglan nilang maglihok-lihok aron dili sila makatulog.

Karong gabhiuna si Mara nag-pajama ug mihigda dayon sa higdaanan. Wala na gani siya pahinumdumi ni Mama. Nagsugod siya sa pagtan-aw sa mga litrato sa atubangan sa iyang Basahon ni Mormon.

“Unsay imong gibuhat?”

Nangutana si Marcella.

“Usa ka pagsulay,” miingon si Mara. Siya puno sa malipayong hunahuna. Dugang pa siya mibati na nga katulugon.

Ang sunod nasayran ni Mara, ang adlaw misidlak na sa iyang bintana. Hapit na ang oras nga mangandam para mosimba. Imbis nga mobati og dili maayo, nindot kaayo ang pamati ni Mara. Ang iyang ulo wala malipong. Ang

iyang lawas wala gikapoy.

Miabut siya sa Primary nga wala pa ang ubang mga lider.

“Salamat sa imong maayong ehemplo para sa ubang mga bata,” miingon si Sister Lima.

Karon turno na ni Mara nga mopahiyom. Siya mihukom nga kanunay matulog og sayo ma-Sabado. Nianang paagiha siya makapahiyom sa tibuok Domingo. ■

Ang tagsulat nagpuyo sa Utah, USA.





**Ni Elder
Orson F. Whitney
(1855-1931)**

Sa Korum sa Napulog
Duha ka mga Apostoles

NATUKOD DIHA SA BATO

*Walay libro nga paigo aron sa pagdumala
niining Simbahan.*

Daghang katuigan ang milabay adunay miabut sa Utah nga usa ka pari sa [laing] simbahan. . . . Nakatambong na siya og usa ka sakrament miting sa “Mormon” ug daghang nasaway sa atong pamaagi sa pagpahigayon sa Katapusang Panihapon sa Ginoo, ilabi na gyud sa paggamit nato sa tubig imbis bino niadtong okasyon. Miingon siya nga kini nakapakurog kaniya sa dihang iyang nakita nga miinom ang mga tawo sa tubig; ug mihatag siya og usa ka kamatuoran, tungod kay kini tinuod gayud, nga sumala sa Biblia, ang Manluluwas, sa dihang mipasiugda Siya sa sakrament diha sa mga Judeo, migamit og bino, nagdeklarar nga kini Iyang dugo o nagrepresentar kini sa Iyang dugo. Mahimo nakong idugang nga nahisulat usab sa Basahon ni Mormon nga migamit ang Manluluwas og bino sa dihang gipaila Niya ang sakrament ngadto sa mga Nephite.

Ang akong . . . higala, nahibalo man siya o wala, naka-oberbar sa dakong kalainan nga nakapalahi sa Simbahan sa Dios gikan sa uban nga mga simbahan sa kalibutan—mao kini, nga samtang sila natukod diha sa mga libro ug mga tradisyon ug mga lagda sa mga tawo, kining Simbahan natukod diha sa bato ni Kristo, sa baruganan sa direkta ug nagdayon nga pagpadayag. Ang mga Santos sa Ulahing mga Adlaw wala mobuhat sa mga butang



tungod kay kini naimprinta lamang sa usa ka libro [sa kasulatan]. Wala sila mobuhat sa mga butang tungod kay misulti lamang ang Dios ngadto sa Judeo sa pagbuhat niini; ni mobuhat sila o dili mobuhat sa bisan unsa nga butang tungod lamang sa mga instruksyon nga gihatag ni Kristo ngadto sa mga Nephite.

Bisan unsa nga butang [nga opisyal] nga gibuhat niining Simbahan tungod kay ang Ginoo, nagpadayag gikan sa langit alang sa atong panahon, nagsugo niining Simbahan sa pagbuhat niini. . . . Mao kana ang konstitusyon sa Simbahan ni Kristo. Kon naggamit kita og tubig imbis bino diha sa sakrament sa Katapusang Panihapon sa Ginoo, tungod kay si Kristo ang nagmando niini [tan-awa sa D&P 27:1-4].

Mopahiangay ang balaang pagpadayag sumala sa sirkumstansya ug kondisyon sa katawhan, ug mausab sigon sa paglambo sa buluhaton sa Dios paingon sa padulngan niini.

Walay libro nga paigo aron sa pagdumala niining Simbahan.

Sa pagsulti niini, mosulti ako uban sa tanang may balaan nga pagtahud sa mga nahisulat sa pulong sa Dios, nga naimprinta na diha sa mga basahon, ang ubang bahin niini mahimong karaan na, nakatuman na sa katuyoan niini ug gibutang na sa estante, [sama sa paghalad sa mga hayop; tan-awa sa 3 Nephi 9:19-20], samtang ang ubang bahin niini may kapuslanan, puno sa kinabuhi, ug magamit sa atong kahimtang karon—ang atong kalamboan karon. Apan bisan kining bahina kinahanglang gyud nga hustong masabtan. Walay tawo nga angay molalis kon unsay anaa sa mga libro, agig pagbatok sa usa ka propeta sa Dios, kinsa namulong alang Kaniya ug naghubad sa Iyang pulong [tan-awa sa D&P 1:37-38]. Sa pagbuhat sa ingon mas gipalabi ang karaang sulat kay sa usa ka buhi nga propeta, diin usa gayud ka sayop nga pagtuo.

Kon unsa man ang gisulti sa Ginoo ngadto sa mga Judeo ug sa mga Nephite mga 2,000 ka tuig na ang milabay o unsa ang gisulti Niya ngadto sa mga Santos sa Ulahing mga Adlaw mga 50 o 60 ka tuig na ang milabay dili magamit bisan kanus-a niining panahona gawas kon nahiuyon kini sa pagpadayag karon, uban sa labing bag-o nga instruksyon sa Ginoo ngadto sa Iyang katawhan pinaagi sa Iyang pinili o gitudlo nga mga sulugoon o sulugoon; ug kinsa kadtong mobaliwala niining kamatuoran mahimutang sa peligro. ■

Gikan sa pakigpulong nga gihatag sa kinatibuk-ang komperensya niadtong Okt. 7, 1916, sama nga giprinta pag-usab sa “Natukod Diha sa Bato,” Liahona, Hunyo 2010, 12-13.

MGA IDEYA



Unsay tahas sa amahan diha sa pagkaginikan?

“Ang mga amahan mopanalangin ug mopahigayon og mga ordinansa para sa ilang mga anak. Kini mahimong espiritwal na mga kasi-natian sa ilang kinabuhi. Ang mga amahan personal nga moapil sa mga pag-ampo sa pamilya, inadlaw nga pagbasa sa kasulatan, ug senimana nga family home evening. Ang mga amahan magtukod og mga tradisyon. . . . Ang mga handumanan niining espesyal nga mga panahon sa panag-uban dili gayud makalimtan sa mga anak. Ang mga amahan regular nga mobisita sa ilang mga anak og motudlo sa mga baruganan sa ebanghelyo. Ang mga amahan motudlo sa mga anak sa bili sa trabaho og motabang sa paghan-ay og maayong mga tumong sa ilang kinabuhi. Ang mga amahan mopakita og ehemplo sa matinud-anong pagserbisyo sa ebanghelyo. Palihug hinumdumi kaigsoonan, ang inyong sagradong calling isip amahan sa Israel—pinakaimportanting calling sa karon og sa kahangturan.”

Magpundok uban sa Pamilya, mga Higala, ug mga Silingan

Para sa Ika-185 nga Tinuig nga Kinatibuk-ang
Komperensya sa Ang Simbahan ni Jesukristo sa mga
Santos sa Ulahing mga Adlaw

Abril 4–5, 2015: Kinatibuk-ang mga sesyon para sa tanang miyembro

Marso 28, 2015: Kinatibuk-ang sesyon para sa mga babaye ug batang babaye nga nag-edad og otso anyos ug pataas

Abril 4, 2015: Priesthood sesyon para sa mga lalaki ug batang lalaki nga nag-edad og 12 anyos ug pataas

Ang tanang sesyon ipahigayon sa Conference Center sa Siyudad sa Salt Lake, Utah, ug gisibya ngadto sa mga meetinghouse sa tibuok kalibutan. Kamo makatan-aw o makapaminaw sa komperensya nga live sa daghang mga pinulongan sa LDS.org ug limitadong mga pinulongan sa BYUtv, Mormon Channel platform, ug sa LDS general conference YouTube channel. Mga arkibo sa pakigpulong maanaa sa LDS.org ug sa Gospel Library app.



ANG SIMBAHAN NI
JESUKRISTO
SA MGA SANTOS
SA ULAHING MGA ADLAW

